

WANTOK

NIUSPEPA BILONG OL PAPUA NIUGINI STRET

Ernst & Young audited/
circulation 15,177

36 pes

Namba 910

Wik i stat long Fonde Desemba 12, 1991.

40 toea



Stail wilwil bilong Madang...Buka Ai bilong Minj
long Westen Hallans provins i raun wantaim tripela wil baisikel (traisaikel) na painim kaikai long Madang maket. Dispela stail wilwil i bilong Fluot Treding. Foto: Ben Taumal.

NCDC wokim bisnis long daiman o?

SAPOS yu gat tingting long raun long Mosbi, yu mas tingim. Dai i no save toktok na i kamap. Sapos yu pilim olsem taim bilong yu i kamap klostu, yu mas go bek kwik long ples.

Long Mosbi nau, pe bilong matmat i go antap. Nesenel Kapitel Distrik Komisen husat i papa long matmat long 9 mail i kamapim nupela pe bilong planim ol man.

Nupela pe bilong planim ol man em: kris-mas bilong ol bebi 1 na i go antap long 12 yia em K70. Na pe bilong planim ol pikinini kris-mas i sanap long wan-pela ten tri (13) na i go long lapun em K100.

NCDC i bin makim K50 bipo. Tasol nau planti man i dai na ol i hapim pe i go antap.

Dispela wik, wanpela bikman long Erima Setelmen husat i no laik nem bilong em i kamap long niuspepa i tokim Wantok olsem NCDC ating i gat laik long wokim bisnis long daiman o olsem wanem.

Pe bilong daiman i K100. Dispela mani i bikpela tumas long ol lain i stap long setelmen. Sapos ol i gat wantok, ol i laki. Na sapos no gat, turangu,



HENRY MORABANG i raitim

bodi bai sting long ais-bokis ya (mog).

Em i tok tu olsem dispela nupela pe bai kamapim planti belpen namel long ol lain i sindaun long setelmen. Na tu sampela lain i no save kisim bikpela pot-nait tu bai wari.

Bikman ya i tok olpela pe bilong K50 i gutpela.

Ripot tu i kam long bikpela haus sik long Mosbi tu i no sapatim tingting bilong NCDC.

Wasman bilong mog, husat tu i no laik givim nem i tok, NCDC i

save putim kain kain takis na pe na planti ol bodi i save slip long mog longpela taim tru. Dispela kain tasol i save mekim ples i sting long ol daiman taim mog i pulap.

Em i tok NCDC i mas tingting gut na askim ol lain insait long Mosbi siti pastaim na makim dispela pe.

Moa timba projek bai kamap

BERNARD MALADINA i raitim

FAIVPELA timba projek bai kamap long Papua Niugini long neks yia. Dispela ol projek bai stap long Lamassa long Nu Ailan provins, Makapa long Westen, Malalaua long Galp, Hawain long Is Sepik na Ome Ome long Sentrel provins.

Kos bilong dispela 5-pela projek bai abrusim tru mak bilong K100 milien.

Na i luk olsem wanpela kampani bilong Esia bai kisim kontrak bilong wok long olgeta projek. Na dispela kampani i gat sea long planti arapela timba projek long kantri.

Kabinet i bin oraitim ol dispela timba projek long kamap bihainim ripot bilong Fores minista, Jack Genia.

Tasol ripot i tok Praim Minista Rab-bie Namaliu bai i no inap amamas

i go moa long pes 3



INSAIT

• Daiden pipel laikim K2,000 long vot...pes 2

• Hagen laikim siti...pes 3



• 4 pes Nius bilong ol Yut

• Madang haus sik protes...pes 5

NEKS WIK

Kris-mas spesel saplimen

TOYOTA
HILUX



NAMBAWAN
TRU LONG
PAPUA NIUGINI

ELA MOTORS
WIL BILONG
OLGETA HAP

PORT MORESBY 229400 • LAE 433655 • RABAU 921988 • MADANG 822188 • GOROKA 721844 • MT HAGEN 521888 • WEWAK 862255
POPONDETTA 297264 • KAVIENG 942132 • KIETA 956083 • KIMBE 935155 • TABUBIL 589060 • VANIMO 871254 • PORGERA 508203

EM3578

Provinsal na nesanel ileksen bai bruk yet

PROVINSAL na nesanel gavman ileksen bai i no inap kamap long wankain taim. Long wanem i gat bikipela hevi long holim tupela ileksen wantaim long wanpela taim.

Wanpela opisa long Ilekorel Komisnin i tok nesanel gavman i bin stapim seksenel vot long nesanel ileksen. Tasol em i stap yet long provinsal ileksen.

Dispela i min olsem ol

Bisnisan resis long Madang rijonal sia

WANPELA bisnisan long Madang, Peter Barter i raun nau long ol ples long Madang provins na kisim tingting bilong ol long wanem kain samting ol i laikim bai i kamap long ples bilong ol.

Barter em papa bilong Madang Risot Hotel na bikipela turis sip, "Melanesian Discoverer".

Barter wantaim ol lain bilong em i raun pinis long ol ples olsem Boisa long Manam Ailan, na ol ples long maus bilong Wara Ramu i go antap olgeta long Kwaga. Em i raun tu long Karkar Ailan na Saidor. Barter i mekim dispela lukluk raun long wan wik olgeta.

Ol wokman bilong Barter i kisim dispela ol komplek bilong ol pipel na bai putim wantaim bilong Barter long yusim long kempen long 1992 ileksen.

Barter i tok wok bilong salim na kisim toktok em wanpela bikipela hevi.

lain i gat nem tasol long Ilekorel Buk bai vot long nesanel ileksen. Long provinsal ileksen, ol manmeri i no gat nem tu i ken vot yet long ol provinsal memba bilong ol.

Em i tok sapos ol manmeri husat i gat nem long Ilekorel Buk i ken vot long nesanel na provinsal ileksen wantaim. Tasol ol manmeri i no gat nem long Ilekorel Buk, bai i no inap vot long nesanel ileksen. Ol bai vot tasol long provinsal ileksen.

Narapela hevi tu em long mak o baundri bilong nesanel ileksen na provinsal ileksen. Provinsal ileksen baundri em i karamapim ol konstituseni na nesanel ileksen baundri i karamapim ol open ilekoret.

Em i tok hevi bai kamap bikos sampela

manmeri i ken makim vot bilong ol tupela taim. Ol bai vot pinis long konstituensi long provinsal ileksen na ol kalap i go gen na vot long open sia bilong nesanel ileksen.

Opisa ya i givim tok piksa long Bulolo Open. Ol manmeri long Bulolo i ken votim nesanel memba bilong ol long Bulolo Open. Tasol ol manmeri long Menyamya bai i kam vot yet long Bulolo Open bihain long ol i vot long Menyamya konstitusi. Bikos ol i stap klostu long ilekoret baundri bilong Bulolo.

Wanpela senta i gat wanpela open sia bilong nesanel ileksen tasol em i ken gat moa long 4-pela ilekoret baundri o mak bilong em tu long provinsal ileksen.

Ol Daiden laikim K2,000 long vot

OL pipel bilong Daiden long Ramu Riva eria bilong Madang provins i laikim ol kendidet i resis long 1992 ileksen i givim ol K2,000 pastaim long ol i votim ol.

Kaunsil bilong Daiden viles, Felix Moka i tok ol i les pinis long giaman promis ol kendidet i save mekim long taim bilong kempen. Em i tok ol i no lukim wanpela senis o developmen long ples taim PNG i kisim independens i kam inap nau.

Em i tok ol kendidet i raun long ples long taim bilong kempen na promis ol long kain kain projek. Tasol taim ol i win na kamap lida, ol i lus tingting olgeta long ol promis bilong ol.

Daiden viles i stap samting olsem 30 kilomita longwe long maus bilong Ramu Riva. Ol pipel i save kisim foa aua olgeta long kisim moto i go long bik rot klostu long ol. Na long dispela hap, ol i ron long ka tripela aua moa i go long Bogia stesin. Bogia i stap sampela kilomita tu long Madang taun.

Kaunsil Moka i tok wanpela long ol kendidet i bin promis long baim moto bilong helpim ol long karim ol kes krop bilong ol i go salim. Tasol i no gat wanpela samting i kamap yet.

Em i tok taim ol i kisim ol dispela K2,000 long ol kendidet, bai ol i stretim haus tambaran bilong ol na baim wanpela moto.



• Ol haus lain i wari: Ol haus lain arere long Goroka taun maket i penim ol yet long graun na wari long wanpela famil memba husat i bin dal. Ol pipel long Hallans rijon i save penin ol yet long graun long kain taim olsem bilong sore, na tu long taim bilong palt. *Poto Sape Metta.*

Ol nupela ileksen lo wetim Spika long putim mak

SAM VULUM i raitim

ILEKTOREL Komisnin bai stat bihainim ol senis long lo bilong ileksen long 1992 nesanel ileksen.

Nesanel palamen i tok orait long ol dispela nupela senis long kibung bilong mun Ogas na Novemba long dispela yia.

Minista bilong Edministretiv Sevis, William Wi i tok Legislativ Kaunsil i stretim nau ol pepa bilong Spika long putim mak long em pastaim long Gavana Jenerel i autim long Gavman Gaset.

Ol dispela senis em:
• Nominesen fi nau bai go antap long K1,000. Kendidet husat i win tasol bai kisim bek dispela mani. Dispela senis bai mekim ol man i laik resis long tingting gut;

• Bai-Ilseksen bai kamap bihain long 12-pela mun na i no siks mun olsem bipo;

• Pastaim ol manmeri i gat 28 de bilong makim ol kendidet bilong resis. Tasol nau bai ol i mekim olsem insait long 7-pela de tasol;

• Pastaim ol manmeri i save vot long 21 de, nau ol i gat 14 de o tupela wik tasol. Husat man i no vot insait long dispela tupela wik bai i no gat sans moa long vot;

• Pastaim lo i oraitim tasol ol narapela manmeri long makim ol lain aipas na ol han nogut long vot. Tasol nau ol narapela man i ken makim tu ol lapun husat i no inap rit na rait long vot;

• Palamen bai holim namba wan kibung 7-pela de bihain long

ileksen na i no 21 de olsem bipo;

• Ol kendidet i ken wokim kain kain posta bilong ol, maski

Komisina inap tokaut long ol provinsal ileksen

PLIS Komisina, Ila Geno i makim pinis tupela sinia plis opisa long wok wantaim Ilekorel Komisnin long kamapim "masta plen" long wok bilong lo na oda long taim bilong ileksen long neks yia.

Plis hetkwata wantaim foapela Asisten Komisina long Hailans, Sauten, Niugini Ailan na Momase rijon bai yusim dispela "masta plen" long wokim ol plen bilong ol yet.

Minista bilong Edministretiv Sevis, William Wi i tok dispela i kamap pinis tasol i luk olsem bai gavman i askim long helpim bilong Difens Fos na ol narapela man husat i lusim Plis o Difens Fos na i stap nating long kam insait wok long taim bilong ileksen.

Wi i tok dispela i mas kamap bikos hevi bilong lo na oda i wankain nau long olgeta provins. Ol sekyuriti fos bai helpim Ilekorel Komisnin long taim bilong ileksen na bihain long ileksen.

bikipela liklik. I no olsem bipo we ol kendidet i tambu long abrusim wanpela mak; I tambu long ol man nating i yusim laudspi-

ka o wankain samting olsem long toktok long taim bilong vot. Ol plis na ol ilekorel opisa tasol i ken yusim ol dispela samting.

Minista i tok wantaim long nesanel ileksen, siksipela provinsal ileksen bai kamap tu long dispela taim. Tasol em i tok em i laik bilong Ilekorel Komisina, Reuben Kaiulo long makim wanem taim em i laikim ol provinsal ileksen i kamap long en.

Wi i tokaut tu olsem Ilekorel Komisnin i givim ol kontrak long EM TV, Kundu na Karai Radio Sevis long mun Epril bilong dispela yia long tok save long ol pipel long wanem samting bai kamap long ileksen neks yia. Ol ilekoret opisa tu i raun long ol ilekoret na tok save long ol pipel.

Komisina Kaiulo i toktok tu pinis wantaim ol primia, olgeta Provinsal Plis Komanda, ol Provinsal Afeas Opisa na Difens Fos Komanda, ol lokal gavman lida na ol narapela lida long ol wan wan provins. Em bai mekim yet dispela wok inap long Nu Yia.



MOSBI: Ol plisman i holim pinis 7-pela man husat i bin bagarapim tupela stesin bilong P&T long salim na kisim toktok. Dispela tupela stesin i stap long long Maunten Strong namel long Morobe na Sentrel provins na Maunten lalibu long Sauten Hailans.

Plis ripot i tok dispela ol man i stap nau long kalabus.

Dispela ol lain man wantaim ol sampela arapela i bin bagarapim tupela stesin bilong salim na kisim toktok. Na dispela i stapim planti wok long Momase, Hailans na Niugini Ailan rijon.

Ol plisman i painim yet 14 arapela man husat i bin stap tu long Maunten Strong. Ripot i tok papa bilong graun long Maunten Strong, Sako Muinai i tok papa bilong em i bin kisim mani pinis long dispela graun. Na i no gat man i stap bilong komplek long dispela graun.

Ripot i tok PTC i helpim ol plis long helikopta bilong go holim ol bikhet man husat i go pas long bagarapim ol samting.

SENTREL: Ol yangpela bilong Hula eria i gat nupela kain stail bilong stilim na kisim ol samting. Ol bai stapim ol ka long rot na askim long mani. Ripot i tok dispela pasin i kamap bikipela nau.

Ol plisman i wok long painim yet wanem hap stret em ol dispela kain pasin i save kamap long en. Na tu long painim husat ol i save mekim olsem. Ripot i tok planti manmeri wantaim bikipela mani i save givim tasol taim ol raskol i pretim ol wantaim sotgan na naip.

Ol plisman i wok long painim ol yet.

KEREMA: Ol plisman i holim pasim wanpela man Indonesia long kilim wantok bilong em long Kikori eria bilong Galp provins. Plis ripot i tok Togar Purba i bin dring bia, na bihain em wantaim wantok bilong em i kros.

Long dispela taim, Kapitan Napitu i kisim naip na katim Purba 4-pela taim long bodi bilong em. Purba i dai long sip bilong tupela. Bikos em i bin lusim planti blut.

Bodi bilong Purba i stap nau long bikipela haus sik long Mosbi. Na Napitu i slip nau long plis stesin haus kalabus long Boroko.

LAE: Gavman sevis i no inap go moa long Is na Wes Taraka, Bumbu, Sodas Kompaun, Buimo Rot, Hunter, 1, 2, 3, 4 na 5 mail setlemen. Dispela i bihainim wanpela askim bilong ol Nawae pipel. Long wanem ol raskol i bin kilim tupela man long 4 Mail tupela wik i go pinis.

Primia Jerry Nalau i askim pinis ol komyuniti lida long 4 Mail wantaim Is na Wes Taraka long bringim olgeta man husat i kilim tupela dispela man i kam long lo. Sapos nogat, olgeta sevis bilong gavman long olgeta setelman bai stop.

Ol pipel bilong Nawae i laikim tu long stapim bia olgeta long Lae inap long tupela yia.

Ol plisman i lusim dispela samting i stap nau long han bilong ol pipel long wok bung wantaim. Na bringim ol lain husat i bikhet i go long ai bilong kot.

LAE: Nesanel Kot long Lae bai harim laspela toktok bilong MV Simbang nau. Ripot i tok ol man husat i stap laip taim sip i kapsait wantaim ol narapela wantok bilong ol bai givim las stori. Bihain long olgeta toktok kot yet bai tokaut long wanem samting em i painim aut.

MV Simbang i kapsait long Sialum eria bilong Morobe provins long Fraide 6 Septemba. Ripot i tok moa long 98 manmeri i bin klap long sip tasol moa long 69 bilong ol i stap laip. Kot i painim yet as bilong dispela birua.

LAE: Ol raskal i brukim haus bilong Ekting Plis Komanda, Tony Wagambi na stilim sampela samting insait long haus.

Dispela stil pasin i bin kamap long Tunde moning. Ripot i tok ol stilman i bin katim waia get na klap i go insait long haus. Insait long



Saveman helpim disebel... Tony Spinks, em spesel tisa bilong ol disebel long Australla i stori wantaim ol disebel pikinini long Red Cross Spesel Edukesen Senta long Mosbi.

Provinsal gavman i laikim Hagen kamap siti na ol distrik olsem taun

JULIE BENGI i raitim

WESTEN Hailans provins i laik kamap siti. Na ol distrik bai kamap olsem ol taun.

Dispela em wanpela tingting bilong provinsal gavman. Na em bai statim dispela long Dei distrik klostu long Panga Kaunsil Semba. Dispela projek bai pinis bihain long 5-pela yia. Na gavman i lusim bikpela mani pinis. Ol wokman i stat pinis long stretim ol ples.

Dispela nupela hetkwata bai gat 6-pela mobail plis yunit, wan-

pela haus kalabus, haus sik, wanpela skul, distrik na Lokal kot haus, Pos Opis na beng, nesenel dipatmen-na ol stua. Em bai stap long Muglamp.

Provinsal na nesenel gavman wantaim bai givim mani bilong dispela bikpela projek.

Wanpela man husat i sapatim tru dispela projek em memba bilong Kotra Tigi, Kar Kil. Na long soim dispela, em i givim mep

bilong dispela distrik hetkwata i go long ol pipel bilong Wali long las wik Sarere long ples Kents.

Ol pipel bilong Kar long Tepoka eria i bin givim 270 pik na K12,000 i go long ol lain bilong Wali. Dispela i bin kamap olsem wanpela pati bilong bekim samting.

Na dispela i bihainim pasin tumbuna. Tasol ol pipel bilong Kar i givim mani long sapa-

tim wok memba bilong ol i mekim. Na tu long soim olsem pasin bilong ol hauslain i birua na pait long bipo pinis.

Kar Kil i askim tu ol pipel bilong Komboga na Minimbi long lukautim gut ol dispela samting long Dei distrik. Bikos dispela wok i no bilong wanpela grup tasol. Em i bilong helpim olgeta lain pipel we mak bilong distrik i karamapim.

Ol skul long Morobe kisim moa mani

DIPATMEN bilong Edukesen long Morobe i kisim gutpela helpim long long wok neks yia.

Morobe provinsal gavman i bin givim 36 pesen moa long baset bilong ol skul long dispela yia. Ol skul i kisim K657,868 long baset. Tasol long neks yia, gavman i apim i go antap long K897,800.

Asisten Seketeri bilong Edukesen, Samsan Mangot i tok dipatmen i amamas long gutpela helpim bilong neks yia. Olsem na ol bai traिम bihainim gut ol plen na program

bilong skul ol i redim pinis.

Mangot i tok skul fi bilong ol pikinini bai i stap wankain yet olsem long dispela yia. Ol haiskul long taun olsem Bugandi, Lae Hai, Bumayong na Busu bai baim K150 sapos ol i slip ausait na kam skul. Ol sumatin husat i slip long skul bai baim K270.

Ol haiskul long ples olsem Makham Veli, Menyamya, Dregahafen, Siassi, Wau na Wasu bai baim K130 sapos ol i slip ausait na go skul. Ol sumatin

husat slip long skul bai baim K240.

Mangot i tok long neks yia bai planti gret 6 sumatin i go long haiskul. Long wanem i gat ol gutpela wok na senis i kamap insait long wok bilong skul nau long provins.

Em i tok rekot i soim olsem wok bilong skul insait long 5-pela yia. Long dispela yia, ol gret 10 studen i bin kisim gutpela mak long nesenel eksem. Dispela i soim gutpela senis long wok bilong ol skul long provins.

Morobe provins i laik

wokim 5-pela nupela skul long olgeta yia. Dispela i min olsem bai i gat wanpela nupela komyuniti skul, haiskul, vokesenel senta na arapela trening skul tu wantaim.

I gat arapela plen tu i stap bilong putim moa pikinini long komyuniti skul long haiskul. Tasol dispela i stap long wanem kain helpim ol i kisim.

Nesenel gavman i bin givim K500,000 i go long CODE. Em i givim tu K160,000 i go long diptmen bilong Edukesen long provins.

Wok i stat pinis bilong stretim ol haus long yunivesiti

WOK i kamap nau long Yunivesiti bilong stretim ol haus slip bilong ol studen pastaim long skul i stat neks yia.


Wok i kamap nau long ol haus slip long Toluan, Poroman, Lesitewa, Talaigu, Hetura, Kapandu na Niomuro. Ol i rausim ol flai waia, glas bilong windo, kabot, waia bilong pawa na ol arapela samting long ol rum. Dispela em long givim spes long ol nupela samting bilong go kisim ples.

Ol i wok long penim na stretim tu bikpela rum bilong Union we ol studen i save holim ol kibung na arapela pilai na bung long en.


Wok mentenens long Taurama na Waigani yunivesiti em hap program ol i plenim long dispela yia. Kos bilong em i olsem K500,000.

Ol mausman long Yunivesiti i tok no gat wanpela wok i bin kamap long tupela yunivesiti wantaim inap long 25 yia.

Ol wok bilong stretim ol haus na rum long Yunivesiti bai i stap inap long 4-pela mun. Em bai pinis pastaim long ol studen i kam bek long skul.



• Tupela wokman bilong Yunivesiti bilong Papua Niugini i rausim olgeta samting insait long rum na putim ol nupela samting i go insait gen. Olgeta wok ya bai pinis pastaim long skul i stat gen.



Sports Trophies
for sale SPECIAL 30% OFF

ALU SIGNS PTY LTD
PO BOX 7081, BOROKO PH: 25 4800.
STORE: NEAR BOROKO POLICE STATION

TORO GO
BAIM PEINT NA KEROSIN LONG PEINTIM TOILET BILONG EM...

EM KAMAP LONG HAUS NA GO STRET LONG TOILET...

EM NAI! TOILET BILONG MI BAI LUK OLSEM TOILET BILONG KWIN!

EM PEINTIM I GO NA TOILET I LUK TOP STRET...

EM PEINTIM OLGETA PINIS NA KAPSAITIM OL HAP PIPIA PEINT NA KEROSIN IGO INSAIT LONG TOILET POT...

EM NAI! WOK I PINIS... MI KAPSAITIM OLGETA LONG HIA!

LONG DISPELA TAIM SIMUK BILONG EM TUI PINIS... EM KIRAP NA TROMOI I GO INSAIT LONG POT...

TASOL, YU SAVE... KEROSIN NA PEINT I MIKS NA TAIM PAIA BILONG SIMUK I GO INSAIT... EM I PAIRAP OLSEM E TOMIK BOM LONG SAPAN STRET...

BOOM!

AAAAA

AEEE!! OL IRAK I MAS BOMIM MIPELA YA?

WANTOK

NIUSPEPA BILONG OL PAPA NIUGINI STRET

Tingim gut bihain taim

Long Tunde Kabinet i oraitim 5-pela timba projek long wok long Tunde. Fores Minista Jack Genia i tok em i amamas long kabinet i givim yesa. Bikos em i kisim strongpela salens i kam long ol provinsal gavman na papa graun olsem projek i mas op, ating ol i laik kisim mani hariap.

Tasol no ken seksek hariap long mani o tingim nau tasol. Mipela i mas tingim olsem gutpela namba wan bekim long sait bilong divelopmen mas i go long papa graun na kantri, kampani mas bihainim gut envairomen plen, na sampela moa.

Olsem na i gutpela long skelim gut as bilong dispela tupela yia tambu long timba wok long kantri, na ol senis em i bin kamap bihainim dispela tambu, long sait bilong hamas wok bai kamap, na bihain orait go het.

No gat orait i gutpela long wetim pastaim Praim Minista Rabbie Namaliu long kam bek.

Esia kampani husat i wok pinis long kantri i bagarapim pinis sampela bus bilong mipela. Dispela i no ken kamap moa.

Sapos mipela i seksek long mani, na i no skelim gut ol hevi em bai kamap long bihain taim, kantri bai bungim moa hevi olsem bilong Bogenvil.

Gavman no ken seksek hariap long askim bilong ol provinsal gavman na papa graun. Bikos ol dispela lain bai kamapim hevi sapos asua i kamap bihain.

I gutpela long gavman i salim sampela opisa i go kliaim ol papa graun gut long ol dispela.

Planti manmeri Bogenvil amamas long kisim ol saplai bilong Gavman

Stori i kam long las wik. Konio Seneka i go het long stori bilong em.

Bihain long ol sekyuriti fos i sekim mipela, ol i tokim mipela long stap long bot inap long tulait. Mipela i stap long Buka long tripela de olgeta. Na long Madne moning, mipela lusim Buka long go long Soraken, Torokina na Buin. Long Soraken, ol BRA i kukim wanpela opis bikos ol i kros olsem em i no stap namel long tilim kaikai long ol manmeri.

Ol liklik lain bilong ol sekyuriti fos tasol i stap long Soraken long helpim ol lida long wok wantaim ol komyuniti. Long olgeta hap yu go, yu lukim ol hul ol BRA i yusim long taim ol i pait wantaim ol sekyuriti fos. Planti ol samting i bagarap tru long dispela hap. I no gat man i wari long lukautim moa ol kokonas plantasin. Ol wokman bilong sip o rausim ol kago na tu ol sampela asples manmeri tu i go daun long painim ol famili bilong ol bihain long ol i lusim ol long longpela taim tru.

Taim mi wokabaut i kam bek long sip, mi harim wanpela liklik meri i singim singsing bilong Helgas ben bilong Mosbi ol i kolim Gaire Vavine. Dispela i mekim bel bilong mi kirap taim mi harim singsing.

Long Torokina, planti manmeri tu i kamap taim mipela i go insait. I nogat planti kago, tumas i go long Torokina olsem na sip i no

stap longpela taim. Ol liklik manmeri i kam lukim sip i tata long mipela taim mipela lusim nambis. Ol kago mipela lusim long Torokina em rais, tinpis na ol narapela kaikai. MIPELA i lusim Torokina na long samting olsem I2 klok mipela i kamap long Buin. Mipela i anga ausait long biksolwara na long 8 klok long moning mipela i go sua long nambis bilong Buin.

Planti ol bikman na ol yanpela man i pulap tru long nambis em namba bilong ol inap olsem 200 olgeta. Planti bilong ol em ol BRA. Taim mipela i lukim planti lain tru long nambis, mipela olgeta pasindia wantaim kepten na ol boskru wantaim i pret nogut tru.

Kepten i tokim ol boskru long opim ai bilong ol taim ol i raun long sip long mekim ol wok bilong ol. Long wankain taim wanpela komanda bilong BRA long Siwai eria wantaim ol sampela soldia bilong em klap long wanpela dingi na pul i kam long sip.

Ol i toktok wantaim kepten pinis na go bek long nambis. I no long taim wanpela ka i kamap long nambis. Em i karim ol narapela lida bilong BRA husat bai sekim ol pasindia na sip wantaim ol boskru na kepten.

Bihain nau ol yanpela



• Tripela bilong ol lain soldia husat nau i stap long Buka long lukautim ol wok bilong bringim ol sevis i go bek long Bogenvil

BRA i helpim ol boskru long rausim ol kago long sip. Na ol BRA lida i bungim mipela ol lain bilong nius. Mipela i kolim nem bilong mipela na wanem oge-naisesen mipela i kam long en. Ol i tokim mipela long i ken go nambis na lukluk raun long Buin taun nau i no gat man.

Kepten i tokim mipela long kam bek long sip bipo long 3 klok tasol nogat, mipela i stap long Buin inap long hap pas foa. Mi save pinis olsem sip i sel aut pinis. Mipela lusim Buin na go long Kagua nambis na wanpela BRA i kam long sip i tok sip i lusim pinis nambis.

Draiva i tokim mipela olsem bai spit bot i karim mipela i go long sip. Mipela bihainim

narapela rot na bihain long 20 kilomita, mipela kamap long wanpela Katolik peris. Ol manmeri i lotu pinis taim mipela i kam kamap.

Mi kirap nogut long lukim olsem planti long ol meri bilong Madang, Morobe, Manus, ol Tolai husat i marit long ol man long Bogenvil.

Ol i kam raunim mi na askim wanem taim mi go long Ailan. Sampela i krai na taim mipela lusim ol, ol i singaut, "Kisim halo bilong mipela i go long PNG".

Mipela kamap long nambis bilong Nkumu viles na lukim sip i stap ausait tru. Mipela i wari nau na tu mipela i wet longpela taim tru long wanem papa bilong spit bot bai karim mipela i nb stap.

Long Fonde ol BRA i kam kisim i go long nambis long toktok wantaim ol siv na ol BRA lida. Mipela kisim ka i go long Siwai eria long ka em Provinsal Afeas i givim long mekim wok bilong kisim ol sevises i go bek long Ailan.

Mipela i go kamap long ples we ol i wokim nupela haus palamen bilong ol. I gat 30 man i wok i stap.

Bihain mipela i go long Monoitu we hetkwata bilong Saut Bogenvil Interim Aurtiti i stap long en. Mi toktok wantaim siaman, Anthony Anugu bihain mipela i go bek long sip. Na taim mipela i kamap stret, sip i lusim nambis bilong Buin long hap pas 2 long apinun.

WANTOK

NIUSPEPA BILONG OL PAPA NIUGINI STRET

P.O. Box 1982 BOROKO
Telepon Namba: 25 2500
Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

HA! WANPELA BIKPELA BISNIS KAMPANI INVAITIM BIABIA LONG PATI BILONG OL...




NAU EM TEK-OFF IGO LONG PATI PLES... OLGETA MANMERI STAP INSAIT PINIS...



MAN, BIABIA HAI-PILINS STRET NA GO LONG HAUS LONG SENIS...



TAIM BIABIA GO INSAIT LONG DUA, OLGETA LUKIM EM NA LAP INDAI STRET...



• Ol wokman i hatim wok long nupela haus Palamen bilong Saut Bogenvil Interim Atortti



□ WANPELA marit bilong Kandep i gat wanpela pikinini man. Tupela wantaim i save wok olsem na ol i kisim wanpela hausmeri bilong was long dispela boi taim tupela i go long wok. Olgeta moning mama i save go pas long wok na papa i save go bihain. Wanpela apinun ol pinis wok i kam sindaun kaikai na boi ya kirap tokim mama olsem, "Mama, oltaim mi save lukim dispela meri save lukautim mi ya na mi save beihat. Mi laik tromoi em antap long bed na...." Mama harim olsem na kirap bikmaus, "Aiyeee...husat save lainim yu long dispela kain hap tok tru ya" Boi kirap na bekim, "Nogat, taim yu go wok, papa save kam bek na mekim olsem ya." Na yu save pinis, kela bilong papa i sup stret long sospen.

(putim stret nem bilong yu - SP) Unitech, Lae.

□ KANDRE meri bilong Kandep pinis skul long apinun na kamap leit tru long haus. Oralt mama i kirap na askim em, "Hei, yu mekim wanem na yu kam leit long haus?" Na dispela liklik gret 5 meri i bekim, "Nogat mama, mi kam long rot na ol yangpela boi i tokim mi long go antap kisim buai bilong ol." Mama harim olsem na kirap tok, "Alyo, pikinini bilong mi. Ol boi giaman yu na lukim andapens bilong yu ya." Tasol yangpela meri i bekim, "Aha mama, laki tru na mi rausim andapens ya."

Boskie A, Lae, M.P.

□ LONGLONG Lucy i raun long Wewak taun i stap na bungim tupela poro bilong em Aron na Ranga. Lucy kirap na tok Inglis long Ranga, "Good morning, how's the life? Ranga i sanap longlong i stap na i askim poroman bilong em, "Bai mi tok wanem?" Tupela sanap i go na Aron i tokim Ranga, "Yu mas tok olsem, 'Yes Lucy, I am beautiful country'."

Ken Simon Kalus, Bialla, W.N.B.P.

□ WANPELA katekis i no save long tok Inglis. Tasol oltaim em i save laik traim tok tok long Inglis. Oralt wanpela taim misin i salim em bilong go kos inap long 6-pela mun. Bihain em i kam bek na wanpela taim i paltim nogut stret meri na pikinini bilong em. Kansol bilong ples i kam na askim em, "Hei katekis, bilong wanem na yu paltim meri na pikinini bilong yu olsem?" Na katekis i kirap na laik bekim long tok Inglis, "She is my wife and she is my daughter. And she is my listening to me. Can you understand my telling or not?"

Albert Malix One, Wirul Peris Haus, Wewak, E.S.P.

□ WANPELA meri Makham na Mumeng senis long moning bilong go long lotu. Meri Mumeng kirap na laik askim meri Makham long taim. Olsem na em kirap tok olsem, "Who's the time?" Meri Makham i no klia long dispela askim na i no stretim laik bilong Mumeng.

N. Dick Laga, Lae, M.P.

□ OL manmeri holim wokaton raunim Lae siti. Wanpela gret 10 studen meri bilong Busu halskul tu i wokabaut i go na tanim lek bilong em long baret. Em kirap singaut long ol poro bilong em na laik tok olsem... "Hey girls, I twisted my leg in the drain..." Tasol em i popala na tok, "Hi girls, I squeeze my leg in the drain." Wanpela boi harim na kirap askim, "Long wanem taim?" Na meri ya i tok, "I think something about 3:45 pm."

N. Dick Laga, Lae, M.P.

Ol wokman long Madang haus sik bai protes sapos i no gat gutpela bekim

BEN TAUMAI i raitim

MADANG Jenerel haus sik i

givim wanpela petisen 8-pela askim na 14 de notis long Provinsal gavman long stretim wari bilong ol, sapos no

gat bai ol i go long straik.

Ol i mekim dispela bihain long ol raskol i hensapim ka bilong haus sik, na holim pasim 4-pela nes meri na bagarapim ol.

Dispela trabel i bin kamap long Fraide 29 Novemba long samting olsem 11 klok long nait (11.00pm).

Wanpela duti sista long Fraide nait i tok ka bilong haus sik i kisim 4-pela duti nes meri long taun eria pinis na i laik go kisim wanpela sista gen long Yagaum Helt senta long kam wok long 10 klok sif.

Ol i go na sekim olsem sista ya i no stap. Olsem na ol i lak kam bek. Tasol 5-pela taskol i stapim ka na poinim ka wantaim naip long draiva.

Ol i rausim draiva i go ausait long rot na draivim ka wantaim 4-pela nes meri i go na mekim pasin nogut long ol.

Na bihain tupela sista i ranawe long bus i go na kisim helpim long ples. Na ol raskol i pusim narapela tupela nes long draivim ka na kam bek long taun.

Long Sarere na Sande moning, planti sikman na meri wantaim pikinini i no inap long kisim marasin. Bikos dua bilong haus sik i pas na planti nes wantaim sista na dokta i no laik wok.

Ol i mekim dispela long soim olsem ol i no amamas long wanem samting i kamap long 4-pela sista.

Tenkyu long sampela gutpela nes na dokta i wok long wiken. Sapos no gat ating planti bai kisim bagarap.


Long Mande moning, dua i pas yet na olgeta wokman na meri bilong haus sik i kibung. Insait long dispela kibung ol i raitim wanpela petisen. Na insait long dispela petisen i gat sampela askim bilong ol:

1. Putim 2 we redio long olgeta ka bilong haus sik. Dispela bai helpim ol draiva long toktok wantaim bes na ol plisman sapos ol i bungim birua.
2. Putim haus bilong ol wokman na meri husat i save wok sif klostu long taun.
3. Ol 4-pela nes kisim bagarap i mas kisim kompensesen.
4. Ol wan pisin bilong ol 5-pela raskol ya i mas baim kompensesen mani na sampela moa.

Wantok i no inap long kisim bos bilong Madang haus sik na primia Andrew Ariako. Ripot i kam long opis bilong ol i tok ol i stap long kibung.

Ol plisman i holim pasim pinis tupela bilong dispela 5-pela man em ol i blip i stap insait long dispela trabel. Narapela tripela em ol i no holim pasim yet.

Provinsal Plis Komanda, Pius Sipulung i tok em i no inap mekim wanpela toktok inap olgeta wok painimaut i pinis.



- Flaua bilong Goroka: Wanpela yangpela meri Ingran i amamas long swit smel flaua bilong wanpela okid we em i kisim long Gahavisuka pak. Poto Sape Metta.

Morobe na Madang So bai kamap long Teptep long 1992

WANPELA kalsarel so bai kamap long Trinde 8 na Fonde 9 Janueri, 1992 long Teptep Stesin.

Ol pipel bilong Sapmanga konstituensi long Morobe provins na Nayup konstituensi long Madang bai holim

dispela so. I gat wanpela boda tasol i stap namel long tupela konstituensi ya. As tingting bilong

holim dispela kalsarel so em long soim ol kain kain samting ol pipel i save wokim, soim ol singsing tum-

buna na ol arapela pasin na samting bilong tumbuna bilong dispela hap.

Ol pipel bai salim tu ol kain kain kaikai bilong gaden em ol yet i groim, ol samting bilong salim na kisim mani na ol arapela kain kain liklik bisnis long eria bilong ol.

Dispela so bai kamap tu long taim stret bilong makim namba 10 aniveseri bilong ol lain Nayudos Pipels Yunien. Dispela em wanpela lokal oganaisesen ol pipel yet i bin statim bilong kirapim ol wok long komyniti.

Dispela kalsarel so i kamap wantaim as tingting tu bilong bungim Morobe na Madang provinsal gavman wantaim. Long wanem Teptep Stesin i stap namel stret long tupela provins ya.

Na em bai kamap stret tu long namba wan MAF De. Long wanem, rot bilong ol pipel long raun na wok bilong Misineri Eviesen Felosip (MAF) i mas kamap wantaim. Dispela so bai makim wanpela bikpela bung tru long dispela hap.

Ol mama bilong Grin Riva skul long gutpela kaikai

OL mama bilong Yuri senses divisen long Grin Riva i bin stap insait long wanpela kos bilong gutpela kaikai (nutrisen).

Dispela kos i bin stap inap long wanpela wik olgeta. Na i kamap long Kambriep komyuniti skul long Amanab long Wes Sepik provins.

Moa long 27 mama bilong ol ples long Avia 1 na 2, Yuri, Tingirabu, Penagen, Kamberap na Trowari i kamap long kos. Divisen bilong Helt, Edukesen na Praimeri Industri i bin ranim dispela kos. Ol mama i lainim ol samting long wok bilong famili plening, kukim gutpela kaikai bilong ol skul pikinini, ol liklik bebi na wanem kain kaikai bilong kisim tripela taim long olgeta de.

Dispela kos i bin lukluk tu long wok bilong praimer i helt kea, we bilong groim kaikai

olsem pinat, kon, redim graun bilong wokim gaden na planti arapela samting. Na tu

long pasin bilong lukautim wan wan famili na haus. Man husat i go pas

long dispela kos, Luke Waiya i amamas tru long ol mama husat i bin kamap.



- Poto i soim sampela mama bilong Yuri i sindaun harim skul bilong Waiya long rot bilong kukim gutpela kaikai. Poto: Ari Haba.

TU MINIT TINGTING

KI BILONG NUPELA YIA I STAP INSAIT LONG YU

LONG taim bilong nupela yia, yumi olgeta i gat wankain tingting tasol: yumi laik stat gen. Yumi save skelim yia i bin go pas pinis, na yumi save sekim olgeta asua yumi bin mekim pinis. Orait, nau yumi wokim plen na rot bilong go het gut long nupela yia. Ating yumi bin mekim dispela kain samting inap planti yia nau. Tasol ating yumi bin bihainim pasin kranksi bilong wanpela mama i gat tripela pikinini.

Mama ya i bin painim wanpela kiau paul na em i autim plen bilong em long ol pikinini. Plen i go olsem: "Ol pikinini, bai yumi wokim samting tru nau wantaim dispela kiau. Yumi no

ken kaikai dispela kiau. Nogat. yumi mas putim aninit long paul mama bilong ol wantok.

Na bihain bai wanpela liklik pikinini paul i kamap. Na yumi no ken kaikai em tu. Em i mas groap na karim planti kiau, na kamapim planti pikinini tu. Tasol bihain yumi gat planti, yumi no ken kaikai kiau o mit bilong kakaruk. Nogat. Yumi bai salim ol na baim wanpela pikinini bulmakau. Em tu bai karim planti, na bihain bai yumi gat planti kau. Tasol yumi no ken kilim ol kau na kaikai. Nogat. Yumi bai salim ol na baim wanpela bikipela fam...na bai ol samting i go, i go tasol na yumi mekim bikipela wok bisnis."

Long taim mama ya i hotim toktok, kiau i pundaun long graun na i bruk olgeta. Na olgeta plen na driman bilong mama i pundaun tu.

Long namba wan de bilong nupela yia, yumi tu i save wokim olkain promis nating; tasol ating planti i olsem dispela kiau long stori, em i bruk long dispela namba wan de yet.

Narapela poin bilong nupela yia em i dispela: bai yumi inap painim we, ki bilong opim nupela kain laip long nupela yia? Ki ya i stap insait long yumi yet. I gat wanpela stori bilong dispela samting.

Long haus bilong em, wanpela bisnisman i gat wanpela liklik

bokis ain, bilong haitim ol mani na ring na sekbuk bilong em. Tasol dispela man i no gat planti mani, olsem na em i save haitim tasol olkain setifiket insait long dispela strongpela bokis bilong mani.

Wanpela de em i laik opin dispela bokis, tasol em i no painim ki. Olsem na em i bringim bokis i go long woksap bilong saveman bilong wokim lok na ki. Em tu i no inap painim ki, olsem na em i laik givim bokis i go bek long papa bilong en. Em i litimapim kona bilong dispela bokis ain, na wantu, dua bilong en i op. Em i kalap nogut long lukim bokis ya i no pas olgeta. Na insait long en, em i painim ki yet



FRANK MIHALIC I RAITIM

i slip i stap.

Yumi i wankain. Yumi wan wan i olsem dispela bokis ain bilong haitim ol mani na gutpela bilas. Insait long yumi yet, ki bilong opim laip bilong yumi i hait i stap. Maski long lukluk longwe. Lukluk i go insait long yu pastaim.

Pasin bel isi kamap gen long Goilala

Pater ROGER PURCEL, M.S.C. i raitim

PISIN bilong nait i singaut, na kolwin wantaim smok i lusim maunten na i go daun long ol ples daunbilo. Em nau ples i laik tudak.

Yangpela sief bilong ples i apim lip bilong tanget i go antap na tokim olgeta man, meri na pikinini long pasim maus. Orait em i tokim ol long wanem as na mipela i bung tude. Olgeta arapela 6-pela sief husat i sindaun wantaim em i kirap na mekim wankain toktok. Na olgeta i promis olsem pasin bel isi na gutpela sindaun bai kamap long hap bilong ol - promis em olgeta pipel na misin bai wok wantaim long helpim ol pipel.

Dispela em wanem samting i bin kamap long Kerau, insait tru long Aibala veli long Goilala Distrik. Ol pipel bilong 7-pela ples bilong Katolik Misin long Kerau i bin bung long 23 Novemba, 1991 bilong tokaut long pasin bilong gutpela sindaun na bel isi. Planti ol arapela lain i makim sios yet, gavman, sampela politisen na ol arapela manmeri na pikinini i bin kamap bilong lukim dispela bung.

Em i olsem rot bilong makim wok bung wantaim namel long pasin tumbuna na lo bilong gavman tude. Tupela i bung wantaim bilong givim wanpela bekim tasol.

Dispela samting i stat las yia taim ol raskol i bagarapim wok na ol samting long misin stesin. Ol i brukim haus bilong pater 10-pela taim na dispela i bagarapim olgeta wok bung wantaim namel long ol pipel na misin. Na wok bilong sios tu long autim Gutnius i pundaun.

Planti taim ol i save tingting long pasim wok bilong misin long hap. Bikos oltaim ol wokman na meri i save stap wantaim pret. Ol famili tu insait long ol komyuniti i stap longlong nabaut. Ol i no save long sait bilong husat bai ol i sanap, bilong ol famili memba bilong ol husat i bikhet nabaut o long sait



• Pater Roger Purcell i holim sot gan wantaim karamap brus na toktok long ol pipel.

bilong kristen bilip na wok bilong sios.

Dispela em wanpela kain piksa bilong wanem samting i kamap bikipela pinis long olgeta hap bilong kantri. Planti hevi i kamap bihainim wanpela singaut na kraik, bikos i no gat rot bilong stretim ol.

Ol pipel bilong Tawade long Goilala i gat nem long kain strongpela het na bikhet pasin bilong ol. Ol i man na meri bilong pait na i save belhat hariap. Bikhet bilong ol dispela liklik lain tasol i mekim planti skul na haus sik i pas, wok bilong rot na ol arapela projek tu i stop. Planti tisa wantaim ol wokman na meri bilong haus sik i ranawe. Na ol i no laik go bek long Goilala. Planti bagarap na stil pasin i save kamap taim ol pipel bilong wanpela hauslain i go bagarapim narapela ples. Ol lain husat i save kisim bikipela bagarap na pen oltaim em ol lapun.

Orait long dispela, ol plisman i bin holim wanpela bikipela operesen tru. Na ol pis opisa wantaim ol viles mejistret i givim han tu long dispela operesen. Ol pipel i les pinis, ol i no laikim dispela kain

pasin moa. Ol plisman i holim planti raskol wantaim ol bikhet man na kisim ol i go - em nau namba wan hap bilong bel isi na gutpela sindaun i kamap long dispela hap.

Dispela i soim klia olsem i gat rot bilong senisim ol kain bikhet pasin olsem. Planti yangpela man na meri husat i winim gutpela skul i laik helpim komyuniti. Ol i laik wok wantaim sios. Ol i laikim gutpela sindaun na bel isi pasin.

Na dispela i bin kamap ples klia taim ol yangpela sief i sanap na soim olsem ol i laikim pasin bilong gutpela sindaun na bel isi. Bihain long ol i autim tingting bilong ol, em nau komyuniti tu i kam insait na sapotim ol.

Bihain long dispela, ol i brukim ol han buai na tilim wantaim ol lain husat i kamap long bung. Ol i givim wanpela tanget diwai i go long Distrik Menesa bilong planim ausait long opis bilong em long Tapini, narapela i go long Katolik Sios bilong planim long Misin stesin na ol narapela long ol ples. Olsem bai olgeta lain inap tingim wanem samting i bin kamap long dispela de.

Ol pipel i bin givim bek wanpela sotgan na ki i go long Misin. Na wanpela karamap brus tu. Misin i askim long dispela wantaim liklik mani bikos planti samting tru i bin lus taim ol raskol i brukim haus pater. Pater Roger Purcell i bin makim Misin wantaim Bisop na kisim ol dispela samting. Bihain em i givim ol i go long Peris Pris bilong hap, Pater Duffey husat i bin karim bikipela pen tru bilong ol pasin stil na bikhet nabaut.

I tru olsem planti samting em ol raskol i bin stilim bai kam bek. Tasol pen na wari bilong dispela bai stap yet. Olsem na long ples we lo i no inap stretim hevi, pasin bilong bikipela laik na bel isi bilong God bai inap stretim wari na pen.

Na long statim dispela de, ol i bin holim bung wantaim lotu bilong lusim rong bilong wanpela na narapela na askim God long pogivim olgeta samting em i bin kamap. Long pinisim olgeta samting, olgeta pipel i bung wantaim na tilim kaikai bilong karim i go bek long komyuniti na tilim long wan wan famili.

Pasto Waresoka lusim Marimari na go wok tisa long semineri

PASTO Waresoka Guegao bilong Marimari Luteran Sios long Gordens, Mosbi bai go kamap tisa long Sinia Flierl Semineri long Lugaweng insait long Finsafen distrik bilong Morobe provins.

Pasto Guegao i bilong Kabwum long Morobe provins. Em i gat 27 krismas na i bin wok pasto long Mosbi inap long 5-pela krismas.

Pasto Waresoka i bin pinisim gret 10 bilong em long Della Salle haikul long Mosbi long 1980. Bihain Marimari Luteran Sios i salim em i go long Sinia Flierl Semineri long skul bilong kamap pasto.

Em i pinisim trening bilong wok pasto long 1986. Na em i go bek long Mosbi. Long dispela taim, em i lukautim tupela haus lotu long Mosbi. Wanpela em Papio haus lotu long 6 Mail na Marimari haus lotu long Gordens.

Tasol nau tok save i kam long het opis long Lae olsem Pasto Waresoka bai go wok tisa long olpela semineri em i bin skul long en.

Pasto i tok em i amamas tasol long dispela singaut bikos em i wok bilong God. Na God yet i singautim em long go mekim. Em i sori long lusim ol kongrigesen memba bilong em long Marimari na Papio. Tasol ol bai bung wantaim yet long pas, tok halo na prea.

Long Sande 8 Desemba, Pasto Waresoka i holim las lotu wantaim kongrigesen bilong em long Gordens. Bihain long lotu i bin gat liklik kaikai.

Siaman bilong Marimari Luteran sios, Ngayanga Kamis i tok Pasto Waresoka i bin helpim tru ol manmeri bilong tupela kongrigesen. Ol manmeri i amamas tru long wok bilong em na i amamas tu long em bai go kamap tisa.

Ngayanga i tok bai nupela pasto bai kam lukautim Marimari haus lotu long mun Jenueri. Nupela pasto em Yoba Muepe bilong Boana long Morobe provins na i stap wok nau long Popondeta.



• Pasto Waresoka wantaim meri na pikinini bilong tupela.

PLIS



RIPOT

i kam long pes 2

haus ol i kisim olgeta samting ol i painim. Ol samting olsem televisen, redio, su, kakaruk, ki bilong plis ka na paus wantaim K100 kes mani i lus tu long dispela taim.

Nau yet Wagambi i askim ol manmeri husat i save long ol dispela stilman long tokaut long ol plisman. Bikpela askim nau i go long olgeta manmeri long helpim ol plisman na holim pasim ol dispela man bikos wanpela gutpela taim ol bai kamap long ol man nating.

MADANG: Plis ripot i tok 6-pela raskal i bin mekim pasin nogut long 4-pela nes (wokmeri) bilong Madang haus sik. Dispela pasin i kamap long Fraide apinun long Yagama viles, 6 kilomita ausait long Madang taun. Ripot i tok wanpela ambulens i kisim 4-pela wokmeri i go long haus long nait na ol i painim dispela birua. Bihain long dispela pasin, olgeta wok manmeri bilong Madang haus sik i stap wok na askim helt dipatmen long lukluk long dispela hevi hariap.

Long Mande moning olgeta kamap bek gen long wok. Planti papa i joinim tu long soim kros bilong ol. Nau olgeta papa i pasim tingting na askim ol bikman bilong helt long lukluk long sekyuriti bilong ol wokmeri bilong haus sik.

Ol plisman i mekim ol wok painim aut yet long holim pasim ol dispela 6-pela man.

RABAU: Ol plisman long Rabaul i kukim 1.5 tan spak brus long kokao na Kokonat Rises Institut long Kerevat long Tunde 2 Disemba.

Ol plisman i bin stap tripela aua olgeta long lukim paia pinisim spak brus ya. Ripot i tok ol plisman i no laik long holim dispela spak brus i stap bikos em i no gutpela spak brus tumas.

Ol man bilong painim pis i bin painim dispela spak brus long Nuguria Ailan long Nu Ailan tupela wik i go pinis. Nau yet ol plisman i no holim wanpela man yet long dispela spak brus, tasol ol i mekim sampela wok painim aut yet long Papua Niugini na tu long Australia.

Roika laik rausim ol pasindia long provins

PRIMIA bilong Westen Hailans provinsal gavman i laik rausim ol manmeri i no gat wok insait long Hagen taun long neks ya.

Primia, Lucas Roika i tokim pinis ol opisa bilong em long sekim olgeta setelmen stat long mun Jenuari. Dispela em long sekim ol manmeri i no gat wok na stap nating long hap.

Primia Roika i tok ol manmeri i no gat wok i no gat gutpela as long stap long Hagen.

Dispela em wanpela rot ol provinsal memba i bin kamap wantaim long provinsal gavman kibung. Ol memba bilong Asembli i tok ol dispela hevi i kamap tu bikos long ol spak pasin. Olsem na ol i askim provinsal gavman long lukluk insait gut long dispela hevi.

Wanpela memba i tok Lika Laisensing Bod i brukim ol lo i stap pinis long pasin bilong salim bia na tu long givim laisens long salim ol bia.

Insait long lo bilong Lika Laisensing, i mas i gat tripela klap o ples bilong salim bia tasol. Husat i laik salim bia i mas kisim tok orait bilong memba bilong ol, kaunsel, sios lida, helt inspekta na asistens seketeri.

Tasol ol i no bihainim dispela pasin olsem na planti hap i salim bia insait long provins na kaikain hevi bilong lo na oda i kamap.

Westen Hailans bai kaunim vot long wanpela de

ILEKTOREL Komisina bilong Papua Niugini, Reuben Kaiulo i orait pinis long Westen Hailans i ken kaunim ol vot long wanpela de.

Em i bin tokaut tu long lo bilong eleksen long dispela taim.

Dispela bai pulim planti pipel na kosim bikpela mani. Tasol kaunim vot long wanpela de bai inap stapim ol arapela hevi bilong ileksen.

Kaiulo i tok moa long K800,000 bai lus long baim ol wokman, helikopta, ka na ol arapela samting. Planti hevi i save kamap long taim bilong ol ileksen long Hailans rijon. Olsem na em i tok wankain samting bai kamap tu long ol arapela 4-pela hailans senta.

Gavman bai baim nupela sotgan bilong Difens Fos

PAPUA Niugini Gavman nau bai baim ol nupela sotgan bilong Difens Fos (PNGDF) long Ostria, Ingran, Amerika, Indonesia na ol narapela kantri long wol.

Minista bilong Difens, Benais Sabumei i no tokaut long wanem taim bai gavman i baim ol dispela sotgan, hamas bilong kisim na wanem kos bilong ol. Tasol em i tok ol sotgan bai kisim ples bilong ol opela SLR nau Difens Fos i yusim. PNGDF i baim ol dispela sotgan long kantri Vietnam.

Em i tok PNGDF bai kisim ol dispela ol sotgan aninit long wanpela Difens Fos progrem wantaim ol narapela kantri husat i save wokim ol dispela sotgan. PNG bai

kisim ol sotgan long dinau na baim long bihain taim namel long seven na tenpela ya.

Sabumei i tok dispela em i namba wan taim tru PNG i bihainim dispela progrem. Na bai helpim Difens Fos long no ken painim hev'i taim em i skelim mani bilong en long 1992 baset.

Sabumei i tokaut tu long sampela ol nupela samting bilong PNGDF em gavman i baim pinis na i no baim yet.

Gavman i baim pinis ol nupela redio long Ingran em kos bilong ol inap olsem K5 milien. Difens Fos i putim K400,000 long neks ya baset bilong baim ol nupela ka na bot.

Ol narapela samting em PNGDF i kisim long 1989 em

4-pela Iroquois helikopta em ol sekyuriti fos i yusim long Bogenvil.

Na gavman i baim pinis 2-pela balus ol i kolim long CASA CN235 long kantri Spain long kisim ples bilong 5-pela DC - 3 nau i stap. Kos bilong tupela inap long K30 milien.

Eitin (18) pilot na enjinia bilong Difens Fos i stap nau long Spain bilong lainim long flaim na lukautim ol balus. Ol bai kisim ol balus i kam long PNG long Janueri neks ya.

Sabumei i tok gavman apim pinis namba bilong ol yanpela boi i save joinim ami long 3,050 long 1989 i go long 5,200 long 1995.

Sabumei i tok dispela bai kostim gavman sampela

mani tasol i mas kamap bikos ol hevi long Bogenvil i soim klia pinis olsem PNGDF i sot long ol soldia.

Narapela bikpela senis tu em gavman i bin kamap wantaim 10-ya divelopmen plen bilong PNG. Dispela plen i kamap long helpim Difens Fos long kamapim ol kain ami olsem ol ami bilong ol narapela kantri. Na tu PNG bai gat ol samting bilong en yet long yusim long mekim ol wok bilong en.

Nesene Eksekyutiv Kaunsil (NEC) i oraitim dispela plen long 23 Oktoba long dispela ya. Na PNGDF bai stat bihainim sampela ol samting insait long plen nau inap long ya 2000.

Make Somebody Happy This

Christmas

PICK UP THE PHONE ...

There's nothing better over the Christmas period than catching up with family and friends.

With a phone in your home, it's so easy to do. Even if your family and friends are a long way away in P.N.G or overseas, you can still talk to them on the phone. And remember, STD calls are half price between 5.30pm and 7.30am daily and all day Sunday.

You can also dial direct to your friends and family all over the world with I.D.D.

But remember that telephone network becomes very busy on Christmas day, with people sharing the Christmas spirit by phone. So avoid disappointment, make your calls before Christmas.

It's so easy to wish your friends a very Merry Christmas by phone.





Post & Telecom

Keeping you in touch at Christmas.

022

Moa Yugoslavia pipel dai taim bel isi i laik kamap

WANPELA soldia bilong Yugoslavia i bin go long Osi-jek taun na kilim moa long 4-pela man. Wanpela niuspepa bilong Kroasia i tokaut long dispela hevi. Dispela birua i bin kamap bihain long toktok bilong bel isi long Sairrus.

Olpela Seketeri bilong Amerika, Mista Vance i bin kamap long Yugoslavia na traim bungim ol ami bilong Kroasia, Sebia na Yugoslavia. Na toktok long wok bilong ol manmeri husat

bai traim na bringim bel isi long ol arapela hap.

Seketeri Jenerel bilong Yunaited Nesens (UN), Javier Perez de Cuellar i tok moa long 10,000 soldia bai wok long lukautim eria we hevi i stap long en. Tasol Yunaited Nesens bai yusim moa long A\$200 milien long mekim dispela wok.

Dispela em i namba wan taim Yunaited Nesens i salim moa long 10,000 soldia long mekim dispela wok. Yunait-

ed Nesens i mekim wok bilong bel isi stat long las wik Sande.

Ol arapela samting we Yuropien Ekonomik Komyuniti i toktok long en i no kamap. Nau yet i no gat samting bai stapim ol man long kilim ol arapela manmeri nating. Bikpela pait i stap yet na ol man i wok long kilim ol arapela man taim Kroasia i kisim independens long Yugoslavia long stat bilong mun Jun long dispela yia, 1991.



• Ol meri ya long Peru em man bilong ol i dai pinis. Ol i bung long patrol na lukautim ol yet bikos long pait namel long gavman na ol grup nambaut husat i egensim gavman, na bagarapim fridom bilong ol gen.



• Wanpela Amerika i lukautim masin gan long Kroasia egensim Sebia, Yurop. Dispela em bikpela pait stret long laip bilong ol.



• Ol soldia bilong Sebia i putim was klostu long Vukovar taun em i bin bagarap pinis long Fonde Novemba 29. Ol i pait egensim ol paitman bilong Kroasia.



• Wanpela wasman i lukautim Khieu Samphan (olpela lida bilong Khmer Rouge) bihain long ol yut o protes na bagarapim em. Em i go bek long kantri bihain long nupela gavman i rausim em long 13 yia olgeta.

Ol pipel i stap prea taim ami bilong Indonesia i sutim ol i dai

GAVANA bilong Is Timor i tok ol ami bilong Indonesia i kilim planti manmeri long Is Timor. Namba bilong ol manmeri i dai i winim pinis namba ol ami i tokaut long en. Gavna i tok ol dispela man i bin prea i stap taim birua ya i kamap. "Namba bilong ol manmeri husat i dai i stap namel long 50 na 100."

Dispela namba i kamap taim Mario Viegas i tokaut long en. Viegas em i namba wan opisa bilong Indonesia long toktok agensim ol ami long wanem samting i kamap long Santa Krua matmat long 12 Novemba, 1991.

Ol ami i tok 19 man i dai taim pait i kamap long dispela taim. Ol arapela ripot i tok i no gat man i save olsem dispela pait bai kamap.

Long dispela as na namba bilong ol manmeri i dai i go antap long 180. Gavana i tok em yet i bin lukim wanpela ka i pulap long ol daiman bihain long pait ya.

Em i tok namba bilong ol man i dai i moa long 180. Gavana i tok em bai pinis long wok bilong em sapos gavman i no tukluk na painimaut hariap long amas manmeri i bin dai long dispela taim.

Yuropien Komyuniti i joinim pinis ol arapela kantri na askim Indonesia long larim wok painimaut i kamap.

Moa long 12-pela Foren minista i tok ol i givim bikpela sapat na askim Indonesia long larim wok painimaut i kamap long hevi ol i kamapim long en.

Viegas i tok olgeta katres bilong sotgan i pundaun insait long matmat. Em i tok long wankain taim bilong dispela birua i kamap, ol i bin stap long matmat. Bihain ol ami i kamap na mekim olsem. Nau yet Gavana i kros long wanpela ami grup husat i hait na mekim kain pasin olsem.

Em i tok ol dispela ami tasol i bin kamapim bel hevi long las yia. Nau ol yet i kamap gen na mekim wankain pasin long dispela yia. Ami bilong Is Timor nau i bruk long tupela hap.

Sampela i laik stretim dispela hevi hariap.

Viegas i tok Brigidia Jenerel Rudoff Warouw bilong dispela ami i bin stap tu taim birua i kamap.


THE trukai WINNERS!

Six GOLD, Eight Silver and Four
Bronze medals to our PNG
Weightlifters in the SP Games.

What a team!

Congratulations to:

Paul Enuke, Andrew Bolong,
Bob Siape, Willie Tokana,
Wilson Tokana, K. Leai,
Roger Token, Lisimoni Kami.



Trukai Rice gets results!

Kros bilong Saut Afrika inap kamapim ol hevi

NAU yet ol blak na wait pipel bilong Saut Afrika i laik stap wantaim.

Tasol wanpela bikpela hevi i kamap gen taim ol waitmeri kisim nem bilong Saut Afrika long resis bilong Mis Wol. Long toktok bilong dispela hevi planti man i lukluk long skin bilong ol meri tasol.

Planti manmeri i komplem olsem ol waitmeri i kisim nem bilong Saut Afrika long dispela bikpela resis. Na ol i askim long wanem rot ol jas i bihainim na makim ol waitmeri long karim nem bilong Saut Afrika.

Tilden Davis, pikinini meri bilong wanpela wait bisnis man long Johannesbek bai sanap long nem bilong Saut Afrika. Dispela em i namba wan taim bilong wanpela waitmeri long kamap long resis bilong Saut Afrika bihain long 14 yia olgeta.

Taim ol jas i makim Davis, planti blak pipel long Saut Afrika i komplem bikos ol i makim ol wait meri tasol na rausim olgeta blakmeri. Bihain long las raun bilong resis ol i makim 12-pela meri tasol. Insait long dispela 12-pela, tupela i bilong Afrika.

Planti Saut Afrika manmeri i tok, ol wait meri kisim nem bilong ol em i no gutpela pasin tumas. Bikos ol i lukdaun long ol gutpela na yangpela meri bilong Saut Afrika.

Nau yet planti i laik stapim ol oganaisa

long salim ol Afrika meri i go long Mis Wol resis. Lida bilong Afrika Nesenel Kongres (ANC), Nelson Mandela wantaim ol arapela meri long Saut Afrika tu i amamas long tingting bilong stapim ol meri Afrika long kamap long resis bilong Mis Wol.

Planti i askim husat tru i makim ol meri. "Ol wait skin na longpela nus o blakpela skin na bikpela skin long maus?" Askim ya i stap yet tasol Davis wantaim ol arapela meri husat i kisim nem bilong Saut Afrika i kamap long Johannesbek long mekim sampela wok bilong helpim ol manmeri.

Planti yangpela blakmeri bilong Johannesbek i kam bungim ol dispela 12-pela meri. Tasol ol i komplem tu long ol jas i luk daun long skin na bodi bilong ol. Julia Makgalemele, Mis Saut Afrika i bin kamap tu wantaim ol arapela yangpela meri husat i bilip olsem ol inap i stap long resis bilong Mis Wol.

Tasol planti jas i no tokaut long tingting bilong ol. Ol i bin givim sampela giaman toktok olsem dispela resis i bilong olgeta man. Oganaisa bilong dispela resis, Barbara Dunn i tok i no gat plant blakmeri i kamap long dispela resis.

Em i tok planti blakmeri i pret long kamap long dispela resis bilong wanem ol i no



• Diana Tilden-Davis, namba wan Mis Saut Afrika husat bai resis long Wol Kontes, bihain long 14 yia. Ol blek skin meri i komplem olsem ol opisal i wansait long makim wanpela wait skin meri.

bilip long ol yet long kain resis olsem. Dunn i tok planti blakmeri i yangpela na smatpela. Tasol ol i no gat save long kantri bilong ol yet na tu long ol arapela samting taim ol jas i askim ol long dispela.

Oganaisa bilong Mis Blak Saut Afrika, Leonard Smith i tok dispela giaman toktok

tasol bai inap kamapim planti hevi. Smith i tok taim resis bilong Mis Saut Afrika i stat long 1954, i no gat waitmeri i kamap long resis. Nau tupela meri i kisim nem bilong Saut Afrika long Mis Wol resis.

Tasol tupela i narakain long skin na famili bilong ol. Diana Davis em i waitmeri na Makgalemele em i blakmeri. Davis i pikinini bilong wanpela wait-

man husat i gat bikpela bisnis long Johannesbek. Makgalemele em i meri nating. Em i stap wantaim mama na papa long liklik taun bilong Soweto.

Makgalemele i bin raitim wanpela pas long lida bilong Afrika Nesenel Kongres (ANC) na askim Mandela long sekap long resis bilong Mis Saut Afrika. "Em i no stret," Makgalemele i tok.

OL LIKLIK NIUS

Malesia laikim Amerika nevi

□ **KUALA LUMPUR:** Malesia i bin tokaut long dispela wik olsem ating em bai oraitim ol woa sip bilong Amerika long kam pas long ol bris bilong en. Difens minista Najib Tun Razak i tok Malesia Nevi bai kisim bikpela helpim tru sapos em i larim Amerika i kam insait. Dispela bai helpim ol wok bilong Royel Malesia Nevi bes long Lumut, Perak.

I no bia tru

□ **WELINGTON:** Kot ov Apil bilong Nu Silan i tok wanpela wain kampani bilong Australia i no inap salim wain bilong em long hap. Bikos dispela wain i kamap aninit long nem Seaview Australian Champagne. Tasol samting tru em i no champagne - em wain ya.

Tambu long sotgan

□ **OTAWA:** Keneda i gat nupela lo nau bilong tambuim ol sotgan. Dispela lo i tambuim nau ol kampani long baim sotgan na pistol samting long ovasis. Na tu lo i tok ol lain husat inap holim sotgan o pistol i mas gat 18 krismas o antap.

Lo kalabusim lapun meri

□ **BELGRET:** Ol plisman i holim pinis eri bilong olpela Komunis lida bilong Albania, Enver Hoxha. Ol i sasim em long yusim pawa long nem bilong em yet wantaim stilim na paulim mani samting bilong ol pipel.

Planti wara kilim musikman long haus sik

□ **NU YOK:** Wanpelka loya bilong musikman, Andy Warhol i tok Warhol i bin dai bikos wanpela woka bilong haus sik i no lukluk na pamim planti wara tru i go insait long lewa bilong Warhol. Olsem na Andy i bin slip long haus sik i stap na dai.

Takis opis kirapim kros

□ **BELIN:** Is Jemani i tokaut pinis long wokim wanpela takis opis antap long olpela Nazi kalabus kem. Long dispela kem tasol, moa long 100,000 pipel i bin dai. Ol Juida i bin protes long dispela takis opis tasol Is Jemani i tok long go het na wokim dispela opis.



• Pikinini bilong ol pamuk meri long India i protes long Wol Aids De em India Helt Ogenaisesen i go pas long en. Ol i askim ol man long yusim kondom o gumt talm ol i prenim mama bilong ol. Long India no gat lo i tambuim ol meri long mekim pamukpasin long kism manl.

IDD TO ISRAEL

TELEPHONE NUMBER CHANGE

Telephone numbers in RISHON LEZIYON (Area Code 3) have changed, as follows:-

OLD NO. (6 DIGITS)	NEW NO. (7 DIGITS)
942XXX	9642XXX
947XXX	9647XXX

(No change in the last three digits)

For IDD calls, dial:
05 + 972 + Area Code + New No.

New Number queries:
Ring 013.

Post & Telecom
Keeping you in touch with IDD

015

Moa gret 6 na 8 drop aut mas joinim plis na ami

Dia Edita,

Mi wanpela manki Sepik. Mi laik autim wari bilong mi long dipatmen bilong Difens na Plis Fos long kantri.

Mi ting sapos tupela dipatmen ya i kisim moa manki long gret 6 na 8 skul drop aut bai i gutpela. Bikos planti bilong ol dispela manki tasol i save raun long rot na mekim trabel nambaut.

Plis na Difens Fos i no ken tingting tasol long ol saveman. Bikos ol saveman i ken wok long ol opis. Mipela ol skul drop aut tasol i ken holim ol sot gan na pait.

Arapela kantri i gat planti ami na plis bilong ol. Olsem na i gutpela olsem mipela mas i gat planti plisman na ami long PNG.

Lex Herry
WEWAK

Maski maket long Sande moning

Dia Edita,

Mi laik putim komplem bilong mi i go long Wantok niuspapa long pasin em mi lukim ol manmeri i mekim long Wau maket insait long Morobe provins.

Long olgeta Sande moning, bai ol manmeri i kam insait long maket ples na mekimsave long salim ol kaikai i stap. Dispela pasin i save kamap long olgeta taim. Mi lukim na i no gutpela tru.

I gutpela sapos ol manmeri i go long lotu pastaim na bihain ol i ken kam bek na salim ol samting long maket. O sapos ol i no save lotu, ol i ken wet inap long taim bilong lotu i pinis na go mekim maket.

Mi mekim dispela komplem bikos olgeta Sande moning bai buai maket i stat long moning taim yet i go inap long biknait tru.

Joseph J.
WAU

Tok Save i go long ol man i save salim pas i go long Wantok. Sapos yu no putim nem tru bilong yu long pas, mipela i no inap prinum leta bilong yu.

Air Niugini sasim bikpela mani tumas

Dia Edita,

Mi laik komplem i go long gavman long pe blong balus em i goap narakain tru.

Pe bilong baim Air Niugini balus na go long ol provins i bikpela tru ya. Olsem na mipela ol trangu manmeri i painim hat tru long go raun long provins bilong mipela na kam bek.

Long go long Wewak bai yu baim K180 olgeta (wan we). Hia em gutpela piksa, sapos Wewak na Kens long Australia i wankain long longwe bilong

tupela long Mosbi, mipela bai tromoi moa mani long go long Wewak. Na long go long Kens bai liklik mani tasol.

Dispela em wanpela bikpela hevi planti manmeri long kantri i bungim. Gavman i mas lukluk long dispela na daunim prais bilong tiket.

Olsem wanem yupela i laik kilim mipela tru o?

Joe Meka
MOSBI

Baim PMV bas stret long 30t

Dia Edita,

Planti taim mi lukim ol manmeri long Lae i save bikhet liklik long ol PMV bas long taun. Mi lukim ol i save kalap long bas na baim tasol 10 na 20 toea.

Dispela pasin i no gutpela tru. Bikos prais bilong ol bikpela manmeri long baim bas em 30 toea. Sapos ol liklik manki long skul i baim 20 na 10 toea em i orait.

Mi save sori tru long ol PMV bas taim ol manmeri i mekim olsem long ol. Mi save olsem ol boskru bilong bas i no save amamas long dispela.

Sapos ol boskru na papa bilong ol PMV bas i laik kotim yupela bai yupela i kisim taim long dispela.

Bikos 30 toea pe bilong bas em Trenspot Bod yet i wan bel long dispela. Seddis Waiwai LAE

Em i tru olsem ol Hailans bagarapim Godens maket

Dia Edita,

Mi wanpela manki Lufa long Isten Hailans provins. Mi laik sapotim pas bilong brata Philip Maripa bilong Mosbi.

Brata Philip i tok ol Hailans tasol i wok long bagarapim gutpela Godens maket long Mosbi.

Mi sapotim pas bilong em. Bikos mi yet i save lukim dispela na sem long kain pasin olsem. Mi bilong Hailans tu

na dispela kain pasin ol arapela Hailans i mekim long Godens maket i bagarapim gutpela nem bilong mipela.

Mi ken tok stret olsem mipela sampela i kam long Mosbi long painim wok, na bihainim lo na oda stret. Tasol ol sampela tasol husat i laik kam long pilim swit bilong taun i save mekim dispela bikhet pasin.

Mi sori tru bikos planti manmeri i laik salim kaikai long maket.

Tasol ol bikhet man olsem i save kirapim pait na bikhet pasin long bagarapim maket.

Mi ting i gutpela sapos ol kain lain olsem i mas pilim sem long pasin ya, na go bek long ples bilong ol.

Reuben Meka Botu
MOSBI

Wagambie i mas kamap Kumul kosa



Dia Edita,

Mi laik autim tingting bilong mi long PNGRFL i mas skelim. Mi laikim olsem ol nupela eksekutiv bilong PNGRFL i mas mekim stretpela wok na putim edvetismen bilong Kumul kosa.

Na tu ol i mas no ken wan sait long makim ol kosa. Mi ting man olsem John Wagambie i mas kisim dispela wok nau, na mipela i ken lukim. Mipela i les pinis long ol pipia kosa i

kosim Kumul tim na no gat kaikai i kamap.

Man olsem Skerry Palanga em taim bilong ol i pinis. Rausim ol na kisim nupela man.

Mi laik tenkim Palanga long gutpela wok bilong em. Na tu tokim em long no ken aplai gen long dispela wok. Bikos mipela i les pinis long em.

Mathew Tau
MT HAGEN

Ol Yangoru bagarapim Bulolo taun

Dia Edita,

Mi wanpela manki Morobe husat i stap long Bulolo taun.

Mi laik komplem long ol manmeri bilong Yangoru husat i save pulap tru long Fokol long Bulolo yet.

Ol i pulap tru long dispela hap na mekim planti wantok sistem nambaut long hia.

Mi lukim dispela pasin i no gutpela tru. Bikos dispela kain pasin i mekim na i gat planti trabel na raskol pasin long Bulolo taun.

Em tasol na husat i laik bekim em laik tasol.

Darea Pius Samba
BULOLO

Givim wok long ol yut

Dia Edita,

Mi wanpela manki Mendi long Sauten Hailans provins, tasol nau mi stap long Bialla taun insait long Wes Nu Briten provins.

Mi laik autim wanpela liklik wari bilong mi long samting mi lukim long gavman.

Mi save harim olsem hevi bilong lo na oda long kantri nau i wok long go antap olgeta taim.

Mi laik tokim gavman olsem wanpela as bilong dispela hevi em planti yanpela husat i kamapim ol dispela hevi i pinisim gutpela skul tasol ol i no gat wok. Olsem na ol i raun nating na mekim ol dispela kain trabel.

Mi laik askim gavman long luksave long dispela samting na traim long mekim sampela samting. Mi save olsem sapos yupela givim wok long ol, ating bai ol i stap gut na i no inap long bikhet nambaut.

David Joshua
BIALLA

No ken daunim nem Sepik

Dia Edita,

Mi wanpela meri Sepik husat i stap long Wewak taun.

Mi laik bekim pas bilong brata Jerry Taliata em i bin kamap long Wantok bilong Fonde Oktoba 31. Em i tok long ol manki Sepik i no ken werim hat bilong ol Hailans na bikhet raun long taun.

Brata mi ken tokim yu olsem yu gat wanpela rabis tingting stret. Mipela ol Sepik i no save pasim ol samting bilong mipela long arapela provins. Mipela i katim ol kafing na salim long olgeta manmeri we ol i putim long haus o opis bilong ol long bilasim ples.

Mipela ol Sepik i mekim planti

"Lapun" mas kamap gen olsem praim minista

Dia Edita,

1992 Nesenel Ilesken bai kamap klostu nau. Na mi lukim olsem kantri bilong mipela i bungim moa hevi, na mipela mas i gat wanpela gutpela nesenel lida husat i ken daunim ol dispela hevi.

Lukluk long ol samting em i wok long kamap, mi ting Pangu

samting we planti manmeri long Papua Niugini i laikim na baim.

Dispela gras kapul hat bilong ol Hailans em mipela Sepik i no kisim nating. Yupela wokim na salim. Bikos yupela i laikim mani we mipela i gat long en, na tu ol arapela i laik werim ol dispela gras kapul hat.

Mi ken tokaut long wanpela gutpela tok piksa olsem, ol Hailans manmeri i brukim biksolwara bilong Momase i kamap long Sepik long baim buai. Mipela ol Sepik i no kros long dispela.

Olsem na plis tingting gut na oihain yu opim maus bilong yu.

Hilda Huanduo
WEWAK

Pati bai rtaim gen gavman bihain long ileksen. Praim Minista Rabbie Namaliu bai winim gen sia bilong em long Kokopo.

Dispela em bai i gutpela. Tasol mi ting Pangu Pati i mas kamap nau long wanpela gutpela tok orait na makim gen lapun papa bilong mipela, Sir Michael Somare olsem

praim minista.

Mi ting Sir Michael wanpela i ken bringim dispela kantri i go bek long gutpela rot.

Mi no gat wanpela moa toktok long mekim. Tasol sapos yupela i laik bekim dispela leta, mi bai amamas tasol long lukim.

William Windua
RABAUL

Ol pipel long PNG i bungim kainkain hevi nau

Dia Edita,

Mi laik autim tingting bilong mi long ol samting i kamap nau long Papua Niugini. Mi lukim olsem kantri i bungim bikpela hevi tru nau long sait bilong politik, ekonomi na sosel.

Hia em sampela bilong ol dispela hevi:

- Prais bilong o kes krop i pundaun. Dispela i givim hat taim long ol rurel pipel long kisim mani.
- Na long sem taim prais bilong ol sevis i goap tru wantaim bilong ol kaikai long stua.

Air Niugini i apim tru prais bilong tiket. Na prais bilong ol kaikai long stua i goap moa.

- Mekim na ol wokman long siti i save painim hat nau olsem fotnait mani i save pinis long wanpela wik tasol. Na long narapela wik bai ol i strong long dinau mani.

- Na taim fotnait i kam bai ol i mas bekim dinau oltaim. Na no gat mani bilong sevim.

- Hevi bilong lo na oda i kamap bikpela. Bikos planti yangpela pipel i greduet long skul na i no gat inap wok. Na tu bikos namba bilong ol

pipel long rurel eria i kam long siti i bikpela nau. Dispela i kamapim nau ol setelmen insait long siti na taun.

- Ol meri i no gat gutpela fridom bikos ol man i petim tumas laip bilong ol. Olsem wanpela indai em i bin kamap long Hohola, Mosbi we ol raskol i kilim mama wantaim bebi insait long bel.

- Ol yangpela bilong tude i no gat rispek long ol bikpela long ples. Dispela em wanpela as we ol i no save harim tok. Na ranawe i go long taun, na joinim ol raskol

manki long setelmen insait long ol taun.

Dispela em sampela bilong planti hevi em kantri i bungim nau. Mi no save sapos gavman bilong Praim Minista Rabbie Namaliu i luksave long ol dispela samting o no gat.

Mipela ol pipel i no save long wanem samting i kamap nau. Traim lukluk i go insait long ol dispela hevi na helpim mipela.

Mathew Bendu
WEWAK



NEM: Aznt Kek
KRISMAS: 16
ADRES: Watut Valley Registered Study Centre, PO BOX 133, Bulolo, Morobe provins.
HOBIS: Raltim pas, senisim presen, swim, mekim fanl, disko, pilal soka na harim musik.
 Mi wanpela manki Watut insait Bulolo long Morobe provins na mi save skul long vokesinel senta long Bulolo. Mi laik mekim pen pren wantaim olgeta yangela meri long PNG

NEM: Roma Jack
KRISMAS: 18
ADRES: PO BOX 1896, Lae Morobe provins.
HOBIS: Laik harim lotu singsing na lukim ragbi
 Mi wanpela meri Manus na mi laik mekim pen pren wantaim ol yangpela manki husat i gat wan kain krismas olsem mi long ol ples olsem Madang, Goroka, Okapa na Rabaul. Mi bai amamas long bekim ol pas bilong yupela.

NEM: Allan Wakulee
KRISMAS: 19
ADRES: PO BOX 188, Boroko, NCD.
HOBIS: Laik pilal olgeta spot na raun long olgeta hap bilong Papua Niugini.
 Mi wanpela manki Siassi long Morobe provins na mi laik mekim pen pren wantaim ol meri long olgeta hap bilong dispela kantri.

Pilai politik bagarapim sindaun bilong ol pipel

Dia Edita,
 Mi wanpela yut. Mi laik autim dispela bikpela hevi nau i stap long kantri bilong yumi. Dispela hevi em long kain pasin ol nesenel memba bilong yumi save pilaim taim ol i sindaun long dispela Haus Tambaran (Palamen).

Tude insait long kantri bilong yumi i gat bikpela hevi stret. Na yumi i let pinis long stretim ol dispela ol hevi na planti moa i kamap yet. Na dispela bai i go yet bikos ol nesenel lida bilong yumi i no soim gutpela pasin stret long yumi long bihainim.

Bikpela na namba wan samting long laip bilong ol dispela lida em long mani, long stretim sindaun bilong ol yet. Ol i ranim bisnis bilong ol yet na long wankain taim kamap seaholda long planti ol bikpela kampani insait na ausait tu long kantri.

Ol dispela lida i kamapim pasin nogut long ol bikpela opis bilong ol yet long pasin bilong stilim mani, pamuk, wok wantaim ol raskol, wantok sistem na tu long pasin bilong kros pait namel long ol yet long kisim moa pawa.

Tasol wanpela bikpela samting ol lida i lus tingting em long tingim ol pipel, ol grasrut manmeri

bilong dispela kantri husat long vot bilong ol tasol na dispela ol lida i kamap.

Ol dispela pipel insait long ol ples na taun tu i no bin lukim wanpela senis liklik long sindaun bilong ol stat long taim yumi kisim self gavman long 1973 i kam inap nau.

Eduksesen na helt, tupela bikpela sevis long laip bilong ol pipel long ples i no sevim ol pipel gut. Bikos long sot long marasin na tu i no gat inap skul long ol wan wan eria.

Narapela samting tu i kamap bikpela insait long politik bilong yumi em long planti pati tumas. Olsem na ol tingting na toktok bilong ol lida i no save kamap planti tru.

Oposisen na gavman mas bungim han, maus na leva bilong ol long developim kantri na maski long pait tumas long ol trabel ol yet.

Gamvan bilong tude o tumora mas tingim helt, eduksen na ol sosel sevis. Gavman i mas kirapim moa wok long kamapim planti faktori, agrikalsa plantasin, pik, bulmakau o kakaru fam we ol dispela ol yanpel i ken wok long en.

Asau Billy GEREHU (MOSBI)

Yu bai i no gat sans stret ya

Dia Edita,
 Mi wanpela yangpela skulmeri bilong NGI tasol nau mi stap long Madang. Mi laik bekim pas bilong wanpela brata bilong Hailans em i bin kamap long Fonde Novemba 5, 1991. Brata ya i tok olsem ol yangpela meri long Madang i save raun nating na painim man.

Brata, mi laik tokim yu olsem maski long west-taim na toktok long raun bilong ol arapela manmeri. Yu mas tingting long wokabout bilong yu. Maski long raun na painim ol meri olsem yu no gat meri long ples bilong yu. Na taim ol meri i les long yu, bai yu kirap na mekim kain toktok long ol.

Dispela i no gutpela pasin tumas. Mi laik tok olsem sapos yu laikim meri, yu mas go long ples na painim meri long ples bilong yu yet. Brata mi laik tokim yu olsem yu bai i no gat sans long kisim ol meri bilong arapela hap.

Pas bilong yu i soim klia olsem yu wanpela lus man stret. Brata, bihain yu laik mekim komplek long ol meri orait tokaut stret long wanem hap ol dispela meri i kam long en. Na maski long kolim nating olsem ol meri.

Ulut Isamat Madang

Godens maket i mas kamap olsem "Fighting Zone"



Dia Edita,
 Mi sapotim tru sampela leta em i bin kamap long Wantok, na askim olsem Godens maket i mas kamap olsem "Fighting Zone" o ples bilong pait.
 Bikos olgeta de pait i

save kamap long dispela maket.

Mi no save sapos ol bikman bilong NCDC i luksave long dispela tu o no gat. Dispela em wanpela bikpela hevi nau long siti. Yupela i no ken pasim ai bilong

yupela na slip nating long Waigani opis.

Narapela samting em stapim ol ka long ran i go insait na maket eria. Dispela em long taim ol manmeri i lusim haus na kam ausait salim kaikai arere long rot.

Mi lukim olsem i no longtaim bai ka i kilim wanpela man long hap.

Na asua bilong dispela bai i go long NCDC.

John Winjal GODENS

Nupela lo egensim lo bilong God papa

Dia Edita,
 Mi wanpela manki Sepik tasol nau mi stap long Kimbe long Wes Nu Briten provins. Mi laik autim wari bilong mi long lo em nesenel gavman i oraitim long palamen bilong kilim ol man husat i kilim ol arapela manmeri.

Mi laik toksave long yupela gen olsem Papua Niugini em i wanpela kristen kantri. Na kilim man i dai long kilim narapela man i no gutpela pasin tumas.

God yet i ken sasim man long olgeta pasin nogut bilong graun.

Dispela em i namba 5 lo God em yet i givim long Moses long Maunten Saion. "I no ken kilim man

nating." Dispela em i wanpela bikpela lo bilong God em buk Baibel i bin tokaut klia pinis.

Planti manmeri i gat tingting bilong bekim dinau. Dispela pasin em i olsem tumbuna pasin bilong yumi.

Tasol nau yumi olgeta i save long toktok na tu olgeta lo bilong God.

Na gavman i pasim pinis lo bilong kilim man i dai i brukim pinis wanpela bikpela lo bilong God yet.

Nau mi laik askim gavman long senisim dispela lo hariap. Bikos lo bilong bekim bek bai i no inap kamapim wanpela gutpela samting.

Steven W John KIMBE

Musik man, Robin Steven klaim tingting

Dia Edita,
 Mi wanpela manki Wes Nu Briten yet. Mi laik bekim pas bilong brata ya, Linson Akai em i bin kamap long Wantok Niuspepa long Fonde Novemba 14, 1991.

Brata Akai i tok olsem mi paulim tokples singsing nambaut bilong ol man. Akai mi no wan bel long pas bilong yu ya. Olsem na mi laik klaim tingting bilong yu hariap. Nogut rabis tingting bilong yu ya i stap yet na mekim yu longlong.

Brata mi singsing long kainkain tokples long wanpela kaset. Na no ken paulim yu yet long singsing bilong mi.

Gitua na Siassi i stap long Morobe provins. Olsem na mi joinim tupela tokples wantaim.

Brata mipela ol musik manmeri i gat tingting long mekim mani. Sapos yu no gat save long musik, maski long toktok planti. Bikos yu bai paulim yu yet ya.

Akai, harim gut. Planti tokples planti man bai harim tokples bilong ol na baim kaset bilong mipela.

Dispela em i wanpela bikpela as we mipela ol musik manmeri i singim planti tokples long wanpela kaset.

Robin Steven BIALLA

Lukaut gut long ol Wabeg pipel

Dia Edita,

Mi save harim olsem ol Wabeg i save kilim ol man nating. Ol dispela manmeri ol i kilim i no mekim wanpela trabel.

Ripot i tok sampela Wabeg i kilim wanpela meri Rigo wantaim man bilong em long Gerehu. Meri ya i gat bel yet na i dai. Ripot i tok tu olsem ol Wabeg yet i kilim narapela man lsten Hailans long 4 Mail.

Mi laik tokim yupela ol arapela pipel olsem. Sapos yupela i laik go long wanpela 24 aua stua bilong ol Wabeg na lukim olsem ol i spak, maski long go. Bikos long las mun ol

i pretim wanpela man lsten Hailans long Morata long kain pasin olsem.

Dispela man lsten Hailans i go stapim ka na wokabout i go insait long stua. Na bihain ol i giaman kros long em na givim tamiok long trangu man ya, husat i stap nau long haus sik.

Long dispela as na mi laik tokim yupela ol pipel bilong arapela provins long lukautim yupela yet. Bikpela samting em no ken go baim kaikai long ol 24 aua stua bilong ol Wabeg.

Kosi Tapagea GOROKA

Ol Morobe yet mas resis long Lae open sia

Dia Edita,
 Mi wanpela Nabak long Morobe provins tasol nau mi stap long 5 Mile long Mosbi. Mi laik autim liklik wari bilong mi. Mi bin lukim na harim olsem ol lain brata bilong Hailans i stap long Lae, na tu long ol narapela provins i laik resis long ileksen long makim provins ol i stap long en.

Mi laik askim olsem ating God i givim save long ol tasol long pilai politik o olsem wanem?

Ating i gutpela sapos yupela i go bek long ples bilong yupela yet na pilai politik long bringim developmen na gutpela sevis long ples bilong yupela.

Mi lukim kain pasin olsem i save kamap long Lae. Tony Ila i

bilang Kerema tasol, em i winim sia long Lae Open. Na long taim bilong em long Palamen, em i no mekim wanpela gutpela samting i kamap long Lae.

Ol man i save tok Lae em i namba tu bikpela siti bilong Papua Niugini. Tasol i no luk olsem namba tu siti, em i luk olsem namba 10 siti ya. Olsem na long 1992

ileksen, mi laik lukim ol pikinini bilong Morobe stret i resis long Lae Open Sia.

Sapos man bilong narapela provins i sanap, bai i luk olsem toktok na bilip bilong Morobe pipel long Primia Jerry Nalau bai i no stret. Olsem na mi laikim Nalau long lukluk gut long dispela.

Sakarang Vils MOSBI

YUT bilong papua niugini

Yut i kam aninit nau long lukaut bilong nesenel gavman

GAVMAN i luksave pinis olsem sampela grup olsem bilong ol meri na yut i no save kisim gupela helpim long ol developmen i kamap insait long kantri. Olsem na long 1992 baset, gavman bai mekim olgeta samting em i ken long luksave long ol dispela grup. Fainens Minista, Paul Pora i tokaut olsem long 1992 Baset ripot bilong em. Dipatmen bilong Hom Afeas na Yut i lukautim wok bilong makim ples bilong ol pipel na grup

1992 Baset ripot bilong Fainens Minista, Paul Pora.

husat i no gat sans long stap insait long kisim helpim bilong ol developmen. Planti pipel i no gat sans long skul o stap insait long trening program. Hom Afeas dipatmen i lukautim edministresen wok bilong welfea sevis, wantaim welfea bilong ol pikinini ek, kamapim na sekim ol polisi we i karamapim wok bilong ol yut na

meri, na kamapim na lukautim Nesenel Yut Sevis. Gavman i bin lukluk moa long ol yut long 1980 i kam. Long 1979 gavman i redim wanpela mamalo bilong kirapim Nesenel Yut Kaunsil. Palamen i oraitim dispela, na long 1980 NEC i oraitim kamap bilong Nesenel Yut Muvmen Program. Long 1983 Nesenel Yut Polisi bilong Papua

Niugini i kamap, na Nesenel Yut Emploimen Plen i kisim tok orait long 1984. Wanpela Nesenel Yut Developmen Fan i bin kamap long sapotim Nesenel Yut Kaunsil. Na ol yut grup i ken aplai long kisim dinau mani, na kirapim liklik projek bilong ol. Tasol edministresen na wok bilong kirapim dispela NYMP i no kamap gut. Bikos i no

gat gupela mani rekot. Olsem na gavman i pasim dispela program long 1989. Tude Dipatmen bilong Hom Afeas na Yut i save lukautim ol dispela grup husat i painim hevi long wok insait long kantri we i bungim kain kain senis nau. Nau yet Dipatmen i gat baset bilong wan wan program, na olsem hap bilong dis-

pela esesais, na ol i luksave long 6-pela Bikpela Program. Ol dispela program em Karimaut Polisi (Policy Formulating) na Jenerel Edministresen, Lukautim na Kamapim bikpela sosel na sios wok (wantaim bilong sesosip), Mekim wok bilong ol meri i go bikpela, Kamapim bikpela wok bilong ol yut, Welfea Sevis, na Spot Edministresen, Operesen na Sapot. Long senisim NYMP, wanpela Nesenel Yut Sevis i bin kamap long


1989 na 1990, na i stat wok long 1991. Long dispela taim i kam inap nau, yut em bikpela wok nau bilong Nesenel na Provinsal Gavman. Tasol ol i luksave olsem i no gat lukaut long wok bung, olsem na NYMP i pundaun. Bihainim dispela, Palamen i oraitim "Nesenel Yut Sevis Ek, 1991" long Me 21, 1991. Dispela ek i putim wok bilong yut i kam aninit nau long lukaut bilong Nesenel Gavman.

Hohola Teknikel Trening skul sapatim yet ol yangpela yut long Mosbi wantaim moa save bilong wok kapenta

HOHOLA Teknikel Trening skul i givim gupela trening long ol yangpela bilong setelmen na Hohola eria insait long Mosbi. Dispela trening skul i bin kamap gut taim wanpela wokman bilong Jemani, Jurgen Baldes i bin kam insait long kantri long 1988. Long dispela taim Jurgen i traim long stretim wanpela olpela woksop haus nau i stap long Hohola long mekim dispela wok. Baldes Jurgen i tok taim em i go insait long dispela woksop, em i painim wanpela bras, wanpela skru draiva na hama. I no gat arapela samting bilong wok wantaim i stap long dispela taim. Jurgen i raitim pas long Yut na Hom Afeas dipatmen long helpim wantaim K42,000 na em i statim dispela trening skul. Woksop em wanpela tasol na i gat tupela hap bilong em long wok. Wanpela i gat masin bilong katim ol timba na palang nambaut, na narapela i gat masin bilong katim ol hap ain na kapa wantaim. Jurgen i tok em i laikim tru long wok wantaim ol yangpela manki. Bikos ol bai save gut long yu long dispela pasin. I gat 12-pela yangpela manki

long dispela trening skul na olgeta yia, ol i save go na husat i no painim wok i save kam bek. Ol i save wokim sampela liklik wok tu long pulim mani bilong ol. Long olgeta pe de, ol i kisim olsem K40 na K60 long wanem samting ol i wokim na salim. Sampela samting ol i save mekim em weldim ol ain, wokim toilet, babakiu plet, sikirap bilong kokonas na ol arapela moa. Jurgen i tok dispela woksop i pulap long planti samting na i ken givim bagarap long ol manki. Ol masin i stap klostu klostu na em i tingting long wokim narapela woksop gen. Masin bilong somil i ken stap long narapela na bilong mekanik long narapela. Em i tingting tu long wokim wanpela rum bilong ol manki i ken sindaun na skul long en. Dispela bai i wanpela bikpela komyuniti hol we ol yangpela i ken bung long lainim teknikel wok. Jurgen i tok em i laikim dispela wok i kamap tu long ol arapela provins. I gat tupela arapela lain bilong em husat i stap tu long Madang na long Milen Be provins long mekim wankain wok. Meri bilong Jurgen tu i lukautim wanpela grup bilong ol meri long

Hohola, klostu long woksop bilong man bilong em. Urika Baldes i gat 6-pela yangpela meri wantaim em, na ol i save lainim long kukim kaikai na samapim ol samting. Ol i save kisim helpim i kam tu long Hom Afeas dipatmen long baim ol masin na samting bilong wok wantaim. Ol meri ya i lainim long kukim ol kaikai bilong PNG stret, na bilong ovasis wantaim. Misis Baldes i tok ol i save salim ol kaikai long K2 na K4. Ol yangpela manki husat i save trening wantaim Jurgen i save kam baim ol kaikai ya. Ol meri ya i save penim tu ol samting ol manki i wokim, na tu samapim ol matres i go antap long ol sia na tebol em ol manki i wokim long woksop. Jurgen wantaim meri bilong em i bin wok wantaim ol yangpela yut long Jemani long bipo na bihain tupela i kam long PNG long mekim wankain wok i go yet. Ol soka manmeri long Mosbi i save gut tru long Jurgen. Bikos em i wanpela man husat i save go pas long ol referi long Bisini soka graun.




• Tupela yangpela boi husat i save lainim wok kapenta.

Ileksen De bilong Papua Niugini, Me - Jun 1992

Gavana Jenerel bilong Papua Niugini i tok orait long dispela taimtebol:

Givim ol Pepa bilong Vot	4 klok apinun	26 Mas, 1992
Ol Nominesen i pas	12 klok (belo)	24 Epril, 1992
Stat long Kaunim ol Vot		13 Jun, 1992
Pinis long Kaunim ol Vot		27 Jun, 1992



Authorised by
Reuben Kaiulo,
Electoral
Commissioner Papua
New Guinea

Raitim nem long baksait bilong ol poto. Na salim i kam long dispela adres:

Electoral Commissioner,
Electoral Commission
P.O. Box 5348,
Boroko,
National Capital District.

Salim tu ol negetiv bilong poto i kam.
Putim long nem bilong: Mista Michael Malabag


Buk bilong ol Kendidet long 1992 Nesenel Palamen Jenerel Ileksen i redi pinis. Yupela i ken kisim long ol Provinsal Iektorel Opisa o long Iektorel Komisin Hetkwata long Turumu Strit, Boroko.

POTO BILONG OL KENDIDET

Olgeta lain husat i laik resis long Namba 5 Nesenel Palamen Jenerel ileksen long 1992 i mas salim tupela poto i kam hariap. Dispela poto i ken kala o blak na wait tasol. Na bikpela bilong ol poto i mas wankain olsem dispela i save stap long paspot (tok orait buk bilong go long ovasis). Olgeta nominesen bai pas long 24 Epril, 1992. Olsem na salim ol poto i kam pastaim long dispela de.

Tupela pikinini save harim tok bilong mama

Melisa na Malcolm i save stap wantaim mama bilong tupela, Evetu. Papa i bin dai taim tupela i bebi yet. Mama i lukautim tupela gut tru. Na tupela i kamap gut, na i save harim tok. Gutpela samting em tupela i no save giaman. Tupela save tokaut stret long wanem samting i rong.



PNG
true life tales

Wanpela de, Melisa na Malcolm i kam long haus na amamas tru.



Mama, mama, yu we? Mitupela i gat gutpela stori.

Tasol mama bilong tupela i no amamas. Em i no gat inap mani long baim skul fi bilong tupela wantaim. Melisa na Malcolm i no amamas long bekim bilong mama.

Tupela i save olsem long go long haiskul, tupela bai lusim mama. Melisa i save driman long kamap sista long haus sik, na Malcolm i gat bikpela laik long kamap akaunten.

Bihain mama i pasim tingting long salim wanpela tasol long haiskul, na narapela bai stap long haus. Em i pasim tingting long salim Malcolm i go long haiskul, na Melisa no gat.

Em singautim tupela i kam na tokim tupela.



Ol makim mitupela wantaim long go long haiskul.

Mi no gat inap mani long salim yutupela wantaim i go long haiskul. Na narapela samting em mi wanpela bai stap sapos yutupela wantaim i go. Malcolm bai go long haiskul, na Melisa bai stap wantaim mi long haus.

Em ting olsem Malcolm bai pinisim skul, kisim wok na sapatim em wantaim Melisa. Malcolm na Melisa i no amamas, tasol tupela i orait tasol long toktok bilong mama. Malcolm i no amamas tumas long go long haiskul. Em laikim olsem em wantaim Melisa i ken stap bek long haus na lukautim mama. Tasol mama i no tok no gat long dispela.



Bihain long 15 minit samting, ol i harim nais bilong ka na ai wara i pundaun long ai bilong Melisa. Ol i putim kago bilong Malcolm i go antap long ka. Ol i tata long Malcolm na pundaun long ai bilong ol. sanap arere long rot ina ka i lus olgeta. Ai wara i



Malcolm, mama na mi bai lusim yu nau. Wanpela yia em longpela taim tumas.



Lukim yu pikinini man bilong mi, stap gut na lukautim yu yet.



Mi mas lusim tingting nau long driman bilong mi long kamap nes o sista.

Wanem samting bai kamap long Malcolm long skul. Lukim stori long narapela mun.

Bilong wanem na rokrok i no gat tel

Bipo bipo tru ol rokrok i save pren gut wantaim ol rat. Long dispela taim ol rokrok i gat tel tu.



Ol i stap na wanpela taim, Wanpela rat i tokim pren bilong em rokrok.

Hei, Forogi
"Maski long slip, nogut yumi skin dai olgeta. Yumi go raun long bus na kolim skin."

Ating em gutpela tingting, ya, Bitai!



Rokrok i orait na tupela i go long bus. Ol i raun i go na kamap long gaden bilong wanem man nem bilong em Tamagelugelu.

**YAKAYEEE
GANTING TRU!**

WEAAA!!



Rat i tokim rokrok olsem em hangre nogut pinis.

"Yumi wokabout longpela taim tru na mi hangre nau."

AIVOO, MI TUA YA!




"Bilong wanem yu toktok planti. Kaikai i pulap i stap ya."

Yumi go kisim sampela na Kaikaim



Tupela i kisim banana, taro na pitpit na mekim save long kaikai i stap.



Ol i mekim i go na ol pulap nogut tru.

Bihain rat i tokim rokrok olsem em i laik go pekpek pastaim..

Eh, BRO! YU WET PASTAIM.. MI GO PEKPEK..

OKE, YU GO, MI STAP!



Tasol em i giamanim rokrok, em i go kliaim .hul bilong em long hait.



Bihain em i kam bek na tupela i mekimsave kaikai i stap.

Ol i kaikai i stap na Tamagelugelu i kam kamap. Em i lukim gaden bilong em i bagarap tru.

"Wanpela man i stilim ol kaikai bilong mi. Man! Em bagarapim gaden bilong mi stret."



Em i lukluk raun na lukim tupela bagaros . Em i no wet, Em i kisim naip bilong em na raunim tupela..

tasol stilim kaikai bilong mi, ah?"



Tupela pren ya i lusim kaikai i stap na painim ples hait.

LAKI STRET, YA!




ANA! YU PINIS



Tasol turangu rokrok i no gat ples long hait. Em suvim het bilong em insait long sampela bus na slip i stap.

Tamagelugelu i kamap stret na planim naip long baksait bilong em. Em i rausim sampela as bilong rokrok na tu tel bilong em.

Olsem na nau mipela ol rokrok i no gat tel nau long tude.



15 yut i greduet long Oliguti Trening Senta long Lufa

SAPE METTA i raitim

OLIGUTI Trening Senta insait long Lufa distrik long Isten Hailans provins i holim namba 15 greduesen bilong em long Novemba 20.

Dispela trening skul i stap 80 kilomita ausait long Goroka taun, na planti manmeri i no klia gut long em. Ol manmeri save raun i go i kam long rot long ka o wokabaut, tasol ol i no save ting olsem em i wanpela trening skul.

Long dispela greduesen, 15 studen i pinisim trening bilong ol na kisim ol setifiket pepa bilong ol. Ol bai i go bek long ples bilong ol na yusim dispela save long mekim wok.

Olgeta yia Oliguti Trening Senta i save kisim ol manki long olgeta

provins long mekim trening long wok bilong mentenens. Ol i save skul wanpela yia na bihain pinis wantaim setifiket pepa.

Provinsal Minista bilong Hom Afeas na Yut, Alo Kukari i bin mekim ol tok-tok long dispela taim bilong greduesen. Mista Kukari i tok ol manki ya i bin kisim gutpela trening na em i bilip ol bai yusim gut dispela save long provins bilong ol.

Mista Kukari i tok i no gat arapela trening skul olsem long Isten Hailans provins na tu long kantri wantaim. Bikos dispela skul i save givim gutpela trening tru long ol wok olsem stretim wara saplai na ol arapela wankain wok.

Dispela skul em Nesenel Gavman i save givim mani long wok bilong em, na Dipatmen bilong Woks long Goroka i save ranim.



• Ol lain studen husat i greduet long dispela skul.

Woksop soim wok bilong ol disebel tisa na kodineta

OL disabel studen bilong Papua Niugini na Australia i save tingting na mekim ol samting wankain tasol.

Dispela em toktok bilong wanpela saveman bilong Australia Institut Ov Teknikel Edukesen, Mista Tony Spinks. Em i stap na wok nau wantaim Red Cross Spesel Edukesen senta long kantri.

Spinks em i bilong Dipatmen Ov Spesel Edukesen na Disabel Senta long Australia. Nau em i stap long Papua Niugini na ranim wanpela trening kos bilong ol wokman husat i wok wantaim ol disabel studen.

Chesire Hom, FODA, Papua Niugini Red Cross Sosaiti wantaim helpim bilong Kembera Institut Ov Teknikel Edukesen i givim mani long ranim dispela woksop. Moa long 19 tisa na wokman i kamap

long dispela kos i amamas long wanem samting ol i lainim.

Spinks i tok planti bilong ol dispela lain i amamas long wok bilong lukautim studen olsem. Namba wan wik bilong woksop i soim wok bilong ol tisa na ol kodineta long sampela ol prektikel wok bilong ol disabel.

Dispela i bilong lainim moa save bilong helpim ol disabel manmeri. Dispela wik Spinks bai mekim sampela wok long helpim ol studen husat i gat tingting nogut i stap long ol. Na lainim ol manki bilong Red Cross Spesel Edukesen senta long pilai musik na drama.

Nau yet Spinks i toktok wantaim sampela Oge-naisesen long Australia long developim rot bilong wok bung wantaim. Dispela i bilong wok bung wantaim bilong ol tisa bilong PNG na Australia.

No gat inap wok long ol yut - Sir Julius

PLANTI greduet bilong ol bikipela skul long dispela yia bai painim hat long kisim wok. Na hatwok bilong painim wok i ken bagarapim sol bilong ol, deputi oposisen lida, Sir Julius Chan i tok olsem long ol greduet studen bilong Hagen Teknikel Koles long las Fraide.

"Mi laik tokim yupela olsem planti bilong yupela bai wokabaut long rot na painim wok, na dispela hatwok i ken bagarapim sol bilong ypela," Sir Julius i tok.

Em i tok dispela em wanem samting o hevi i kamap long Papua Niugini tude. Na hevi ya i kamap bikipela moa nau winim bilong bipo taim moa

studen o greduet na painim olsem i no gat inap wok.

Sir Julius i tok PNG i bungim nau namba tu 10-pela yia bihain long independens. Na wanpela bikipela samting i rong we bai i hat long stretim hariap.

Sir Julius i tok tenkyu long promis bilong nesenel gavman long kamapim 30,000 nupela wok. "Tasol mi bilip ol i no tingting long ol dispela longlong rambo stail nesenel gad na mekim dispela promis," em i tok.

Em rabisim dispela aidia bilong bringim nesenel gad i kam insait long kantri. Bikos long lukluk bilong em, dispela nesenel gad bai bagarapim ol yut bilong kantri.

HIA KAIKAI KAKARUK BAIM NAU!



Lukluk insait long mekpas bilong kakaruk na painim wanpela medel i hait i stap!
NOGUT KAKARUK BILONG YU BAI WIN!



- SORI TRU TRAIM KEN
- YU WINIM A FREE CHICKEN!
- YU WINIM K1000 CASH!

- Bai yu painim wanpela olsem! Traim gen!
- Bai yu painim wanpela olsem! Karim i go long stoa na kisim prais bilong yu
- Bai yu painim wina prais. Salim i go bek long Niugini Tablebirds Pty Ltd, P.O. Box 962, Lae na bai yu kisim mani bilong yu!



□ Kanage i go long wok na meri bilong em i stap long haus. Klostu long belo na meri supim lek long longpela trausis na go saitim long maket ples i stap.

Em tromoi ai long tupela yangpela manki, na tupela i smail long em. Em tokim tupela, na tupela i bihainim em i go long haus. Ol stori i stap na Kanage pinis wok na i kam.

Meri lukim olsem na salim wanpela boi hait antap long ruf bilong haus. Na narapela i go hait aninit long bed. Kanage i kisim tingting pinis olsem meri i mas paul, na haitim sampela man long haus.

Em bikmaus nau long meri bilong em. Na meri i bekim, "Lewa tru tumas bikman antap i save, mi no stap wantaim wanpela man."

Boi husat i hait antap long ruf bilong haus ting meri bilong Kanage i autim long ples klia pinis. Hariap tru em kam ausait na poinim pinga i go aninit long bed, "I no mi tasol, man aninit tu long bed i save." Tupela wantaim i kam ausait na Kanage i raunim tupela i go ausait.

Na meri bilong Kanage i kisim gutpela penel biting stret, na wokim nupela dua i go ausait long haus.

Rex P. Nande
MADANG

□ LONG Paradise Bakery long Lae, bos i painim boi bilong kukim bred i go na no gat. Oralt em i go askim Jon, "Hel John, where is Glamon the oven boy?" Jon i laik bekim long Inglis olsem, "He went outside" tasol boi i abrus na kirap glvim, "No masta, he went autasatadel." Bos i les long askim moa na tekov i go.

N. Dick Laga,
Lae, M.P.

□ BOI Madang sindaun stori wantaim pren meri bilong em long Simbu i stap na mama bilong dispela boi i kam bungim tupela. Em kirap krosim dispela boi nogut tru na tok olsem, "Yu stap na wok long bikhet nabaut. Tumora bai yu go long ples." Boi ya i kirap na bekim, "Tasol mama....mi no kaikai hap kaukau bilong mi yet na bai yu salim mi go...."

Robin Wake,
Kalili Strit, Lae.

□ PREN bilong Kanage Paulbodi sindaun i stap long haus na lukim meri bilong em kukim kailal. Tasol i no gat abus. Olsem na em sindaun i go na kirap laik givim Inglis nau, "Yupela kukim kailal pinis na yumi bai kailal wantaim wanem propeti."

Delroy Priest,
Japs 4T2, E.S.P.

□ KANAGE go givim Sande skul long sampela pikinini na em stori long ol long wokabaut bilong Jona na bikpela pis. Em statim stori i go na long namel, boi i paul na wok long givim wankain stori tasol. Em stori olsem..."bikpela pis i karim Jona i kam olsem, na i go olsem...i kam olsem...i go olsem..." Wanpela boi i sindaun baksait i save olsem Kanage i paul long nem bilong ples na singaut "...i go long Ninive." Kanage tuhat nogut tru na kirap tok, "Em tasol stori i pinis. Yupela go nabaut nau." Kanage laik wokabaut i go na dispela boi husat i pinisim stori i ron i kam. Kanage lukim em na tok, "Sori tumbuna bilong mi, gutpela turu yu halivim mi na kolim nem bilong ples ya. Sapos no gat, sori tumas, turangu pis bai i no trautim Jona. Na yu save wanem? Jona bai stap na sting olgeta long bel bilong pis ya."

B. Avaisa,
Adcom, Eriku, Lae.

Planti gras long bodi wokim mi sem nating

LAIPLAIN

Dia Laiplain,

Mi i gat wanpela yia i stap yet long pinisim haikul. Tasol mi no tingting tumas long skul nau long wanem planti gras i kamap long bodi bilong mi.

Olgeta taim mi no save amamas. Na mi save sem tu long wokabaut long ai bilong ol wan skul bilong mi. Long wanem mi gat planti gras long bodi bilong mi. Inap

yupela painim sampela rot we mi ken rausim ol dispela gras long bodi bilong mi o no gat?

HAIRY

Dia Pren,

Mipela save olsem yu i gat dispela hevi. Na tu yu bin tingting planti long en.

Ol dokta i tokim mipela olsem planti yangpela manmeri i senis taim ol i groim gras aninit long han. Na tu long ol arapela hap bilong bodi. Nau yu lukim olsem yu i gat planti gras long bodi bilong yu.

Yu i mas save olsem, sapos ol yangpela man na meri i laik kamap bikpela man na meri, bai i gat planti senis long bodi bilong ol. Wanpela em ol gras long bodi we i no gat gras i kamap bipo (aninit long han). Ol dispela kain senis i kamap hariap long ol arapela man na meri. Na sampela bai i no inap kamap hariap.

Planti yangpela manmeri i save tingting planti long ol senis long skin bilong ol. Yu bin tingting planti long skin bilong yu bikos planti man i lukim na toktok long en.

Tasol yu i mas save olsem i no yu tasol i gat planti gras. Planti bilong ol lain olsem i save tingting long ol yet na i no save lukluk long hevi bilong ol arapela man.

Yu i no ken wari tumas long dispela senis na putim moa taim long tingting long skul bilong yu.

I gat sampela marasin i stap long stua bilong rausim ol dispela kain gras long bodi. Tasol prais bilong em i bikpela tumas. Na yu mas putim dispela marasin olgeta taim long stapim gras long gro gen.

Mi Laiplain



1992 SKUL FI SKOLASIP RESIS

"Dispela em i namba wan presen bilong krismas"

Word Publishing Kampani inap baim skul fi bilong yu long neks yia 1992. Hariap na salim planti nem i kam long adres daunbilo na yu inap winim dispela skolasip olsem krismas presen.

Las de bilong salim ol nem em long Fraide 31 Janueri, 1992 na nem bilong ol wina bai kamap long Fonde 6 Februeri, 1992.

Namba wan prais:

Skul fi bilong haikul em Word Publishing Kampani bai baim stret i go long skul.

Namba tu prais:

Skul fi bilong komyuniti skul Word Publishing Kampani bai baim stret i go long skul.

Baim wanpela niuspepa na raitim nem, edres na telipon namba long spes i stap daunbilo na salim i kam long: Skolasip Resis, PO Box 1982, Boroko, NCD.

Olgeta nem i mas i stap long niuspepa stret. Famili memba bilong ol wok manmeri bilong Word Publishing Kampani i no inap traim dispela resis.

NEM:

ADRES:

TELIPON NAMBA:



WANTOK

BISNIS long PAPUA NIUGINI

WANTOK

PRAIS!
PRAIS!

KOPRA

KOPRA Marketing Bod (CMB) i save baim kopra aninit long tripela grup. Namba wan grup em "Hot Air". Dispela em kopra i drai gut. Namba tu em "F.M.S" o (Fair Merchantable Standard). Dispela kain kopra i namel tasol. Narapela hap bilong em i nogut na narapela i gutpela. Na namba tru em "Smoke". Dispela kain kopra i no gutpela tumas.

Prais bilong kopra i pundaun long K5 long wan wan tan long Mosbi, Alotau, Lae, Madang, Wewak, Kavieng, Toboi, Kimbe na Kieta. Pe i stap olsem:

Smoke	K175
F.M.S	K177
Hot Air	K180
Prais bilong kopra long ol liklik hap i stap olsem:	
SAMARAI	Smoke K143
	F.M.S K145
	Hot Air K148
KANDRIAN na NAMATANAI	Smoke K140
	F.M.S K142
	Hot Air K145
BUKA	Smoke K139
	F.M.S K141
	Hot Air K144
FINSAFEN K135	Smoke K137
	F.M.S K140
	Hot Air K130
LORENGAU	Smoke K132
	F.M.S K132
	Hot Air
K135 KEREWA	Smoke K120
	F.M.S K122
	Hot Air K125

Prais bilong dispela wik i wankain tasol olsem bilong las wik tasol CMB i tokaut olsem sapot prais bilong dispela mun em K25.

KAKAO

PRAIS bilong drai kakao long wan wan tan long Rabaul long Mande inap long Fraide long las wik.

Mande	Tunde	Trinde	Fonde	Fraide
2/12	3/12	4/12	5/12	6/12
Pe ol baiya sasim long papa bilong fementri				
K875	K859	K877	K892	K901
Sapot prais				
K196	K196	K196	K196	K196
Prais ol papa bilong fementri i kisim				
K1,071	K1,055	K1,037	K1,088	K1,097
Sapot prais bilong kakao long dispela mun em K195.67 Dispela prais i no wankain olsem pe bilong kakao long ol narapela hap bilong kantri.				

KOPI

Pe bilong drai arabika kopi long wan wan kilogram long las wik.

Dispela i karamapim prais bilong kopi long dua bilong fektori na i no long sait bilong rot	
Kainantu	K1.05
Goroka	K0.95
Minz na Banz	K0.95
Hagen	K0.90
Lae	K0.90
Erap	K0.90
Wau/Bulolo	K0.80
Aseki	K0.85
Madang	K0.90
Is Sepik	K0.60

Ol ripot i kam long Kopi Industri Bod. Mipela i no kisim ripot bilong Mendi, Kundiawa, Aseki, Wasu, Mumeng na Wapenamanda

RABA


Pe bilong raba long dispela yia i stap namel long 40 toea na 45 toea

KADAMON

Prais bilong kadamon em A. T. Agri Ejensi Pty Ltd long Madang i tok aut long en i stap olsem; Draai long san em namel long K0.80 na K1.10. Draai long fektori em namel long \$5.50 na \$8.00. A. T. Agri i lukautim Kobum Spice em i stap long Bundi we planti ol kadamon i save kam long en.

BP PRAIS BILONG OL BENSIN

Kos long wanpela lita Ex Pump (Wantaim takis)	
Petrol	55.1 toea
Diesel	41.8 toea
Kerosin	46.6 toea



Banana pulap long Goroka: Biktaun bilong Isten Hailans, Goroka mas i gat olgeta samting ya. Hia em wanpela meri Goroka i soim bikpela rop banana em i katim long gaden, na i laik karim i go salim long Goroka maket. Poto Sape Metta.

Kopra, kakao na welpam bai wok gut wantaim ol progrem bilong Kopi Ejensi

SAM VULUM i raitim

OL nupela bisnis kopresen em gavman i laik statim long kakao, kopra na welpam bai wok gut sapos ol i no bihainim progrem bilong Kopi Developmen Ejensi (CDA) long givim sevis long ol fama.

Fil Developmen Menesa bilong nupela Kopi Industri Kopresen (CIC), Wellington Geroro i tok progrem em CDC i bihainim i kamap gut tru. Ol fama wantaim ol baya i amamas.

Geroro i tokaut long dispela long wanpela bikpela kibung em Dipatmen bilong Egrikalsa na Laipstok (DAL) i go pas long en i bin kamap long Mosbi long las wik.

Em i tok CDA em wanpela brens bilong wok kopi we i bin kamap long 1987 taim i bin gat "Coffee Leaf Rust" o sik long lip bilong kopi diwai. Ol man long bisnis i luksave olsem i mas gat wanpela grup i kamap bilong was long dispela sik.

Geroro i tok taim CDA i kamap, namba bilong kopi kantri i save kamapim i stap pastaim long 28,000 long wan wan tan long 1985 i go antap long 43,000-tan long 1989. Dispela i kamap maski sik bilong kopi i stap yet.

CDA i kisim 200 opisa insait long ol

eria bilong kopi long kamap olsem ol wokman. Wok bilong ol dispela lain i no bilong sekim tasol sik bilong kopi. tasol tokim ol smolholda fama tu long we bilong lukautim ol diwai kopi, kamapim gutpela pikinini kopi na rot bilong salim kopi bilong ol.

Geroro i tok long wankain taim, CDA i mekim ol stadi bilong en yet long painim wanem samting i gutpela na wanem samting i nogut insait na ausait tu long progrem. CDA i painim sampela nupela rot em Geroro i bilip olsem ol nupela kopresen i mas bihainim. Dispela em:

- ol nupela kopresen i mas kamap olsem kampani bilong ol yet. Dispela em bikpela samting tru na sapos ol kopresen i no bihainim bai ol i no inap long kamap gut;
- indastri wantaim gavman i mas bung na putim mani long helpim wok bilong indastri. Wanem mani ol i putim i mas bihainim prais bilong kopi. Sapos prais i go antap, sapot mani i mas go antap na wankain sapos prais i go daun;
- ol kain grup olsem Asian Developmen Beng (ADB) na ol narapela i mas helpim kopresen tu long wok bilong en;
- wanpela tok orait i mas kamap namel long kopresen na ol provins long wanem kain gutpela rot ol bai bihainim long wok,

Hailans Gol sapotim tingting bilong Stet i papa long ol samting

HIGHLANDS Gol Limited (HGL), wanpela kampani bilong painim gol long PNG i sapotim tru Maining Ekt bilong PNG. Olsem, wanem samting i stap antap long graun i bilong ol papa bilong graun tasol aninit long graun i bilong Stet.

HGL i tokaut long dispela long 1991 ripot bilong en i go long ol dairekta bilong kampani bihain long ol papa long graun bilong Maunten Kare i kot wantaim

Stet tupela taim olgeta long Maining Ekt.

Ol papa bilong graun i lus long dispela tupela taim long kot. Stet i strong tru olsem em i mas papa long olgeta gol, kopa, silva na ol narapela minerel i stap aninit long graun. Hailans Gol i tok long ripot bilong en olsem em i bilip ol papa bilong graun bai kamap gen long kot.

Ol papa bilong graun i tok wanem samting i stap antap

long graun na aninit i bilong ol wantaim. Ol i tok Stet i brukim mama lo bilong PNG taim em i givim ol gol na kopa, silva na ol narapela minerel i go long ol narapela lain. Ol i tok taim dispela i kamap, Stet i bagarapim tu ol narapela fri pawa raits bilong ol.

Long taim bilong kot, Hailans Gol Propetis Pty Limited wantaim ol narapela maining kam-

pani bilong Porgera Join Venja na PNG Semba ov Mains na Petroleum i bung na sapotim Stet long pait long dispela tingting.

Ripot bilong Hailans Gol i tok ol i bilip olsem ol pipel bai kisim gutpela helpim tru long wanem kain ol developmen i kamap long wok bilong maining taim olgeta gol, kopa, silva na ol narapela minerel i stap aninit long lukaut bilong Stet.

AVDA i tokova long ol haus long Yonki

ARONA Veli Developmen Atoriti (AVDA), kampani bilong ol papa bilong graun long Yonki Dem long Isten Hailans provins nau i tekova long ol haus bilong ol kontrakta bilong Yonki Dem long mekim ol wok bisnis.

Minista bilong Minerels na Eneji, Patterson Lowa i tok AVDA i tekova long haus bilong ol wokman bilong kontrak kampani, Hyundai husat i wokim Yonki Dem long ranim ol bisnis long en.

Lowa i tokaut long dispela long bekim ol sampela askim bilong memba bilong Kainantu, Avusi Tanao.

Em i tok Elcom i no givim ol haus long AVDA olsem hap bilong kompensesen i go long ol papa bilong graun long bagarap i kamap long envairomen olsem memba i tok.

Tanao i askim minista tu long Elcom i mas

bihainim toktok bilong en na yusim ol haus long wokim wanpela skul. Tasol Lowa i tok Elcom i no gat tingting long statim wanpela skul. Em tok AVDA i kamap long stretim rot bilong ol pipel long kamapim developmen na Elcom bai go het long wok wantaim kampani.

Tanao i askim tu sapos Lowa i save olsem 42 manmeri long ples bilong dem i dai pinis na narapela 100 i kisim bagarap nau taim dem i kamap. Em i laikim minista long askim Helt Dipatmen long painim aut na ripot long Palamen.

Lowa i tok taim ol stori bilong dispela hevi i kamap, Elcom i wok gut tru wantaim Helt Dipatmen long helpim ol pipel. Elcom i sekim wara na painimaut olsem i no gat sik taifoid long wara.

Gavman save baim K22 milien kompensesen long wan wan yia

NAMBA bilong ol wokman i kisim bagarap long wok i stap 960 long 1984 nau i go antap long 1,133 long 1990. Bikpela namba tru em long 1989 wantaim 1,326 wokman.

Opis bilong Wokas Kompensesen i tok ol i baim olsem K16 milien i go long ol man i kisim bagarap long 7-pela krismas i go pinis. Long wanpela yia, ol i save baim kompensesen long K2.2 milien. Long dispela taim em ol rekot bilong ol bikpela bagarap i bin stap

tasol long 10 pesen.

Insait long ol dispela namba bilong ol wokman i kisim bagarap long wok, tupela tasol i kamap disebel olgeta. Dispela em olsem sampela hap long bodi bilong tupela i bagarap olgeta.

Rekot i soim olsem ol lain i kamap disebel olgeta i kam long ol wok insait long konstraksen na long fetori we ol i wok wantaim ol masin.

Takim winim Mobil TV



BENNY Takin i bin stap long Sauten Hailans provins taim em i harim olsem em i winim resis bilong Mobil Ela Beach Sevis Stesin. Prais ya em bikpela kala televisen.

Takin i tok taim em i kam bek long opis, em i kirap nogut long ol wanwok i tokim em olsem em i winim dispela resis.

Long poto em Stesin menesa, Arua Rarua (raithan) i sekan long Benny Takin (lephan) na long baksait em Peter Koim, Ritel Teritori Menesa bilong Mobil Oil New Guinea.

Dispela resis bilong Mobil bai i stap tripela wik moa bikos i gat tupela kala televisen i stap yet.

Habas Bod laik wok bisnis wantaim Cairns

OL toktok i kamap pinis namel long PNG Habas Bod na Cairns Pot Atoriti long Australia long kamapim gutpela wok bung wantaim namel long Stet bilong Queensland na PNG.

Siaman bilong Habas Bod, Boiyamo Sali i bin go long Cairns las wik na bungim Siv Eksekutyutiv bilong Cairns Pot Atoriti, Bob Manning na toktok wantaim em long dispela samting.


Ol wokman nau i redim wanpela tok orait em PNG wantaim Queensland bai sainim. Insait long tok orait ol wokman i putim wanem ol samting tupela bikman i toktok long en.

Minista bilong Trensport long Queensland, David Hamill na minista bilong Trensport long PNG, Anthony Temo bai sainim dispela tok orait long neks mun.

Sali i tok olsem Cairns bai givim gutpela sevis tru long PNG bikos em i klostu.

Em i tok ol rekot bilong ol turis long bris na ples balus long Cairns i bin go antap tru.

Cairns nau i kamap olsem wanpela gutpela ples we planti ol turis bilong Australia yet, Amerika na Japan i save go long en. Na i luk olsem dispela ol turis bai kam olgeta long PNG aninit long dispela tok orait.



Man bilong wok • Holide bilong ol sampela skul manki i no stat yet tasol yanpela ya i stat pinis. Em i helpim ol papa na mama bilong em long salim kopi na painim skul fi bilong em long neks yia

Baset bilong Madang provinsal gavman bai kamap long neks wik

BEN TAUMAI i rattim

MADANG provinsal gavman i skruim provinsal baset bilong em long dispela wik i go long neks wik Mande Desemba 16.

Dispela em bikos ol ripot pepa bilong dispela baset i no stret yet.

Insait long dispela kibung, bai gavman bilong primia Andrew Ariako bai tokaut long 1992 provinsal baset. Bihain bai ol i holim vot long en we em bai i stap tupela wik olgeta.

Tasol opis bilong primia i no tokaut long namba bilong mani em ol bai kamapim long dispela baset.

Primia Ariako i tok em i no pret long tokaut long dispela baset sapos oposisen i laik kamapim vot i no gat bilip long em.

Oposisen i tingting tu long votim primia Ariako i go aut long gavman na blokim dispela baset sapos baset ya i no gutpela.

Wanpela sinia oposisen memba i tok ol bai blokim 1992 baset bilong Mista Ariako sapos ol i lukim i no stret. Na sapos ol i vot na win tripela taim orait, spika bai askim primia long risain. Dispela i kam aninit long Provinsal Konstituensi.

PE BILONG AIR NIUGINI LONG PNG TASOL

KISIM LONG I GO LONG PE BILONG	PE BILONG
	BALUS KAGO
POM Alotau	K101 K1.01
POM Daru	K117 K1.17
POM Goroka	K114 K1.14
POM Hoskins	K140 K1.40
POM Kavieng	K234 K2.34
POM Kundiawa	K113 K1.13
POM Lae	K95 K0.95
POM Madang	K129 K1.29
POM Manus	K206 K2.06
POM Mendi	K136 K1.36
POM Misima	K155 K1.55
POM Mount Hagen	K132 K1.32
POM Popondetta	K59 K0.59
POM Rabaul	K187 K1.87
POM Tabubil	K189 K1.89
POM Tari	K153 K1.53
POM Vanimo	K234 K2.34
POM Wapenamanda	K141 K1.41
POM Wewak	K180 K1.80

• I nogat ol spesel prais nau inap long neks yia.
• Ol kago em hevi abrusim 1kg bai gat pe.

Exchange Rates

PNGBC

Bank buys at:	Notes	T/T
Australia	1.3930	1.3642
USA	1.0910	1.0563
UK	0.6100	0.5864


Bank sells at:	
Australia	1.3532
UK	0.5748
USA	1.0483
Solomon Islands	2.8812
China	5.5870
Fiji	1.5288
Hong Kong	8.0850
India	26.6180
Japan	133.5600
New Zealand	1.8622
Singapore	1.7120
Switzerland	1.4500
Germany	1.6390

Gold rates (in US\$):	
per ounce	\$368.25
per gramme	\$11.84

Dinau mani Egrikalsa Beng i givim long ol provins: 1990

Provins/Rijen	Namba bilong ol dinau	Yia
Mosbi Rijen		(K'000)
Westen	33	K 168,000
Galf	27	109,000
Sentrel	180	1,118,000
Mosbi	64	1,940,000
Milen Be (1)	60	261,000
Milen Be (2)	45	919,000
Oro (1)	91	158,000
Oro (2)	11	557,000
Hagen Rijen		
Sauten Hailans	14	131,000
Westen Hailans	100	1,854,000
Enga	26	949,000
Chimbu	13	85,000
Isten Hailans	202	1,015,000
Lae Rijen		
Morobe	147	1,353,000
Madang	71	296,000
Is Sepik	72	396,000
Wes Sepik	28	190,000
Rabaut Rijen		
Manus	22	105,000
Nu Ailan	31	1,211,000
Is Nu Briten	161	1,401,000
Wes Nu Briten (1)	478	1,815,000
Wes Nu Briten (2)	62	543,000
Not Solomons	1	6,000

Kau na pik bisnis i no kisim gutpela sapot long gavman



• Kua Ereku bilong Goroka long Isten Hailans provins i laik salim dispela pik bilong em long K500. Em yet i lukautim pik na i laik salim long kisim mani. Em i no kisim helpim bilong wanpela man.

WOK bisnis bilong kau na pik i no kisim gutpela helpim na sapot tumas long kamap gut long kantri.

Na tu i no gat wok painimaut na progrem bilong kamapim rot long mekim wok bisnis bilong kau na pik i go het.

John Mandich bilong Agrikalsa na Laivstok i mekim dispela toktok long kibung bilong wok Agrikalsa long las wik.

Em i tok i no gat samting bilong yusim long mekim wok bisnis bilong kau na pik olsem na i no longtaim bai dispela bisnis bai pundaun.

Em i tok dispela wok bisnis i stap wankain 1980 i kam inap nau. Dispela wok bisnis i pundaun long 40 pesen abrusim mak em i stap long en long 1970.

Wok bisnis bilong pik i wok long go strong na i sevim 90 pesen bilong ol maket insait long kantri. Tasol i gat planti hevi insait long ol han rot bilong em. Tasol wok bisnis long kakaruk tu i kamap bikpela nau. Dispela em bihainim rot gavman i mekim long 1983 long lukautim ol kakaruk.

Mista Mandich i tok olgeta prais bilong pik na kau insait long kantri i stap olsem K55.60 milien. Dispela i bungim tu long prais bilong ol pik we ol manmeri i lukautim long ol ples.

Dispela prais i go antap bikos long gutpela wok bisnis bilong kakaruk we ol asples i kamapim insait long tupela yia nau.

Em i tok narapela hevi tu long dispela wok bisnis em long no gat sapot wantaim mani. Long dispela as dispela industri bilong Laivstok i no go bikpela. Olsem na Mista Mandich i tok strong long mekim ol samting i stap ples kli na redi long dispela wok long go gut. Sapotim tu dispela industri long wok trening na skul long mekim ol wok painimaut na rot bilong strongim dispela industri.

Em i askim long apim takis mani bilong ol mit i kam long ovasis i go antap long 1 pesen. Dispela em long sapotim wok Laivstok Developmen Fan. Plen bilong dispela Fan em long strongim wok bilong trening na skul long mekim ol wok painimaut na rot bilong strongim dispela industri.

Kol ples Goroka i swit moa na i pulap long ol kain kain samting

SAPE METTA i raitim

GOROKA taun long lsten Hailans provins em wanpela gutpela ples tru bilong olgeta manmeri i laik kam lukim o long ol lain i lusim pinis na i go na long ol manmeri i stap yet.

Mi bilong Kerema long Galp provins. Mi bin stap long Goroka taun inap 12-pela krismas olgeta na mi laikim tru. Mi lukim Goroka olsem asples bilong mi nau bikos long ol planti gutpela samting em mi raun na lukim na mi kisim long en. Ples tu i kol na i gutpela tru long olgeta lain husat i stap long en nau.

Mi bin raun long planti provins insait long Papua Niugini tasol tingting bilong mi i save pas yet long go bek long Goroka. Dispela i kamap tru bikos mi raun tasol mi save go bek yet long Goroka.

Ol arapela husat i bin lukim Goroka pinis na i go bek long

kantri o provins bilong ol i save toktok na stori yet long dispela gutpela ples.

Mi ken tingim yet long wanpela raun bilong mi long Australia long wanpela misin wokabaut long mun Januari, 1989. Mi bin go long wanpela kibung bilong lotu long wanpela wik. Dispela em long Nesanel Yunivesiti long Kenbera. Wanpela moning mi go long stua long baim sampela filim bilong kisim poto.

Insait long stua mi bungim tupela lapun meri Australia i holim ol poto bilong ol Asaro man i bilas tumbuna. Tupela i soim mi na i tok dispela em long Niugini. Mi kirap nogut tru na askim long wanem hap bilong Niugini. Lapun meri ya i laik kolim nem bilong ples tasol maus i hevi. Olsem na mi tok, Goroka na kwiktaim lapun tu i tok, Goroka. Tupela i Goroka em gutpela ples tru na tupela i laik stap yet long en. Tupela i kisim dispela poto bilong man Asaro i bilas long 1974 long



• Misium long Goroka taun.

Goroka So.

Bihain long kibung bilong lotu i pinis, mi kisim bas i go long Woolongong, wanpela taun long Kenbera yet insait long Sidni. Long dispela hap mi bungim wanpela man husat i bin wok long Goroka inap long 1970. Man ya i gat samting olsem 50 krismas na i lukim mi na askim, yu bilong PNG, na mi tok yes. Em i askim long wanem hap bilong PNG mi i kam long en. Na mi tok Goroka we mi stap na wok long en. Lapun i tok em i laikim tru dispela ples Goroka bikos em i bin stap na wok long hap bipo. Em tok em i laikim tru olgeta samting long Goroka na bikpela samting em ol meri Goroka. Olsem na mi lusim em bikos mi save olsem em bai pulim toktok yet long ol meri.

Tasol mi amamas long wanem i gat ol man bilong narapela kantri husat i stap long Goroka na i laikim tru dispela ples olsem mi tu i laikim long en.

Long Goroka yet mi bungim ol manmeri bilong narapela provins na askim ol long wanem tingting bilong ol long Goroka. Ol i save tok Goroka em gutpela ples tru bikos em i kol gut tru long ol i stap long en.

Goroka em biktaun bilong lsten Hailans provins na i gat moa long 25,000 manmeri. Em i stap namel long Asaro Veli we em groa long liklik taun i kam bikpela long 1940. Na nau em i bikpela bisnis senta bilong hailans rijon. Narapela em long Hagen. Bihain long woa, Goroka i kamap bikpela taun bikos long gutpela ples balus we ol ami bilong Amerika i wokim insait long 7-pela de.

Goroka i gat gutpela graun bilong wok egrikalsa we wok bilong kopi i kamap gut tru. Em i gat ol kaikai olsem mit bilong pik, kau, kakaruk, sipsip na meme. Dispela em bikos i gat haus kakaruk, haus bilong katim kau na pik na tu ol asples i lukautim ol

sipsip na meme bilong salim. Kotuni na Nupaha fam i save lukautim ol pis bilong salim. Dispela em long Wara Kefamo na Zogozoi 15 kilomita ausait long Goroka taun.


Pis fam long Kotuni i bin kamap 15 krismas i go pinis tasol i pun-daun gen bikos i no gat gutpela wok menesmen. Tasol nau ol asples i kirapim gen na i wok gut tru. Narapela em Nupaha pis fam we Yuropien Ekonomi Komyuniti (EEC) i statim long las yia na em i wok gut nau. Minista bilong plis, Mathias Ijape i bin opim dispela pis fam.

Tupela pis fam ya tu i gutpela hap bilong raun na lukluk long ol samting bilong bus o piknik long en. I gat ol samting bilong yusim sapos yu laik holim pati long hap. Gutpela wara bilong maunten i kam daun long waswas long dispela hap yet.

Ol gutpela kumu bilong kaikai i stap long olgeta hap. Ol skul manki bilong Kabiufa SDA haiskul i save salim ol kumu long olgeta de. Tasol i no long Sarere. Yu ken painim ol arapela gutpela kumu na prut long Goroka maket. Tro-moi K10 tasol bai yu kisim planti samting tru na i ken i stap long-pela taim moa.

Ol haus lotu i stap long Goroka i bilong Katolik sios, Luteran, Engliken, Yunaitet Sios, Baptis, SDA, Four Square, Jehova Witness, Kristen Laip Senta, Yunaitet Pentekostol na Assembly of God.

Goroka i gat tripela komyuniti skul. Wanpela long Not Goroka na tupela long Is na Wes Komyuniti skul na Intanesenel Pri skul. Taun pri skul na intanesenel pri skul wantaim Goroka Demonstration haiskul. I go antap long Not Goroka em Teknikel koles na Goroka Teachers Koles.



• Em pisin bilong raun long nait tasol - Owl. Em i gat bikpela maus na i save daunim snek, rokrok na rat.

Wes Irian famili kam sindaun long Wes Sepik inap long 300 yia nau

ARI HABA i raitim

OL lain tumbuna bilong Hababuk long ples Yako insait long Wes Sepik provins bai amamasim 300 yia bilong ol long dispela yia,

Maski planti tumbuna i kamap, hevi bilong graun i stap

1991.

Wanpela lapun husat i namba tri tumbuna bilong Hababuk na i stap nau em lapun Paulus Masse Hababuk.

Lapun Paulus i tokaut

olsem tumbuna bilong ol, Pole Hababuk i bin lusim ples Tabati long Yatopa Bau long Jayapura na i kam sindaun long ples Yako, samting olsem 300 krismas nau.

Em i tok tumbuna Hababuk i kam marit long Waromo na kamapim namba wan lain pikinini. Ol lain ya

em Dowoma na Pole. Dowoma na Pole i kamapim gen namba tu lain em Aiyiprom na Pitomake.

Tumbuna Aiyiprom i kamapim namba tri lain tumbuna gen em lapun Paulus yet wantaim Masse na Mayo.

Tasol tupela brata ya i dai na Paulus wanpela

i stap nau na autim ol stori long ol nupela tumbuna. Em i lukim ol pikinini bilong em i kamap planti na kamapim planti liklik tumbuna nau. Lapun Paulus i gat 7-pela pikinini.

Olgeta i marit na kamapim moa pikinini nau.



• Lapun meri bilong Paul Masse husat i winim 62 yia pinis, na i stap laip yet.



• Papa Masse wantaim narapela tumbuna i kam long ples Tanamera. Em tu em narapela bilong ol lain Hababuk famli i go marit long Tanamera na karim em.



• Pikinini Hababuk harim ol stori bilong Hababuk em tumbuna Masse i wok long stori long em.



• Lapun Masse i wart long ol tumbuna Hababuk long Yako long bihain taim.



MUSIK na TELEVISIEN

pes 21

Nupela stail bilong Pacific Gold kamap pinis long ol boi Semitones

NEM bilong Kanai Pineri i kamap bikpela pinis insait long Papua Niugini musik.

Dispela i no long wanem, em long stail na nek bilong em long singsing. Maski em i singsing long wanem kain tok ples, stail bilong em i wankain na bihainim stret pairap bilong musik. Olsem na bikpela lain manmeri na pikinini i save laikim ol singsing na nek bilong Kanai taim em i singsing long *Barike o Shut-down Band*. Dispela em tupela biknem pawa ben bilong Rabaul long Is Nu Briten provins.

Kanal, husat i gat 25 krismas, i bilong ples Tavul long Is Nu Briten provins. Em i no bin go long wanpela bikpela skul bilong lainim musik. Olgeta dispela save bilong em long pilai gita na singsing i kamap taim em i stap liklik manki. Papa bilong em i bin gat wanpela tavem o klab long Tavul na ol pawa ben i save go pilai oltaim. Na Kanai i save sambal oltaim long ol musik ben i kam pilai.

Pairap bilong The Semitones i gat kik

Na long las mun tasol, Kanal wantaim tupela arapela gut-pren bilong em long



• Patti Doi • Donald Lessy • Kanai Pineri

Barike Band, Donald Lessy na Patti Doi i dutim wanpela kaset bilong ol yet. Ol i givim nem long dispela kaset olsem *The Semitones*. Ating em i min olsem pairap na stail bilong musik we i stap namel tasol. Kanal, Donald na Patti i bin stat katim dispela kaset long mun Me, 1991. Na wok bilong kaset i redi long las mun tasol.

Kaset bilong *The Semitones* i stap namel long nara-pela 11-pela em tupela studio bilong Pacific Gold long Mosbi (4-pela) na Rabaul (8-pela) i bin wokim.

Insait long dispela kaset bilong ol, Kanal, Donald na Patti i katim sampela singsing wantaim musik we i narakain olgeta long dispela ol i save wokim wantaim *Barike Band*. Bikos kain stail na pairap bilong musik i narakain olgeta.

Na dispela i soim tu olsem ol tripela man ya i wok long skruim yet save bilong ol long musik na studio. Ol i no laik dispela save bilong ol long musik i pinis long hia tasol. Nogat, Ol i laik go moa yet.

Wanem samting ol tripela i mekim i bihainim wanpela bikpela tingting bilong Pacific Gold nau. Na dispela em long rausim olgeta kain kain musik nabaut na lukluk strong long ol dispela lain man na meri o grup husat i gat save long musik.

Long Mosbi, dispela i stat pinis we Greg Seeto wantaim ol bol bilong em i kirapim kontrak wantaim ol musik studen bilong Creative Arts Faculty (bipo em Nesenel Ats Skul) bilong katim kaset. Na dispela em 5-pela mun tasol long nupela het opis na studio i stat katim ol kaset pinis. Foapela namba wan

kaset i redi pinis na i stap long ol stua nabaut.

Na dispela wankain samting stret i kamap long kaset bilong ol tripela ya. *The Semitones* i olsem wanpela traim kaset, nupela rot bilong musik long Pacific Gold na kain musik we i moa gutpela long ol narapela bilong bipo.

Long ol singsing insait long kaset yet, i gat 5-pela singsing long *Tok Pisin* (tupela long sait A na tripela long sait B), tripela long tok ples kuanua (olgeta long sait A) na wanpela long tok ples Indonesia (sait B).

Wanpela gut singsing tru long dispela kaset em MERI WANTOK long sait B. Dispela em i namba tri *Tok Pisin* singsing na i win tru. Em i bihainim kain stail bilong reggae musik na i gutpela bilong amamasim ol manmeri long ol disko

ples na ol klab o pati. Em i kain musik we i gat kik long en.


Tupela namba wan singsing tu bai sapotim gut tru musik bilong ol tripela *The Semitones*. Tupela singsing ya em DAKOKO na SAYANG SIPATOKAAN. Ol dispela singsing i bihainim tu reggae stail. Tasol wanpela bikpela samting

long ol em kain musik i go insait wantaim singsing.

Musik bilong tupela singsing i no kalap o bruk bruk nabaut. Nogat, Musik i bihainim tasol singsing na i go isi tasol inap long em i pinis. Na dispela i mekim tupela namba wan singsing bilong sait A i kamap gut tru.

Singsing SAYANG SIPATOKAAN i kam long wanpela tok ples bilong ol lain long Indonesia. Donald Lessy i kisim dispela singsing long papa bilong em. Ol lapun bilong

bipo i save singim dispela singsing oltaim. Na nau tu i stap yet. Dispela em wanpela hot namba long Kabui klab. Ol lapun bai autim ol gita wantaim kulele i kam ausait na givim i stap. Na ol kain lain olsem bos bilong Rabaul Pacific Gold studio, Glen Low, John Wong na Donald Lessy i save suvim het long windo i kam ausait na luksfil long ol lapun i singsing na paitim gita.



• Pius Wasi, Raymond Rangatin na Michael Assa bilong Tambaran ben i mekimsave long Waigani Spot Stadium, Mosbi long las Sarere. Stori bilong ol bai kamap long neks wik.

THURSDAY 31ST OCTOBER, 1991		FRIDAY 1ST NOVEMBER, 1991		SATURDAY 2ND NOVEMBER, 1991		SUNDAY 3RD NOVEMBER, 1991		MONDAY 4TH NOVEMBER, 1991		TUESDAY 5TH NOVEMBER, 1991		WEDNESDAY 6TH NOVEMBER, 1991																	
6.00 TEST PATTERN AND MUSIC	6.27 STATION OPEN	6.30 ITN WORLD NEWS	7.00 TODAY SHOW	9.00 STATION CLOSE	1.42 STATION RE-OPEN	1.45 MIDDAY WITH RAY MARTIN (PGR)	3.00 SESAME STREET (G)	4.00 KIDS KONA (G)	4.30 HUCKLEBERRY HOUND (G)	5.00 HOGAN'S HEROES (G)	5.27 EMTV TOKSAVE	5.29 NATIONAL EMTV NEWS BREAK	5.30 HOME AND AWAY (G)	6.00 NATIONAL EMTV NEWS	6.30 A CURRENT AFFAIR (G)	7.00 SALE OF THE CENTURY (G)	7.25 EMTV NEWS UPDATE (G)	7.30 NEIGHBOURS (G)	7.52 EMTV TOKSAVE	7.55 EMTV NEWS UPDATE	8.00 THE COSSY SHOW	8.24 EMTV NEWS UPDATE	8.29 EMTV NEWS MAGAZINE	8.30 ALL TOGETHER NOW	8.59 EMTV NEWS MAGAZINE	9.00 BEYOND 2000	10.00 BURKE'S BACKYARD (G)	10.57 MEDITATION WITH PASTOR WALO ARNI	11.00 STATION CLOSE
6.00 TEST PATTERN AND MUSIC (G)	6.27 STATION OPEN (G)	6.30 ITN WORLD NEWS (G)	7.00 TODAY SHOW (G)	9.00 STATION CLOSE (G)	1.42 STATION RE-OPEN (G)	1.45 MIDDAY WITH RAY MARTIN (PGR)	3.00 SESAME STREET (G)	4.00 BUGS BUNNY (G)	4.30 HUCKLEBERRY HOUND (G)	5.00 HOGAN'S HEROES (G)	5.27 EMTV TOKSAVE	5.29 NATIONAL EMTV NEWS BREAK (G)	5.30 HOME AND AWAY (G)	6.00 NATIONAL EMTV NEWS	6.30 A CURRENT AFFAIR (G)	7.00 SALE OF THE CENTURY (G)	7.25 EMTV NEWS UPDATE (G)	7.30 NEIGHBOURS (G)	7.52 EMTV TOKSAVE	7.55 EMTV NEWS UPDATE (G)	8.00 HEY DAD (G)	8.24 EMTV NEWS UPDATE (G)	8.29 EMTV NEWS MAGAZINE (G)	8.30 AUSTRALIA'S FUNNIEST HOME VIDEO SHOW	8.54 NATIONAL EMTV NEWS UPDATE	8.59 EMTV NEWS MAGAZINE	9.00 FRIDAY NIGHT MOVIE "Alfie Darling" (M)	10.27 MEDITATION WITH PASTOR WALO ARNI	10.30 STATION CLOSE
8.00 TEST PATTERN AND MUSIC	10.57 STATION OPEN	11.00 WIDE WORLD OF SPORTS	"1991 Australian Formula One Grand Prix"	5.00 GILLETTE	5.27 EMTV TOKSAVE	5.29 EMTV NEWS BREAK	5.30 SHARED INTERESTS	6.00 NATIONAL EMTV NEWS	6.30 HEY HEY IT'S SATURDAY (G)	8.22 EMTV TOKSAVE	8.25 EMTV NEWS UPDATE	8.30 HANNAH 50 (PGR)	"Washin' The Son"	9.29 EMTV NEWS MAGAZINE	9.30 QUIZNOKE (PGR)	10.30 THE BACKLIST SHIP IN THE BAY "My Father's Keeper"	11.27 MEDITATION	11.30 STATION CLOSE	4.00 TEST PATTERN AND MUSIC	5.27 STATION OPEN	5.30 ITN WORLD NEWS	6.00 TODAY SHOW	8.00 STATION CLOSE	1.42 STATION RE-OPEN	5.27 STATION OPEN	5.30 ITN WORLD NEWS (G)	6.00 TODAY SHOW (G)	8.00 STATION CLOSE	10.42 STATION RE-OPEN
1.45 MIDDAY WITH RAY MARTIN (PGR)	3.00 SESAME STREET (G)	4.00 KIDS KONA (G)	4.30 HUCKLEBERRY HOUND (G)	5.00 HOGAN'S HEROES (G)	"Kommandant of the Year"	5.27 EMTV TOKSAVE	5.29 EMTV NEWS BREAK	5.30 HOME AND AWAY (G)	6.00 NATIONAL EMTV NEWS	6.30 A CURRENT AFFAIR (G)	7.00 SALE OF THE CENTURY	7.25 EMTV NEWS UPDATE	7.30 NEIGHBOURS (G)	8.00 THE YOUNG DOCTORS	8.52 EMTV TOKSAVE	8.55 EMTV NEWS UPDATE	9.00 COUNTRY PRACTICE	9.54 EMTV NEWS UPDATE	9.59 EMTV NEWS MAGAZINE	10.00 21 JUMP STREET	"Return of Russel Buckins" (PGR)	10.57 MEDITATION WITH PASTOR WALO ARNI	11.00 STATION CLOSE	4.00 TEST PATTERN AND MUSIC	5.27 STATION OPEN	5.30 ITN WORLD NEWS (G)	6.00 TODAY SHOW (G)	8.00 STATION CLOSE	10.42 STATION RE-OPEN
11.00 THE 1991 MELBOURNE CUP RACE (G)	3.00 SESAME STREET (G)	4.00 FLINTSTONES FROLICS (G)	4.30 HUCKLEBERRY HOUND (G)	5.00 HOGAN'S HEROES (G)	"The Flight of the Valkyrie"	5.27 EMTV TOKSAVE	5.29 EMTV NEWS BREAK	5.30 HOME AND AWAY (G)	6.00 NATIONAL EMTV NEWS	6.30 A CURRENT AFFAIR (G)	7.00 SALE OF THE CENTURY	7.25 EMTV NEWS UPDATE (G)	7.30 NEIGHBOURS (G)	8.00 THE YOUNG DOCTORS	8.52 EMTV TOKSAVE	8.55 EMTV NEWS UPDATE	9.00 COUNTRY PRACTICE	9.54 EMTV NEWS UPDATE	9.59 EMTV NEWS MAGAZINE	10.00 21 JUMP STREET	"Return of Russel Buckins" (PGR)	10.57 MEDITATION WITH PASTOR WALO ARNI	11.00 STATION CLOSE	4.00 TEST PATTERN AND MUSIC	5.27 STATION OPEN	5.30 ITN WORLD NEWS (G)	6.00 TODAY SHOW (G)	8.00 STATION CLOSE	10.42 STATION RE-OPEN

G - General Exhibition
PGR - Parental Guidance Required
AD - Adults Only



WANTOK

NIUSPEPA BILONG OL PAPUA NIUGINI STRET

PABLIK NOTIS

Sapos yu laik advertais, teleppn 25 2500 na askim long

PH: Miri Alori - Ext. 203
Kosinto Fosagu - Ext. 216
Bonner Hui - Ext. 202
John Iagata - Ext. 215



"Mi laik ritim Baibel long olgeta de, tasol bai mi stat we?"

**Ritim Tok
Bilong God**

1992

Liklik Kalenda
Bilong Ritim Baibel
Long Olgeta Day



Mipela i wokim pinis wanpela liklik kalenda bilong helpim yu. Em i makim ritim long Baibel long olgeta de. Na em i gat spes tu bilong raitim ol apoinmen samting. Yu ken baim long Kristen buksop long hap bilong yu. Prais em i 60 toea tasol.

CHRISTIAN BOOKS MELANESIA
P.O. BOX 488, WEWAK

SPORTS
NEWSPAPER



SPORTS
NEWSPAPER
Weekend

PNG
BUSINESS
Subscription rates

12 ISSUES


PNGK20
AUSTRALIA, NEW ZEALANDK30
SINGAPORE JAPANK35
HONG KONGK42
USA, EUROPEK42

PNG BUSINESS SUBSCRIPTION NOTICE

Please send me _____ PNG Business copies for 1 year.
I enclose K _____ in payment.
PNG Business is published 12 times per year.

WRITE YOUR NAME & ADDRESS HERE

PLEASE RETURN TO: CIRCULATION DEPT.
PNG BUSINESS P.O. BOX 1982, BOROKEO, N.C.D.



TOK SAVE I KAM LONG PRAIM MINISTA RABBIE L NAMALIU, CMG, MP LONG KOT BILONG OL PIKININI (JUVENILE COURT) EKT 1991.

Kot bilong ol pikinini (Juvenile Courts) Ekt bilong 1991 we Palamen i oraitim long mun Novemba, i sut long ol bikinini krismas bilong ol i stap namel long 7 na 17 yia. Dispela i kamap bihain long ol i skelim lo bilong Sief Welfea Ekt bilon 1951. Lo bilong Welfea i glasim ol pikinini aninit long 7-pela krismas olsem ol pikinini. Ol lain aninit long 7-pela krismas i no save brukim. Na i no inap long kamap long kot bilong ol pikinini (juvenile court).

KOT BILONG PIKININI (JUVENILE COURT)

Dispela kot i kisim ples bilong olupela kot bilong ol pikinini (children's court). Bai ol i makim mejistret bilong dispela kot we em i gat gutpela skul, trening na save long kain kot olsem.

JUVENILE KOT SEVIS

Aninit long dispela kot bilong ol pikinini, bai i gat kot sevis i kamap wantaim Dairekta na ol kot opisa bilong ol pikinini.

Wok bilong ol dispela opisa em long givim sevis long dispela kot sistem bilong ol pikinini. Opisa i mas mekim ol samting i klia tu long dispela kot long pasin na wanem samting, wanem pikinini i brukim lo i bin mekim.

Dispela i gutpela na strongpela sistem na i abrusim sampela olupela pasin we planti samting em welfea opisa i save mekim.

ROT BILONG KOT

I gat ol rot bilong bihainim long kot i stap taim kot bilong ol pikinini (Juvenile Courts) i laik kamap long wanpela pikinini. Dispela em long banisim ol pikinini insait long mama lo we i karamapim ol. Na tu ol i mas save long wanem samting i kamap long ol long kot.

SAS

Kot bilong ol pikinini i givim planti rot bilong kalabus long pikinini husat i brukim. (PROBESON) Ol i ken stap aut sait na i no ken mekim trabel insait long taim kot i makim. Tasol ol i mas soim pes long plis stesin. Arapela tu em ol i ken baim sas bilong ol, mekim komyuniti wok o salim ol i go long kalabus bilong ol manki long kisim trening.

Ol dispela rot bilong kalabus i gutpela long kot i ken yusim olgeta o wanpela bilong ol long givim skul long ol liklik pikinini husat i brukim lo.

I gat gutpela rekot tu bai i stap long glasim pasin na wok bilong ol pikinini taim ol i stap long kain kalabus olsem.

Kot bilong ol pikinini (Juvenile courts) Ekt bilong 1991 i bin kamap long Palamen long 12 Novemba 1991.

Word Publishing

I go het wantaim PNG

Ol Engliken, Katolik,
Lutheran na Yunaitet
sios i amamas long
bung wantaim long
wokim ol nius



WANTOK

NIUSPEPA BILONG PAPUA NIUGINI STRET

PNG's Tok Pisin newspaper

THE TIMES

of Papua New Guinea

PNG's award winning newspaper

PNG
BUSINESS

Vol 210

Audited Distribution 3113

reporting on the business community



SPORT

Weekend

for complete sport coverage

Ol 2 milien memba bilong Engliken, Katolik,
Lutheran na Yunaitet sios i amamas long stap
olsem papa bilong dispela wok long
kamapim ol nius



SOFBAL



Ol meri Malangan i win yet na bosim lata bilong Mosbi

Rabaul Women's Softball Association Draws Season Proper - Saturday December 14th, 1991.

DIAMOND ONE (1)

Time	Fixtures	Umpires
1.45pm	Eagles vs Gazelle	Malangan
3.00	Kikila Cats 1 vs Momase	Eagles

Bye: Elcom

DIAMOND TWO (2)

Time	Fixtures	Umpires
12.30pm	Elcom 2 vs Royals	R. Masap
1.45pm	Malangan 2 vs Tarangau	Elcom
3.00pm	Kikila Cats 2 vs Raiders	Tarangau

Bye: PTC

PORT MORESBY MEN'S SOFTBALL WEEK-END DRAWS

Sunday, December 15th, 1991

Time	Fld Div	Game	UMPIRE
10.15	1 A	Malangan vs Hawks	L.Sorang/G. Talim
11.45	1 A	NGI Taubar vs Fuji	M. Pasok/I. Tovia
1.15	1 A	B/Eagles vs Chebu	P. Mesak/V. Tadigu
2.45	1 A	Gazelle vs Karanas	L. Duba/R. Misiel
4.15	1 A	Elcom vs Manolos	C. Terra/J. Gom
10.15	3 B	Gazelle vs Aviat	A. Evald/A. Moe
11.45	3 B	Malangan vs NBC	J. Gom/P. Mesak
1.15	3 B	NGI Taubar vs Fuji	A. Simitap/L. Paivu
2.45	3 B	Elcom vs Hawks	J. Avuchulas/J. Sogai
4.15	3 B	B/Eagles vs HoodSCO	L. Duba/L. Sorang
8.45	1 C	Karanas vs City Tigers	G. Talim
10.15	2 C	Chebu vs Manolos	J. Sogai
11.45	2 C	Hawks vs Don Bosco	A. Simitap
1.15	2 C	Malangan vs Royals	L. Duba
2.45	2 C	NGI Taubar vs HoodSCO	P. Mesak
4.15	2 C	Fuji vs De La Salle	C. Terra

MOSBI WIMENS SOFBAL

MALANGAN i strongim yet win bilong em long Mosbi Wimens sofbal resis bihain long raun 5 bilong 1991/92 sisen. Em i go pas nau long lata bihain long em i daunim Wantok 7-4.

Malangan i bin bet pas tasol ol Wantok meri i no larim em i skoa long tripela namba wan ining. Wantok tu i no bin skoa long tupela namba wan ining, tasol em i skoarim hariap tupela ran long namba 3 ining.

Rose Paula i mekim wanpela "bunt" na Toliman i go long namba tu bes. Bihain em i kam hom

na skoarim namba wan poin bilong Wantok. Bihain long Toliman em Bernadette Lumaris i kam hom long skoarim namba tu poin.

Malangan i lukim olsem taim bilong ol i pinis nau, na stat paia long stat bilong namba 4 ining. Vivian Pasen na Mary Passingan i kam hom na tupela tm i dro 2-2.

Narapela tupela ining em gem i kamap strong tru we no gat skoa i kamap.

Tasol ol meri Wantok i wok bung nau wantaim go pas gen bilong Toliman. Toliman na Paula i kam hom long bringim Wantok i go pas long skoa 4-2.

Long stat bilong namba 6 ining, Wantok i bungim hevi nau.

Ol meri Malangan i lukim olsem ol i ken winim dispela strongpela gem. Olsem na ol i stat long bungim pilai nau na ketsim gut ol bal. na tromoi i go i kam long ol bes.

Stail pitsa Pasen i bin aut, na ol i pilai yet wantaim tupela moa ran tasol i stap yet. I no longtaim Wantok i autim namba tu pilai bilong Malangan, na ol i gat wanpela moa pilai tasol bilong autim.

Tasol kosa bilong Malangan Joe Lumaris i gat sampela kain tingting bikos i gat sampela gutpela rana bilong em i sanap pinis long ol bes.

Em i senisim Rummery na makim strongpela beta, Dorcas Pilokos husat i betim bal strong i go stret long namba tu bes we Tadigu bilong Wantok i lukautim. Tasol Tadigu i mekim wanpela liklik asua ba Dorcas i ran i go long namba tu bes, na Passingan na Bospidik i kamap hom long joinim skoa 4-4.

Ol meri Wantok i mas putim asua long ol yet long sampela asua ol i mekim. Bikos dispela i larim tripela meri Malangan gen long kam hom na Malangan i win 7-4.

PORT MORESBY WOMEN'S SOFTBALL ASSOCIATION POINTS LADDER AS OF SATURDAY DECEMBER 7TH, 1991

A GRADE:	B GRADE:
Malangan 10	Royals 10
Wantoks 8	Hanza Bay 10
Mazda 8	Dodgers 8
Gazelle 6	Mazda 5
NGI 4	Fuji 5
Yokomo 4	UPNG 4
Fuji 4	Tarangau 4
Chebu 2	Aviat 2
United 2	Wantoks 0
Elcom 2	Medics 0
C GRADE:	D GRADE:
Yokomo 8	Royals 10
DTI 8	NGI 6
Karanas 6	Chebu 6
United 6	UPNG 6
Malangan 6	Karanas 5
Gazelle 4	Dodgers 4
Elcom 2	Aviat 2
Chevron 0	JJ Garamut 1
	B/Police 0

PORT MORESBY WOMENS SOFTBALL ASSOCIATION INCORPORATION

1991/92 SEASON - ROUND ONE DRAW
SATURDAY DECEMBER 4, 1991 - GAME SIX

Grade	Diamond One	Vs	Time	Scorer
D	Chebu	v Karanas	0900	
A	GI Gazelle	v Chebu	1030	M Moses
A	Mazda carps	v Elcom	1200	N Tokiel
A	Wantoks	v A/United	1330	M Tako
A	Fuji	v Malagan	1500	P Tonga
A	NGI	v Yokomo	1630	S Karigal
Grade	D/Two			
D	JJ Garamut	v Dodgers	0900	
C	Chevron	v DTI	1030	
C	Karanas	v Malagan	1200	
C	Yokomo	v GI Gazelle	1330	
D	Bomana Police	v UPNG	1500	
C	Elcom	v A/United	1630	
Grade	D/Three			
D	NGI	v Aviat	0900	
B	Wantoks	v Aviat	1030	
B	Hanza Bay	v Fuji	1200	
B	Medics	v Royals	1330	
B	Tarangau	v UPNG	1500	
B	Mazda Carps	v Dodgers	1630	

Royals 'D' grade - Bye



• Pilaia bilong Malangan (lephan) i givim sistl long kamap hariap long bes, na NGI pilaia i wetim bal yet long sofbal resis bilong ol man long Mosbi las wiken.



BENSON and HEDGES

Godens Yunaitet na Stone Axe: DPM mas lukaut long ol takis meri Tupela sempion bilong EPC

BARBARA TOMI i raitim

GODENS Yunaitet (man) na Stone Axe (meri) em tupela trupela sempion bilong EPC resis long Mosbi. Las wiken tupela i winim EPC taitel long namba tu yia.

Godens i winim Boroko 1-0 na Stone Axe i bagarapim sindaun bilong ol meri Misima (LSC) 2-0.

Fainal ya i bin kamap bihain long 4-pela wiken resis we ol tim i

mekimsave anit long hotpela san bilong Mosbi long Bisini ska graun.

Semi fainal bilong ol meri na kwata fainal bilong ol man i bin kamap long Sarere.

Long resis bilong ol meri, Stone Axe i soim bikpela laik long go insait long gren fainal na strongim dispela taitel em i bin winim long las yia. Olsem na em i bagarapim sindaun

bilong ol yangpela meri long Godens Yunaitet 2-0. Na LSC i autim tiket bilong Dodoegu.

Semi fainal bilong ol man i kamap namel long Godens na Tamarox, na Boroko 1 i salensim Gerehu. Godens i memeim Tamarox.

Tamarox i pilai long winim namba tri ples egensim Gerehu tasol em i lus. Olsem na em i go daun moa long namba 4 ples, na Tamarox i sindaun long namba tri ples.

Long lusas kap,

Amazon Bay i givim sampela skul long Batu long resis bilong ol meri, na Dodoegu i givim gutwan long Simla.

Long presentesen Boroko Yunaitet Klap i winim "Best Marchers" prais na kisim K70.

Namba wan top skoara tropi i go long Rachael Towamwesi bilong Kula na Paul Lindsay bilong Stone Axe. Tupela wantaim i winim Jack Pidik "highest scorers" prais bilong tonamen tropi.

TAXATION i kamapim bikpela pret nau long kik bilong ol meri long Mosbi pablik sevis resis.

Long las wiken, ol meri bilong bungim takis i mekimsave stret long ol susa bilong Health husat i stap namba tu long lata nau. Maski ol i stap antap, Taxation i holim lek bilong ol i go na tupela i dro.

Long dispela na Edukesen i laki na i go pas yet long lata wantaim 10 poin. Long namba tu ples wantaim 9 poin em PTC na Health. UPNG i stap long namba tri ples wantaim 8 poin, PNGBC, DPM na Lands i stap long namba 4 ples. Ol i gat 6 poin. Na long namba 5 ples em ol susa bilong NPF husat i gat 5 poin. Olgeta arapela i kam bihain (lukim long lata).

Long kik bilong dispela wiken, Taxation bai bungim ol susa long Dipatmen bilong Pesenel Menesmen (DPM). Taxation i stap tupela poin tasol daunbilo long DPM. Na sapos

ol inap kamapim wankain gem olsem bilong las wiken egensim Health, ol bai nokim het bilong DPM long Sande apinun. Na kisim tupela poin bilong go stap wantaim DPM long 6 poin.

Tupela arapela tim bilong ol meri husat i kamapim bikpela pret tu nau long resis em Home Affairs na Lands. Ol meri Home Affairs i bin wilwilim bun bilong PNGBC, wanpela tim husat i soim pes nau long resis na i winim pinis ol top ples.

Na sapos win bilong ol meri Home Affairs egensim PNGBC long las wiken i tru, ol bai traim bagarapim gen lek bilong 'mums' NPF wantaim ol lain meri bilong em. Dispela kik bilong tupela bai kamap long Sarere bihain tasol long ol man i kik.

Lands em wanpela narapela tim bilong ol meri husat i kam antap strong tru nau. Ol i gat ol gutpela meri bilong kik stat long beklain i

i go moa long pes 27

1992 PNGFA KALENDA

31 Januari	Afiliesen fi bai pas (K1,000 wanwan asosiesen)
14 Feb	Woksop kibung bilong olgeta seketeri bai kamap long Mosbi.
15-16 Feb	AGM 1991 ripot bilong 1992 sponsasip long Mosbi.
28 Feb	Nominesen fi bilong ol meri i pas. (K300)
2-6 Mas	Rijonel kosa/referi kos (Sauten Rijon) long Mosbi
9-13 Mas	Rijonel kosa/referi kos (Hailans Rijon) long Goroka
16-20 Mas	Rijonel kosa/referi kos (Noten Rijon) long Madang
23-27 Mas	Rijonel kosa/referi kos (Ailan Rijon) long Rabaul
31 Mas	Pilaia rejistresen fi K1 na kosa/referi fi K25 bai pas.
17-20 Epril	Nesanel Wimens Sempionsip long Goroka.
30 Me-8 Jun	Osenia Wimens Sempionsip long Mosbi.
7 Jun	Jenerel Miting long Mosbi.
3 Julai	FIFA Kongres long Swisilan.
19-31 Julai	Melanesian Kap long Vanuatu.
31 Julai	PNGFA Kap niminesen fi bai pas.
19-30 Ogas	Osenia Futbol Kongres (OFC) Anda 20 long Tahiti Preliminari Kompetisen.
31 Ogas	B&H Nesanel Soka sempionsip niminesen fi bai pas.
14-16 Sep	Nesanel Referi Kos long Manus.
17-20 Sep	PNGFA Kap tonamen long Manus.
1-4 Oktoba	B&H Nesanel Soka Klap tonamen long Wabeg.
12-17 Oktoba	Olimplik Soliditeri kosa (L3) Edministresen long Mosbi.
27 Nov	AGM long Mosbi
28 Nov	Krismas kaikai, presentesen bilong gutpela pilaia long wimens, mens na junia divisen long Mosbi.



• Sofbal resis bilong ol man long Mosbi i pala long Bisini sofbal graun long las wiken. Beta bilong Malangan i laik glaman long tasim bal tasol, na ketsa bilong NGI wantaim ampaya i sambal gut tru long baksait.

NATRES bai winim Lens 2-0: Nion

OL boi Lens na NATRES bai holim pasim ai bilong ol sapota long GFC graun taim tupela i bung long Mosbi Pablik Sevan soka resis bilong dispela wiken.

Bikos ol boi bilong Lens i kam bek pinis, na ol i no laik lusim wanpela gem moa. Kosa John Mogi i tok tonamen bilong EPC i brukim ol pilaia bilong em i go nambaut. Tasol nau ol i kam bek pinis.

Long fowat lain em tupela straika, John Inu wantaim Paul Linsey bai traim long meknais long umben bilong NATRES. Long midfil em Pauline Kanamon na Simon Kaluwin bai givim gutpela sapat long ol fran lain na beklain pilaia tu wantaim.

Kona kik bilong Foster

i kam long pes 28

Long sait bilong spit, Wabianik i plenim olsem PNGBC bai traim long strongim midfil long stapim spit bilong DCA. Em i tok PNGBC bai wok hariap long bungim ol DCA pilaia taim ol i laik kisim bal na redi long tekov.

Wabianik i tokaut olsem DCA em i wanpela strongpela tim long winim. Olsem na ol tu bai lukluk long pilaim sem strongpela gem inap ful taim.

Narapela gutpela gem bilong wiken namel long NPF na Hom Afeas bai i paia moa, tasol Hom Afeas i mas strong liklik long dispela gem. Bikos tupela straika bilong NPF, John Forova na Noel Wilis bai i no inap abrusim ol sans long skoa.

Ol pilaia bilong NPF i bikpela liklik long sais. Olsem na ol bai yusim dispela sans long banisim spes bilong Hom Afeas.

Tasol ol yangpela bilong Hom Afeas olsem David Panat, Thomas Piliwas, Thomas Wangi, Albert Age, Leo Kulumbu, Steven Malai na kosa Scott Vavine i mas wokbung wantaim gut long dispela taim. Bikos NPF i winim tupela gem pinis, na i lukluk long winim wanpela moa.

Long beklain em John Majo, Billy Liwanga, Vincent Sam na Endy Malo bai sanapim strongpela banis long stapim ol fowat pilaia bilong NATRES.

John Mogi i tok olgeta hevi bilong Lens i pinis nau. Na Lens i no laik lusim wanpela moa gem. Olsem na nau em i taim bilong ol long winim ol gem i stap yet.

Tasol kosa bilong NATRES, Steven Nion i tok tim bilong em bai winim Lens 2-0 o 3-1. Bikos NATRES i no gat hevi long tim bilong em. Na ol boi bilong em i save gut long gem bilong NATRES.

Steve i tok NATRES bai win tasol sapos ol i bihainim plen bilong ol. Long fowat lain em Linus "smok balus" Kensak wantaim Charles Api bai traim long mekim nais long umben bilong Lens.

Long midfil bai Kanawi Pakop, Cromwell Qopoto na Joe Sanpos bai mekim bikpela wok long stapim ol straika bilong Lens long skoa, na tu traim long givim gutpela bal long Linus na Charles long skoa.

Long beklain bai Noan Bakop, Josuah Supra, Nathan Utakare, na John Naba bai wok hat long sevim ol sans bilong Lens. Dispela gem bai i strong, tasol kosa bilong NATRES i tok tim bilong em bai winim Lens long tupela poin.

Gem namel long Yunivesiti na Elcom em Yunivesiti bai winim sapos ol pawa lain i pilim hevi yet long gem bilong las wiken egensim PTC. Sapos Elcom i lusim tingting long dispela, na pilaim nupela gem bai em i ken winim Yunivesiti.

NA NCDC i mas strong long dispela wiken na katim telepon waia bilong ol boi PTC.

Wanem sans NCDC i kisim, em i no ken westim taim. Sapos NCDC i ken skoarim gol pastaim long PTC, em bai daunim tingting na gem bilong PTC na win.

Planti komplek tumas long Pablik Sevan soka resis

Pablik Sevan soka resis long Mosbi i kam insait long namba 6 wiken long las wik. Ol gem i stat long kamap gutpela nau.

Ating planti manmeri i kam lukim ol gem long GFC i save olsem planti bilong ol gem i gutpela moa long planti gutpela gem bilong PMSA. Wanpela samting tasol i wok long daunim ol dispela gutpela kik. Dispela em ol komplek we i wok long sut i go long ol tim olsem PTC, PNGBC, na sampela moa tim we i save yusim moa long tripela PMSA pilaia long olgeta gem.

Mi tok olsem olgeta tim i gat rait long komplek. Tasol, sapos yu lukluk gut long ol dispela komplek, ol i no gat gutpela as. Sapos wanpela tim i laik komplek olsem PNGBC i yusim planti PMSA pilaia tumas, orait ripot o komplek bilong em mas i gat:

1. Nem bilong pilaia
2. Em i putim wanem namba

siot na i pilai

3. Em i rejista long wanpela PMSA tim long 1991

4. Wanem rejistresen namba bilong em

5. Putim tu kopi bilong rejistresen wantaim sain bilong dispela pilaia yet insait long komplek.

Long dispela we, bai wanem tim i komplek mas i gat 24 0 48 aua long mekim ol wok painimaut pastaim. Pinisim olgeta wok, orait kisim komplek i kam long ol PSSA eksekutiv. Nau yet, ol komplek i flai i kam long olgeta kona. Na planti bilong ol i no gat gutpela wok painimaut.

Ol dispela kain komplek i givim moa wok long PSSA eksekutiv long go long PMSA, na traim painim as bilong ol komplek ya.

Dispela em i no wok bilong ol PSSA eksekutiv. No gat. Em i wok bilong wan wan tim i gat komplek bilong mekim. Sapos em i no karimaut ol dispela wok painimaut, PSSA eksekutiv i mas tromoi komplek bilong em i



go long pipia dram.

Mi mekim dispela tok long dispela kompetisen em i bilong ol pablik sevan. Na planti ol dispela manmeri, ol i holim ol bikpela wok insait long pablik sevis. Orait, sapos dispela em i tru, we bilong ranim soka tu i mas stap long han bilong ol wan wan klap. Na i no ken givim planti moa wok i go long ol tripela o 4-pela man i ranim PSSA.

Ranim gut ol klap

Long dispela wiken mipela bai lukim mak bilong dispela sisen. Tasol, sapos wan wan klap i autim:

1. Pilaia bilong em - PMSA pilaia no gat
2. Nem bilong ol eksekutiv

bilong klap

3. Em i gat beng akaun o no gat, na hamas mani i stap insait

4. Wanem sponsa bilong em

5. Wanem kalap yunifom em bai rejistarim wanpela PSSA

6. Tokaut long ol rot bilong bungim mani i kam insait long akaun.

Planti klap bai i no gat gutpela stori long olgeta dispela askim na sampela moa. Mi yet i gat strongpela bilip olsem ol eksekutiv bilong PSSA i mas strong tru long sekap long olgeta dispela samting, bipo ol i larim wanem tim i kam kik long PSSA.

Em i tru olsem PSSA i bilong olgeta wokman bilong gavman i kam bung na amamasim ol yet. Dispela em i orait. Tasol, wok soka long kantri i mas putim planti liklik rot o askim olsem we mi askim pinis long strongim klap.

Sapos dispela wok sekap i no stap, planti ol pilaia na edministreta bai bihainim slek we

bilong stap na kam kik tasol long Sarere o Sande. Bikos ol i bihainim slek we, tingting bilong ol tu bai slek, na dispela em i isi rot tru long bringim planti komplek pasin.

Mi mekim dispela toktok, bikos sapos klap i bin ran gut tru na olgeta samting i stret - yu lus o yu win - tingting bilong ol pilaia an edministreta em i no bilong traim painim hevi insait long narapela tim. No gat. Long traim kisim poin bihainim ol "technicality" em i pasin bilong ol tim i no redim em yet gut na i kam kik.

Olsem na mi singaut strong olsem PSSA eksekutiv i mas mekim dispela wok sekap, na traim helpim ol bikman i ran liklik klap bilong ol gut. Sapos husat man i gat hevi long mekim ol dispela wok, ating Andrew Waho i save stap long soka fil long olgeta wik - yu ken askim em long helpim yu. O no gat, yu ringim Edris long Goroka, o Patrick Longe long Hom Afeas long helpim yu.

Klia long ol meri Waliya bilong Lae soka resis long 1992 sisen

BEN TAUMAI
i raitim

OL meri Waliya bai traim long stap strong wantaim gen na pilai gut long holim bel dispela primiasip taitel em ol i bin winim.

Dispela em bikpela tingting bilong ol em tim kepten, Teri Tuliap i autim.

Ol kas meri bilong Waliya em ol nupela Kwin bilong Lae soka

resis. Ol i autim Bara 1-0 long gren fainal, em i bin kamap long tupela wik i go pinis.

Ol susa bilong "Madiyawo" provins long Balimo i win wantaim stail, na mekim nupela rekot bilong Lae soka.

Bikos dispela em i namba wan taim bilong ol long kik long Lae. Na ol i winim dispela gren fainal long han bilong wanpela tim husta i holim dispela taitel

moa long 5-pela yia long wanpela lain.

Kepten Teri Tupiap i tok "Mipela olgeta pilaia i amamas moa yet.

Na neks sisen bai mipela olgeta i traim stap wantaim long winim dispela taitel long namba tu yia."

Bipo Margaret Anio wantaim lain bilong em long Yunaitet i save holim dispela taitel inap 8-pela yia olgeta.

Ol meri i kik long dis-

pela gren fainal na win em kepten Teri Tupiap, Kay Ella, Nancy Micky, Wips Nugur, Nancy na Nailato Mulake, Grace Jeiny, Shirley na Boura Kori, Serah Iovate, Sandy na Mary Puy, Lynn Nema, na Rose Wanzin.

Long ol dispela pilaia, 7-pela i bilong Balimo, tripela i bilong Manus, tupela bilong Samarai, wanpela bilong Wes Irian na na narapela bilong Morobe.

Skoa bilong gren fainal long ol arapela junia divisen i sanap olsem: Nadzab i nekim Bumayong 4-3 long Anda 16 divisen, Nare i bagarapim sindaun blong Kawi 3-1 long Namba tu divisen, Westpac i autim Nadzab 3-1 long Namba wan divisen, na long Anda 19 em Nadzab i givim gutwan stret long Poro 3-0.



• Stall bilong EPC soka resis long las wiken. Lukim ful ripot long pes 24. Poto Misako Elemiah.

PTC i paia yet ya

OL telepon manki bilong PTC i givim bel hevi long Elcom wantaim 2-0 skoa long Mosbi Pablik Sevans soka resis long las wik (Sande Desemba 8).

Dispela em i wanpela strongpela gem bikos tupela wantaim i gat ol gutpela pilaia. Ol PTC manki bilong Gabriel Pise i kamap strong tru long dispela taim, na stapim ol manki bilong Adam Lema tupela Samar Asugum. Long ful taim em PTC i winim Elcom.

Narapela gutpela gem long Sarere i bin kamap namel long DCA na DPM. Insait long dispela gem DCA i save pinis olsem DPM i no inap pilai pilai long em. Olsem na DCA i pasim olgeta tingting pinis long ausait na givim gutwan stret long DPM 4-0.

Ol pilaia bilong DCA husat i bin pilai gut tru long dispela gem em Paul Albert long straike, Bonifas Tombiti, Bonen Tanele, Eric Petrus na golkipa, Michael Leslie.

Napolion Chapau, Moses Kimuli, David Geame

na Joab Minian i pilai strong tru long sait bilong DPM, tasol ol i no yusim gut ol sans bilong ol. Wesley Waiwai i traim long mekim sampela gutpela kik, tasol ol kik bilong em i wok long abrusim gol mak bilong DCA.

Long apinun, NPF i bungim ol haus manki bilong Hausing. Tupela i mekimsave i go i kam tasol NPF i strong tumas. Bikos NPF tu i gat ol bikpela pilaia. Na ol i pasim olgeta spes long Hausing i go insait.

NPF i bin winim namba wan gem bilong em long namba 5 raun. Na dispela i kirapim bel, na long las wik tingting bilong win i stap long het bilong NPF na em i mekim samting tru long dispela taim.

Ken Darius i strong beklain, George Lavert long midfil na John Forova wantaim Noel Wiilis long fowat. Dispela olgeta lain i bungim het wantaim na kamapim gutpela namba tu win bilong NPF.

Skoa bilong ol gem long Sarere em Taxation i sasim takis long Health 2-1, DCA i autim tiket bilong DPM 4-0, PNGBC pasim akaun bilong Hom Afeas 3-0, na NPF i mekimsave long Hausing 2-0.

1991 Mosbi Pablik Sevan soka ripot

PTC kliaim rekot nogut

**YAKAM KELO
I raitim**

MOSBI Pablik Sevans Soka Asosiesen (PSSA) i painimaut pinis olsem PTC soka tim i bihainim stret mamalo bilong PSSA.

Presiden Francis Kasau i tok em i bin kisim ol komplem i kam long ol tim olsem Edukesen, DCA na Elcom long ol pilai bilong PTC. Ol komplem i tok PTC i yusim moa long tripela pilai bilong Mosbi taun soka resis, (PMSA) long wanpela gem.

Tasol Kasau i bin mekim wok painimaut gen long nem bilong ol PTC pilai i stap pinis long PMSA long Mande Desemba 9. Em i painimaut olsem tupela pilai em oltaim ol arapela klap i save ting olsem tupela i PMSA pilai, tasol tupela i no rejista long PMSA.

Tupela pilai ya em Louis Huti na Alois Moire. Tupela i bin pilaim sampela gem long Mosbi soka sisen wantaim Guria soka klap pinis. Tasol long wok painimaut bilong PSSA presiden, Guria soka klap i no rejistaim nem bilong tupela long pilai insait long PMSA soka sisen.

Tasol Francis Kasau i tok em bai lukluk gut

yet long komplem bilong DCA. Bikos ripot pepa bilong DCA long komplem bilong em i no kamap long em na ol eksekutiv memba. Olsem na ol iken raitim gut komplem bilong ol gen bai eksekutiv i ken sekim gut dispela

hevi long gem bilong DCA na PTC.

Long dispela taim tu tresera bilong PSSA, Francis Sagalau i stap long holidayna *Wantok Niuspepa* i no inap long toktok long em.

Presiden i tok olgeta

soka na poin lata bai i stap wankain yet.

Gabriel Pise i tok long las wik Sande olsem em i bin putim Coxie Laura, James Bensusin na Hanz Gewabing husat i rejista long PMSA.



• Ol tripela ya i givim gutpela salens tru long soka resis bilong EPC tonamen long Mosbi long las wiken long ol fainol raun.

Ol meri Yuni soim laik long winim 1991 taitel egensim Edukesen

OL meri Yunivesiti i soim laik long kamap long gren fainol bilong Mosbi Pablik Sevan soka resis long dispela yia.

Las wiken ol i pilaim wanpela strongpela gem tru egensim Edukesen. Dispela gem i strong bikos tupela tim wantaim i gat stail na ol save meri bilong pilai i stap insait long tupela tim wantaim.

Long namba wan hap bilong gem, ol meri Yunivesiti i givim bikpela bel pen long Edukesen. Bikos ol i wok long kisim planti sans long mak bilong Edukesen.

Insait long 10-pela minit bilong namba wan hap, Lyna Waho i no kisim wanpela gutpela sans. Em i kisim bal ya i go na abrusim kepten bilong Edukesen, Jenny Silikava long fulbek na skoarim dispela gol.

Dispela gol i kirapim bel bilong Yunivesiti, na gem bilong em i go strong moa egensim Edukesen.

Long namba tu hap, tupela tim wantaim i kam bek taso! Yunivesiti i

no banisim gut mak na straika, Olive Boko bilong Edukesen i kisim bal i go putim stret long umben bilong Yunivesiti. Dispela i mekim na tupela tim wantaim i dro 1-1 long ful taim.

Arapela gem bilong ol meri long Sarere, Health i dro wantaim Taxation 1-1, DPM i dro wantaim DCA 1-1, Hom Afeas i nilim PNGBC 4-0, na NPF i dro wantaim Hausing 1-1.

Long Sande PTC i stapim pawa long Elcom 2-1, Praim Minista Dipatmen i lusim waia bilong NBC 2-1, Atoni Jenerel skulim ol Tisa 2-1, na Yunivesiti i holim pas wantaim Edukesen 1-1.

Insait long 6-pela raun bilong gem nau, ol meri PTC i kisim gutpela sans nau na kalap i go antap long namba 2 ples wantaim Health.

Yunivesiti tu i kamap namba 3 nau, na em bai pilai strong long winim ples insait long gren fainol. Edukesen i go pas long lata bilong ol meri yet.

DPM mas lukaut long ol takis meri

i kam long pes 25

kam antap olgeta long fowat. Midfil bilong ol i moa gutpela long ol nara-pela tim.

Las wiken ol i bin stap long 'bye' na i no kik. Na ol bai kik wantaim ol tisa meri (Teachers) long namba wan gem bilong ol meri long Sande. Dispela kik bai kamap bihain tasol long ol man (Lands) na Natural Resources (NATRES) i kik long wanpela gutpela gem bilong wiken.

Olgeta arapela tim long resis bilong ol meri i win o dro pinis na i gat poin. Wanpela tim tasol husat i no brukim kiau bilong ol yet em ol susa bilong NBC.

Na dispela wiken em i sans bilong ol lona brukim dispela kiau. Ol bai

bungim ol lain anti bilong Atoni Jenerel Opis. Pilai bilong ol meri NBC long tupela wiken nau i gutpela.

Na sapos ol inap kamapim sampela strongpela kik long taim ol i mailim umben, ating trik bilong Irene Giegre wantaim Margaret Sepi na ol meri bilong tupela inap wok.

Olsem na wankain tu long kik bilong ol man, planti gutpela kik bilong ol meri bai kamap long Sarere na Sande. Na dispela bai makim namba 7 wik resis bilong Mosbi pablik sevis soka.

Tupela Hausing tim bilong ol man na meri wantaim bai stap long 'bye' long dispela wiken.

Mulul i tok no gat mani i paul

i kam long pes 28

wan wan. Dispela em long helpim tupela long edministretiv wok inap 1992 soka sisen.

Mulul i tok opis bilong em inap long givim bikpela mani liklik long tupela asosiesen. Tasol long sem taim, ol pilai bilong Vanimo husat i kam pilai long Madang i no gat mani bilong go bek. Olsem na ol i helpim ol tu.

"Mipela i pilim olsem mipela yet masiki, mipela i helpim ol wantok pastaim. Dispela em long gutpela nem bilong soka insait long rijon, na tu long soim helpim bilong Madang provinsal gavman.


"Long dispela as na mipela i no givim tupela asosiesen ya ful mani em ol i bin askim long em.

Mipela i no tromoi mani nabaut. Sapos mipela i no bin helpim Vanimo, tupela bai kisim stret hamas mani tupela i askim long en. Tasol long neks yia, mipela bai "definitely" givim dispela helpim tupela i askim long en," Mulul i tok.

Mulul i tok dispela tokwin olsem ol i givim dispela K3,000 i go long Momase soka klap long go pilai long Mosbi em rong. Em i tok Momase tu i bin givim wanpela askim long sampela helpim i go stret long opis bilong primia. Tasol dispela askim i kam bek long opis bilong em (Mulul).

Tasol wok bilong trensterim mani i kisim longpela taim tumas, bihainim askim bilong ol. Olsem na ol i rausim narapela K2,500 na helpim Momase.

NCD PUBLIC SERVANTS SOCCER ASSOCIATION DRAWS Saturday December 14th, 1991				
No.	Time	Division	Fixture	
1	8.00	Men	PNGBC	v DCA
2	9.10	Women	PNGBC	v DCA
3	10.10	Men	NPF	v H/Affairs
4	11.20	Women	NPF	v H/Affairs
5	12.20	Men	Health	v Education
6	1.30	Women	Health	v Education
7	2.40	Women	PTC	v Prim/Mln
8	3.30	Men	PTC	v NCDC
Sunday December 15th, 1991				
1	8.00	Men	Nat/Res	v Lands
2	9.10	Women	Teachers	v Lands
3	10.10	Men	POSF	v Att/Gen
4	11.20	Women	NBC	v Att/Gen
5	12.20	Men	UPNG	v Elcom
6	1.40	Women	UPNG	v Elcom
7	2.30	Women	DPM	v Taxation
8	3.30	Men	DPM	v Taxation
Weekends Bye: Housing (Men) Housing (Women)				
Skoa bilong las wiken:				
SARERE DESEMBA 7, 1991.				
WOM	Health dro Taxation	1-1		
WOM	DPM dro DCA	1-1		
WOM	Home Affairs def PNGBC	4-0		
WOM	NPF dro NHC	1-1		
MEN	Taxation def Health	2-1		
MEN	DCA def DPM	4-0		
MEN	PNGBC def Home Affairs	3-0		
MEN	NPF def NHC	2-0		
SANDE DESEMBA 8, 1991.				
WOM	PTC def Elcom	2-1		
WOM	Pri/Min def NBC	2-1		
WOM	Teachers dro Att/Gen	1-1		
WOM	UPNG dro Education	1-1		
MEN	PTC def Elcom	2-0		
MEN	NCDC def POSF	2-0		
MEN	NATRES def Att/Gen	2-1		
MEN	Education def UPNG	1-0		



LUKIM INSAIT:

SOFBAL RIPO

• POM Wimens sofbal dro, ripot na poto ... p24

• Godens Utd na Stone Axe autim EPC taifel ... p25


• DPM lukaut long ol takis meri p25

KIRBER
wantaim
GABRIEL PISE
- PES 26

• PTC kliaim rekot nogut na bai paia yet p27

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.

K3,000 i no paul: Mulul



• Yu pilim nau! : Mama bilong Gazelle i givim gutwan stret long sait bilong meri Elcom taim tupela i bung long sofbal resis bilong ol meri long Mosbi las wiken. Long kain stall olsem na Gazelle i win 16-2. Poto Ivan Bayagau.

BEN TAUMAINA LEO WAFIWA i raitim

TUPELA soka asosisen long Madang provins (Madang taun na Madang Kantri) bai kisim helpim long sampela mani i kam long Provinsal Divisen bilong Welfea, Sosel na Spot long neks yia.

Asisten Seketeri Ivan Mulul i givim dispela toktok long bekim sampela paul komplon olsem tupela asosiesen ya i no kisim K3,000 helpim em Provinsal Eksekutiv i bin oraitim, bihainim askim bilong tupela long salim tim i go long Momase Rijonal tonamen long Vanimo, Sandaun provins long dispela yia.

Ripot i tok provinsal eksekutiv i bin oraitim dispela askim na givim K3,000 i go long Madang Soka Asosiesen na Madang Kantri Soka Asosiesen. Dispela em bihain long tonamen i sruk long Vanimo na i kam long Madang, bikos Vanimo i no gat inap haus slip bilong ol pilaia.

Tasol ol mausman bilong tupela asosiesen ya i tok ol i no kisim dispela mani yet. Presiden bilong Madang Soka Asosiesen, Peter Angasa i tok em i no laik toktok long dispela mani, tasol em i wetim yet dispela mani.

Na tresera bilong Madang Kantri Soka Asosiesen, Samai Kasau i tok ol i bin lukautim Madang Kantri sempionsip, na i gat K2,630 dinau bilong bekim. Olsem na em i laikim dispela mani hariap long baim ol referi, kuk boi na haus slip em ol i bin yusim long tonamen.

Tokwin long Madang taun i kamap

olsem wanpela sinia opisal long provinsal gavman i brukim dispela mani long salim primia tim bilong Madang Soka Asosiesen, Momase i go kik long 1991 Benson & Hedges Nesenel Klap sempionsip long Mosbi.

Mista Mulul i bekim olsem dispela tokwin i no tru, na i givim stretpela ripot long dispela samting.

Bekim bilong Mulul:

Mulul i tok em i tru olsem opis bilong em i kisim askim bilong tupela soka asosiesen ya. Tasol em i bekim olsem opis bilong em i no gat inap mani yet.

Olsem na tupela asosiesen i raitim wanpela leta i go stret long opis bilong Primia Andrew Ariako long helpim tupela. Primia i bekim olsem tupela asosiesen ya i mas raitim wanpela sabmisen bai provinsal eksekutiv i mekim tok orait long dispela.

Na long taim ol i mekim sabmisen na wetim provinsal eksekutiv long oraitim, dispela tonamen i kamap pinis long Madang. Ol i skruim long Vanimo i kam long Madang.

Tonamen tu i kamap pinis, na tu i kamap long Madang we tupela asosiesen i no inap wari long yusim dispela K3,000 long salim tim i go long Vanimo. Olsem na tupela i no kisim wanpela K3,000 sek mani we tupela bai tilim namel long tupela yet.

Mulul i tok bihain long tonamen mipela i givim liklik helpim long tupela asosiesen ya wantaim K500

i go moa long pes 27

Ol kona kik bilong Foster ken winim ol haus mani boi

B&H
BENSON and HEDGES
B&H

OL kona kik bilong DCA bai givim het pen stret long ol haus mani boi bilong PNGBC. Dispela em long taim tupela i bung long Mosbi Pablik Sevan soka resis bilong dispela wiken.

Bikos kona kik bilong ol boi DCA i bin daunim tru gutpela gem bilong olpela sempion, DPM 4-0 long las wik Sarere.

LAs wiken tupela gutpela kona kik straika Winta Foster i kam long gol mak bilong DPM, na i kamapim tupela gol long daunim ol sempion bilong las yia.

Kosa bilong DCA, Kos Umion i tok ol boi bilong em bai pilaim wan kain stail olsem bilong las wiken. Tasol ol bai traim long putim liklik moa strong i go antap long gem bilong ol. Umion i gat bilip long ol boi bilong em, tasol em i askim ol long pilai strong yet long win inap referi i winim las wisil bilong ful taim.

Long fowat lain bilong DCA em tupela straika, Paul Albert wantaim Foster yet bai wokbung wantaim long brukim banis bilong PNGBC, na skoarim gol. Foster bai yusim ol kona kik stail bilong em long salim bal i kam insait long gol eria bilong PNGBC, na Paul i ken mekimsave long laik bilong em long gol mak. Yangpela Paul em PNGBC i mas lukaut gut long em tu ya.

Long midfil em Eric Petrus na Jarvis Hoibi bai traim long strongim beklain, na long sem taim givim gutpela bal long Foster wantaim yangpela Paul long skoa.

Na long beklain em tupela kas nogut, Bonen Tanele wantaim Gedion Sakaria bai wok long sanapim strongpela banis, long haitim golkipa na umben bilong tupela.

Tasol kosa bilong PNGBC, Alois Wabianik i tok ol haus mani boi bai yusim yet wantaim stail ol i save yusim. Dispela em long yusim 4-4-2 lain ap (4-

MOSBI PABLIK SEVAN SOKA RIPO
YAKAM KELO i raitim

pela pilaia long fowat lain, 4-pela long midfil na tupela long beklain). Tingting bilong PNGBC em long strongim pilai long midfil long kamapim gutpela na strongpela banis long birua i no ken skoa.

i go moa long pes 25

MOSBI PABLIK SEVAN SOKA LATA

MEN'S DIVISION		WOMEN'S DIVISION	
Team	Points	Team	Points
PNGBC	12	Education	10
PTC	10	Health	9
DCA	9	PTC	9
DPM	9	UPNG	8
Elcom	8	DPM	6
Taxation	8	PNGBC	6
NPF	7	Lands	6
Natres	7	NPF	5
Education	6	PMD	5
NCDC	6	Elcom	4
UPNG	4	Taxation	4
Health	4	Attorney General	4
Home Affairs	3	Home Affairs	4
Lands	3	Housing	3
Housing	2	DCA	3
POSF	1	Teachers	2
Attorney General	1	NBC	0

• Dispela em poin lata bihain long gem bilong las Sarere na Sande. Dro bilong dispela wiken, na ol skoa bilong las wiken i stap long pes 27.



RAGBI

OP SISEN

Namba 9

Fonde Desemba 13, 1991.

NIUS

Mosbi Lig bai salim 10-pela pilaia long Nissan Wol 7 asait tonamen long Sidni

BARBARA TOMI i raitim

MOSBI Winfield Lig bai salim wanpela 10-pela pilaia tim i go long pilai long Sidni Australia long Febrieri, 1992. Ol bai pilai insait long Nissan Nissan 7 asait ragbi lig tonamen.

Dispela tim bai makim nem bilong Papua Niugini.

Tim ya bai i gat tupela opisal tasol. Tupela opisal ya em kosa Buddy Dou na John Harangu olsem tim menesa na trenu.

Dou i gat nem long kosim nupela Souths A gret tim husat i pretim planti nem tim long resis bilong dispela sisen. Na Harangu i save kosim na trenim Paga Pan-

thers A gret tim.

Ripot i tok ol opisal i makim pinis tim bilong go daun na pilai. Tasol ol i no inap long tokaut hariap. Bikos dokta bai sekim pastaim ol pilaia long lukim olsem ol i fit o no gat.

Wan wan pilaia insait long tim i kisim toksave pinis long mekim trening bilong em yet, inap tim i bung wantaim long trening stat long Janueri, 1992.

Long trening kem bai ol i makim fainal tim. Dispela em bihain long ol i sekim gut wanem pilaia i no fit, na bai mekim sampela senis.

Kosa Dou i tok em bai lukluk long ol pilaia husat i gat spit. Na tu ol pilaia husat i save pilai wantaim tingting.

Long sem taim em bai lukluk tu long ol pilaia husat i gat gutpela

disiplin o i save bihainim tok bilong ol opisal long fil na ausait wantaim.

I gat bilip olsem tim ya bai i pulap long ol Kumul pilaia husat i go pilai raun long Yurop na i kam bek pinis.

Dispela i min olsem ol selekta wantaim go pas bilong kosa Dou bai lukluk long ol pilaia olsem Philip Boge (Hawks), James Naipao (Tarangau), Kera Ngaffin (Difens), Kes Paglipari (Difens), Richard Wagambie (Tarangau), Tuksy Karu (Wes), Danny Moi (Wes), Joshua Kouoru (Wes), J. Kola (Difens), Joe Gispe (Air Niugini), Jack Uradok (Difens) na Stanley Haru (Kone Tigers).

Bikos ol dispela pilaia i bin go pilai raun long Yurop. Kumul i bin lusim olgeta gen na winim wan-

pela tasol long Yurop. Tasol ol pilaia olsem Boge, Wagambie na Karu i bin pilaim gutpela gem tu long hap.

RLN i harim olsem sampela pilaia husat i kisim askim pinis long stat trening em Wagambie na Kipel Kanaka. Kanaka i save pilai tu long Tarangau tim.

Long lukluk bilong RLN, ol pilaia olsem Boge, Wagambie, Karu, Kouoru, Haru, na Michael Toivita (Wes) bai i gat sampela sans long stap insait long tim.

Bikos ol dispela pilaia i gat spit na i save pilai wantaim tingting.

PNG em wanpela bilong ol 8-pela arapela kantri long wol husat bai salim wanpela tim long dispela bikpela resis. Na 16 tim bai i kam long Sidni Winfield Kap resis yet.

Frans, Yunaitet Stet (Amerika), Rasia, Osenia (Westen Samoa), Wigan (sempion klap bilong Ingran), na wanpela Nu Silan sait bai salens tu long dispela resis.

Saut Afrika em ol i makim tu long pilai insait long dispela tonamen. Tasol em i gat hevi yet. Bikos em i laik kisim tu sampela ragbi yunien pilaia bilong em long salim wanpela strongpela tim.

Na Fiji i hangamap tasol long banis long kisim ples bilong Saut Afrika. Dispela em sapos Saut Afrika i no salim wanpela tim.

Dispela Nissan Wol 7 asait ragbi lig resis bai ol i pilaim long Sidni Futbol Stadium long wiken bilong Febrieri 7, 8 na 9.

Tim husat i winim dispela tonamen bai kisim 100,000 Australian dola. Dispela i olsem K74,000.

Nesenel Kot oraitim "King" Tuiyo long pilai gen



• Ol sapota i amamasim "King" bilong Danny Leahy Oval, Tuiyo Evel bihain long em i winim kot long pilai gen. Poto Sape Metta.

NEM ragbi lig pilaia gen nau. Las wik long bilong Goroka Winfield Tunde apinun, Nesenel Lig na bilong Papua Kot i rausim dispela Niugini wantaim, Tuiyo tambu em judiseri "King" Evei bai pilai komiti bilong PNGRFL i

givism long em. PNGRFL i bin tambuim Tuiyo long i no ken pilai moa long wanpela ragbi lig resis

bilong PNGRFL inap em i dai. Dispela em bihain long bikpela pait i kamap long Danny Leahy Oval long Goro-

ka, we ol sapota i pretim Kumul kosa Skerry Palangat, sampela Kumul pilaia na ol opisa.

PNGRFL i sutim hevi long Tuiyo long kirapim dispela trabel. Bikos PNGRFL i ting Kumul menesmen i rausim

Tuiyo long mas mint we em i no pilai long nesenel tim egensim Frans Roosters. Dispela em long wanem em i kamap bihain long trening kem, na ol sapota i mas bel kaskas long dispela.

Jas Jalina i tok i no tingim rait bilong Tuiyo we i bihainim politik tasol. Olsem na em i askim tu PNGRFL long baim Tuiyo long K500, wantaim hamas mani Tuiyo i yusim long baim ol loya long rausim dispela tambu na nem nogu.

Tuiyo i gat 26 krismas na i bring ples Olimu long Henganofi long Isten Haians provins. Em i bin mekim nem long Kumul tim stat long 1986 i kam inap ol i rausim em long dispela yia. Long 1988 em i winim Dokta Jacob Pilaia bilong Yia Awot.

Long Australia ol i makim em olsem namba wan Kumul pilaia taim ol i pilaim Kangaroo long Wagga Wagga, we Kumul i lus 70-6.

Long Ogas 17, 1991 nesenel judiseri komiti i tambuimem long pilai inap em i dai. Bikos long pait i kamap long Goroka bihain long Wol Kap tes gem egensim Frans Roosters.

Ol selekta i mas makim planti NGI pilaia long Kumul tim

Dia Edita,
Mi wanpela man bilong Siasi Ailan long Morobe provins. Mi stap nau long Napapar Namba 2 insait long Is Nu Briten provins. Mi laik sapatim leta bilong Ekonia Romalus long Kavieng, Nu Ailan provins.
Long taim Frans Roosters i kam long Papua Niugini, NGI i nekim ol 28-24. Tasol bihain Roosters i

go long Goroka na nekim PNG Kumul ong Wol Kap tes poin.
Olsem na mi gat komplem long ol nesenel selekta. Ol i wok long kism ol Mosbi na Hailans pilaia tasol. Mi ritim hap tok bilong tim menesa Rod Pearce i tok: Na tu dispela Kumul tim i no gat ekspiriens. Olsem tim husat i go pilai raun long 1987 Yuropian toa em stret.

Em i stret. Kism ol olupela Kumul pilaia. Sapos yupela laikim Kumul i winim wanpela gem, traim kism ol kas nogut bilong NGI olsem tupela winga Lipirin Palangat wantaim James Kapia, Darius Haili, Eeremas Nomil, Bernard Bate na Jack Sapat. Ol arapela pilaia long kantri husat i mas stap insait long tim em Joe Gispe (Mosbi), Richard Wagambie

(Mosbi), Bal Numapo (Kundiawa), Tuiyo Evei (Goroka) na Noah Kool (Hagen).
Bikos mi harim long redio olsem Kumul i save opim tep na wara i save ran. Na tu i save pulap long skoa tru. Tasol i laik kam long Rabaul, NGI i save givim strong-pela salens tru. Long wanem ol boi Tolai i save strong tru ya.
Klostu NGI i winim Kangaroo.

Tasol namba 3 pilaia bilong Kimbe i bagarapim tripela trai. Olsem na long hap taim NGI i go pas long skoa 13-4. Na long namba tu hap bilong pilai, Kangaroo i win 42-25 (dispela em gut-pela skoa). Kumul i no bungim yet 25 poin egensim Kangaroo. NGI tasol i mekim nem pinis.

Jeffrey Kamia RABAU

Rong bilong ol Kumul selekta

Dia Edita,
PNG Kumul i wok long lus yet long ol bikipela intanesenel gem. Mi lukim olsem rong i stap long ol nesenel selekta. Bilong wanem as na ol i no save makim ol olupela pilaia olsem Arnold Krewanty, Michael Matmilo, Bal Numapo, Dairi Kovoe, Tuiyo Evei na Arebo Taumaku.
Ating ol i dai pinis na ol selekta i no makim ol o olsem wanem? Ol dispela pilaia em ol ekspiriens lain tru.
Yupela ol selekta i mas opim gut ai

bilong yupela, na makim ol nupela na olupela pilaia tu long nesenel tim. Yupela i kirap nogut tasol long ol nupela man i soim stail na strong bilong ol long son sempionsip. Tasol ol olupela pilaia i stap.
Mi harim ol pipel i poinim pinga long kosa Skerry Palanga. Ol i komplem olsem Palanga i no kosim gut ol pilaia. Tasol mi ting asua i stap long ol selekta.

John Gambu KIMBE

Ol referi mas kism liklik referi kos

Dia Edita,
Mi laik toktok long ol referi husat i save referi long ol op sisen ragbi lig resis insait long Mosbi na arapela hap bilong kantri wantaim.
Insait long Mosbi mi laik glasim wok bilong ol referi long Unagi op sisen lig resis.
Planti taim mi save lukim ol referi i kism wisil long laik na ran i go insait long fil.

Tasol mi laikim sapos ol referi i ken kism sampela skul liklik long wok referi.
Long wanem planti taim bai ol i mekim ol liklik asua long larim pilai i go yet sapos nok on i kamap. Na tu sapos i gat fowat pas.
Long dispela kain stail bilong referi na planti taim pait i save kamap long ol op sisen resis.

Savuta Inaeva BOROKO



• Wes Kongo pilaia i holim pinis jesi bilong Grassroots pilaia wantaim bal long Unagi op sisen lig resis long las wiken. Tupela wantaim i strong na i dro 4-4.



SOUTH SETTLEMENT RUGBY LEAGUE				
ROUND SIX:				
SATURDAY 14TH DECEMBER, 1991				
Time	Grade	Pool B		
OVAL 1				
		Pool B		
11.00 am	B	Eels	v	Broncos
11.55 am	B	Knights	v	Mosquitoes
12.50 pm	A	Eels	v	Broncos
1.57 pm	A	Knights	v	Mosquitoes
3.04 pm	A	Dragons	v	Roosters
4.11 pm	A	Eagles	v	United
OVAL 2				
10.00 am	C	Eels	v	Broncos
10.45 am	C	Knights	v	Mosquitoes
11.30 am	C	Dragons	v	Roosters
12.15 pm	C	Eagles	v	United
1.00 pm	B	Dragons	v	Roosters
1.35 pm	B	Eagles	v	United

i go moa long pes 3

Mutrus autim Tigers long Hohola resis

BIKPELA A gem bilong Hohola op sisen ragbi lig resis i bin kamap namel long Mutrus Brothers na June Valley Tigers long las wiken. Olgeta gem i bin kamap long bikipela pilai graun long Hohola Wan.

Insait long dispela gem, Mutrus Brothers i daunim J.V Tigers 9-8 klostu long pinis bilong gem. Tupela tim wantaim i gat wankain pilaia long olgeta posisen.

Kumul faiv et na hap bek pilaia husat i save pilai long Wes A gret tim, Tuksy Karu wantaim ol yangpela boi bilong June Valley i pilai gut tru egensim Mutrus Brothers.

Mutrus yet i gat ol biknem pilaia olsem Magilo Ama na Pukpuk pilaia, Sukape Tova. Ama i ran long sait lain bilong Air Niugini A gret tim long Mosbi Winfield Lig resis.

Tupela i kism bikipela helpim long faiv et Allan Omai, Peter Petrus na ain man yet, Rodney "Geko" Franky. Franky i liklik long sais tasol bikipela na strongpela long stapim na takelim birua wantaim bal.

Em yet i pilai long huka posisen, na stretim ol pilaia bilong Mutrus long winim bikipela gem. Nau yet Mutrus i go pas long lata na i lukluk long pilai long gren fainal bilong 1991/92 op sisen resis.

Tupela wik i go pinis, Mutrus Brothers i bagarapim sindaun bilong wanpela tim, 46-1. Las wiken em i kamapim wankain stail na daunim strong bilong June Valley Tigers 11-10.

Dispela skoa i kamap 5-pela minit long pinis bilong gem. Na tu i soim olsem gem i gutpela moa long ol arapela gem tupela tim i bungim pas-taim.

Mutrus Brothers i gat nem bikos planti beklain pilaia i gat strong na nem long ran. Man husat i go pas long skoarim moa trai, Magilo Ama i soim gutpela gem long sait lain. Na "Geko" Franky i supim het long senta na tromoi bal long ol arapela pilaia.

June Valley Tigers tu i gat ol arapela yangpela pilaia husat i pilai bung wantaim Karu long strongim beklain na fowat lain. Tuksy yet i lukau-tim beklain.



• (ANTAP-LEPHAN) Wes Kongo pilaia i givim sistl wantaim bal tasol winga (Namba 5) bilong Grassroots i sambal pinis. Olsem na tupela i dro 4-4 long Unagi op sisen lig resis long Mosbi las wiken.
• (ANTAP) - Wes Kongo fowat pilaia i taitim bun na givim sistl wantaim bal.

Finhaus bai nekim Edukesen

EDUKESAN tim i gat bikipela hevi i stap yet long stretim. Tasol dispela wiken em bai traim bun wantaim NBC/Finhaus long bikipela gem bilong Mosbi Pablik Sevan ragbi lig resis long Sande Desemba 15, 1991.

Edukesen i winim tupela tim na lus long han bilong narapela tupela pinis. Bihain long namba 5 gem, em i gat hevi long wanpela pilaia Frank Kaiva husat i dai long taim bilong gem.

Tasol kosa Jacob Tumala i tokim RLN olsem ol boi bilong em bai putim olgeta stail bilong ragbi lig na yunien wantaim long stapim Finhaus/NBC long skoarim moa trai.

Finhaus/NBC i gat nem pinis

long autim ol arapela top tim i kam inap las wiken. Emi sempion bilong las yia bihain long em i autim PTC Phonecard.

Las wik em wantaim Trensport i pait hat tru long Paga Panthers oval tasol klostu long pinis bilong gem, em i skoarim las trai long na daunim Trensport 8-4. Nau yet Finhaus/NBC i soim sain pinis, na ol i gat bikipela tingting long holim pasim taitel i stap gen long namba tu yia.

Dispela wiken, Finhaus/NBC bai putim ai long Tovue, Muli long faivet, na tupela ain man, Ben Basso wantaim Ame Ila long stapim na skoarim moa trai.

Bikipela helpim bai i kam long ol arapela fowat pilaia olsem Terry

Longbut, Lavapo Evarature na lok Sony Tovue. Las wik ol dispela pilaia i givim bikipela het pen stret long Bob Tolick na ol pilaia bilong Trensport.

Ol arapela yangpela pilaia husat i bin kamap nupela long pilai bilong Pablik Sevan lig resis bai traim long stapim ol pilaia bilong Edukesen wantaim stail bilong ol long ragbi yunien.

Edukesen yet i no gat planti ragbi lig pilaia. Planti i save pilai ragbi yunien. Olsem na dispela Sande ol bai soim strong bilong yunien egensim ol boi bilong Finhaus/NBC. Kosa Tumala i tok hevi bilong wanpela pilaia i stap yet. Olsem na ol i no mekim wanpela gutpela trening.

Tasol ol boi bilong em i gat bikipela tingting long pilai bung wantaim long stapim ol boi bilong Finhaus/NBC. Tupela wik i go pinis ol i no bin pilaim wanpela gem. Na Tumala i no save long tingting na wanem kain stail ol arapela pilaia husat i no bin kamap long trening bai pilai long dispela wiken.

Tumala i tok em i gat bikipela bilip long gem plen bilong tim. Sapos ol boi bilong Edukesen i yusim gem plen, tim bilong em inap winim dispela gem, sapos no gat bai ol i lus long liklik skoa tasol.

Dispela wiken em bai lukluk long ol beklain pilaia olsem Peter Ore, Yuriyala Nua, em yet (Tumala) wantaim Brian Oure na hap bek

Michael Temai long strongim tim. Papua Niugini Pukpuk pilaia na kepten, Ame Mowagi yet bai lukautim bal. Em bai kisim helpim long Timothy Gaimate long tromoi bal i go long ol pilaia.

Simon Veve wantaim fulbek Wapana Alu bai lukautim beklain long stapim ol pilaia bilong Finhaus/NBC. Long Desemba 12 long apinun, olgeta pilaia bilong Edukesen bai sindaun long salim bodi bilong yangpela pilaia Frank Kaiva i go long ples bilong em.

Ol pilaia na opisal bilong Pablik Seven Ragbi Lig i salim bikipela tok sori i go long famili bilong Frank. Na tu ol i lukluk long stapim gem wantaim bikipela amamas na opim gen long Januari 4, 1992.



Stail bilong Unagi lig: Wes Kongo pilaia i pundaun nogut tru long strongpela simen graun bilong Godens Discount Mart fil long las wiken. Tupela tim i dro 4-4. Poto Ivan Bayagau.

NCD PUBLIC SERVANTS RUGBY LEAGUE DRAW

Saturday December 14th, 1991.

TIME	FIXTURES
11.0 pm	Transport vs NCD
12.15 pm	Mita Ella vs Phonecard PTC
1.30pm	Finhaus/NBC vs Education
2.45pm	Transport vs NCD
3.55pm	Mita Ella vs Phonecard PTC

Sunday December 15th, 1991

11.00pm	Works vs Nam Raiders
12.15pm	Natres vs Primad
1.30pm	Natres vs Primad
2.45pm	Works vs Nam Raiders
3.55pm	Finhaus vs Education

DAVID UNAGI LEAGUE DRAW
December 14th and 15th, 1991
Round One: Game Seven

All "A" games on Sunday
All "B" games on Saturday

POOL A

Time	Fixtures
10.00	Hella Kens vs PTC Deve
11.20	Eno United vs Grass Roots
12.40	Sigoi Bros vs West Kongo
2.00	Kiro Raiders vs Muruks
3.20	Kiki Rocks vs Junipi Warriors
4.40	East Kipo vs Spiders

Bena Youth dismissed from competition.

POOL B

Time	Fixtures
10.00	Aeroto Tigers vs Nupa East
11.20	Gouno Nomads vs Megusa Roosters
12.40	Warasua vs Lufa Youth
2.00	East Wallabies vs Meuro Tigers
3.20	Limestone vs 9 Mile Tigers
4.40	Furiki vs Kanite

Bye: Siko Panthers

NOTE: One club to be dismissed later this week.

i kam long pes 2

SAUT SETELMEN DRO

SUNDAY 15TH DECEMBER, 1991

OVAL 1

Pool A		
11.00 am	B	Brothers v Raiders
11.55 am	B	Panthers v Bulldogs
12.50 pm	A	Brothers v Raiders
1.57 pm	A	Panthers v Bulldogs
3.04 pm	A	Sharks v Jets
4.11 pm	A	v

OVAL 2

Pool A		
Grade		
10.00 am	C	Brothers v Raiders
10.45 am	C	Panthers v Bulldogs
11.30 am	C	Sharks v Jets
12.15 pm	C	v
1.00 pm	B	Sharks v Jets
1.55 pm	B	v

Nupela sponsasip kirapim tingting bilong Finhaus long holim gen Mosbi Pablik Sevan ragbi lig taitel long 1992

SAM YAKAM i raitim

FINHAUS/NBC i painim pinis sponsasip bilong dispela yia. Patrick Seeto, Menesing Dairekta bilong Patrick Trensport i sponsarim klap long tupela set yunifom. Prais bilong sponsasip i stap olsem K3,000 olgeta.

Presiden bilong klap, Nou Davai i tok dispela tupela set yunifom bai inap strongim tingting na pilai bilong ol nupela pilai long holim pasim taitel em ol i bin winim long las yia.

Las yia, Air Trade i helpim klap wantaim wampela set yunifom. Long dispela taim bikpela amamas i kamap, na ol pilai i kamapim gutpela gem i go inap long gren fainal. Long gren fainal, Finhaus/NBC i bagarapim sindaun bilong PTC Phonecard.

Dispela sisen, Finhaus/NBC i tingting long kamapim wankain pilai taim Patrick i givim tupela nupela set yunifom long Fraide Desemba 5, 1991 olsem sponsasip bilong em.

Klap presiden, Nou Davai i amamas long Patrick i luksave long hevi bilong klap na helpim long tupela set yunifom ya. Davai i tok taim Mosbi Pablik Sevan Ragbi Lig i kik op, i no gat wampela kampani i givim han long ol inap las yia we Air Trade kampani i i kam insait.

Dispela yia klap i bungim wankain hevi. Tasol Patrick i luksave long dispela hevi na helpim long baim tupela set yunifom long K3,000 olgeta. Davai i tok tupela kain yunifom ya i gutpela na inap i stap moa long tripela yia olgeta.

Nau yet wok i stap

long han bilong ol opisal na pilai long soim Patrick olsem Finhaus/NBC inap holim pasim taitel bilong las yia gen long dispela yia. Dispela em i bikpela samting Finhaus/NBC i mas lukluk na tingting long en, Davai i tok.

Davai i tok dispela em i namba wan taim, Patrick givim han long sponsarim ragbi lig long Mosbi.

Patrick i tok kampani bilong em i groa yet, olsem na em i no givim han long ol arapela gem. Nau yet em i gat bikpela tingting long givim han long ragbi lig. Dispela i bihainim laik bilong em. Na tu ragbi lig em i wampela gem we Patrick i pilam planti yia i go pinis. Patrick i bin pilai ragbi lig taim em i manki yet.

Em i bin pilai 5-pela yia olgeta long Australia. Bihain long 5-pela yia em i bin kamap long Papua Niugini na pilai long



• Ol Finhaus pilai i soim tupela nupela jesi em Patrick Seeto Trensport kampani i sponsarim ol. Ol i sanap wantaim presiden bilong Mosbi Pablik Sevan Lig, Madicks Haro (raithan), na presiden bilong klap, Nou Davai (lephan). Poto Henry Morabang.

Rabaul wantaim Rabaul Waratas.

Patrick i tok sponsasip bilong sampela pilai bai kamap sapos kampani i groa bikpela.

Nau yet ol pilai na opisal bilong Finhaus/NBC i amamas long helpim bilong Patrick.

Na tu ol bai i traim long promotim ragbi lig insait Pablik Sevan resis. "Mi bai helpim klap na bikpela samting em long promotim

ragbi lig," Patrick i tok. Long soim amamas bilong dispela yunifom Finhaus/NBC, i bagarapim sindaun bilong Trensport 8-4 long bikpela gem bilong Sande Desemba 8.

Dispela skoa i soim amamas bilong tupela

nupela set yunifom Patrick i givim ol long Fraide Desemba 5. Davai i tok nupela yunifom i soim pinis sain bilong gren fainal. Na ol pilai bilong em bai kamapim gutpela gem egensim olgeta tim ol i bungim inap long gren fainal.



• WesKongo pilai wantaimbal i laik givim sisti long sait lain i go long trail lain bilong Grassroots. Tasol em i no strong tumas na ol i dro 4-4 long Unagi op sisen lig resis las wiken.



• Ol pilai bilong Wes Kongo i bungim salens bilong Grassroots long Unagi op sisen resis long Mosbi, Tupela i dro 4-4.

Ama putim ai long Vipers jesi

MAGILO Ama husat i gat 23 krismas bilong ples Gogodala long Westen provins i pilai ragbi lig long 5-pela yia nau.

Ama em i wampela gutpela na strongpela soka pilai. Tasol ragbi lig i tanim tingting bilong em taim op sisen bilong Mosbi i kik op long 1986.

Sisen propa bilong 1987 i stat na Ama i stat pilai wantaim Tarangau aninit long kosa Billy Aisi. Em i stat pilai long Anda 17 long winga posisen. Long dispela yia ol i go insait long gren fainal. Dispela em i namba taim bilong Ama long pilai long gren fainal na ol i win.

Bihain long 1987 Ama wantaim ol wan pilai bilong em i kamap gen long gren fainal bilong Anda 19 divisen. Dispela taim ol i pilai egensim Air Niugini. Long sem yia em i joinim Mosbi junia sait long son sempionsip.

Long 1989 em i mekim nem gen long Mosbi Junia sait na pilai egensim ol arapela senta aninit long kosa John Wagambie. Wagambie i luksave long strongpela gem Ama i save pilaiam na askim em long pilaim wampela A gret gem egensim Air Niugini.

Ama i pasim ai na ran i go insait long Lloyd Robson oval long soim strong na stail bilong em long kosa Wagambie.

Long 1990 Wagambie i promotim Ama i go pilai long C gret. Bihain long namba wan gem bilong Ama long C gret, em i stat mekim nem tu long ragbi yunien 7 asait tim bilong Papua Niugini. Dispela taim Ama i kamap wantaim tupela tingting long lusim ragbi lig na pilai yunien. Tasol em i kisim gutpela skul long ol arapela sinia pilai long lusim yunien,

na pilai ragbi lig yet.

Ama i strongim C gret bilong Tarangau na pilai egensim Air Niugini long ren fainal. Tupela tim i kamapim gutpela na strongpela gem stret long dispela gren fainal. Tasol bihain long pinis bilong gem, Tarangau i kamapim gutpela gem na daunim Air Niugini 11-10 long wampela poin tasol.

Bihain long 1990, pri sisen bilong Mosbi i kik op na kosa Adrian Genolagani bilong Air Niugini i grisim Ama i go ran long wing. Bihain long pri sisen, Ama i holim pasim wing posisen bilong Air Niugini A gret tim long 1992 sisen.

Ama i save pilaim gutpela na strongpela gem long sait lain egensim ol arapela tim olsem Hawks na Magani long Mosbi Winfield Lig resis. "Mi amamas long Genolagani. Bikos em i luksave long gutpela na strongpela gem mi i bin pilaim long pri sisen. Olsem na em i holim pasim mi i stap long strongim tim," Ama i tok. "Nau mi gat bikpela bilip long mi yet long pilai egensim ol arapela strongpela na biknem pilai."

"Long 1992 sisen, mi bai putim ai long wampela yunifom bilong Mosbi Vipers. Tasol namba wan samting mi mas soim ol selekta olsem wing posisen em i no bikpela samting," Ama i tok.

Ama i tok em i amamas long pilai aninit long lukaut bilong ol biknem pilai olsem Tony Kila, Joe Gispe, na Arnold Krewanty. Bikos ol dispela pilai i save givim planti gutpela skul long em.

Na dispela i strongim tingting bilong em long putim wampela yunifom bilong Mosbi Vipers long sampela yia bihain.

SIPAK MAIK

WANTU OLGETA GO LONG HAUS
BILONG MAIK NA KARIM OL LEP-
OVA BIA I KAM!!!

BIHAIN OL I LOUDIM OLGETA KATEN
BIA IGO INSAIT LONG KA BILONG
POLIS!!!

TAIM TUPELA POLISMAN TEK-OF,
MAIK WANTAIM OL MAN TOK
NOSUTIM OL!!!

LAINIM OLGETA
LONG HIA!!




LUKIM! SAPOS NOGAT,
EM YUPELA TASOL BAI MI
SUBIM IGO INSAIT! YUPELA
LAKI TRU..EM BIA KATEN
TASOL!

AEEE,
EMI TRU
TUMAS?



GXG?!!


YUPELA
YUSIM SOTGAN
NA YUPELA BIKHET!



WANTU, TUPELA PUTIM BREK NA
KOPROL RAUSIM SOTGAN NA SUT IGO
ANTAP SKAI... OLGETA MAN I LUS!!!

MAIK SUT IGO INSAIT LONG HAUS,
BIKMAUS WANTAIM!!!

EM I GO HAIT ANANIT LONG
BET!!!



YUPELA
TOK WANEM?

ESTAA!! OL POLIS
SUT LONG SOTGAN!
GO NA HAIT!!



HEY, BIKMAN? YU
MEKIM WANEM AN-
ANIT LONG BET, YAZ?
MI NO LUKIM WAN-
PELA POLIS, AUCSAIT!

GIAMAN!
OLI SUTIM
MIPELAYA!



PERSONAL LOANS

Husat i halivim yu long kisim ol samting
yu laikim tru?

Sapos yu laikim nupela ka
o ol samting bilong
haus, PNGBC ken givim
yu dinau long baim ol
dispela samting.

Yu mas gat gutpela wok
na sampela seving
long haus moni.
Na i no hat tumas long
bekim dispela dinau.

Askim long haus moni bilong PNGBC.
Bai mipela halivim yu long
kisim ol samting yu laikim emi tru!



REBO

REBO SANAP LONG DUA NA WETIM OL... TAIM OL I KAM, EM TOK PILAI LONG TUPELA...

... MI NO TOKIM OL POLIS, OL I YET I SAVE NA KAM WETIM YUPELA!

YU OK?!? BAI MI KIUM YU OK!!!

FOAPELA MUN I GO PINIS NA MAUSGRAS BILONG REBO I KAMAP BIKPELA TRI... WANPELA MONING SEKETERI BILONG BOS I GO SINGAUTIM REBO...

REBO... BOS I LAIK LUKIM YU! EM I TOK, NALI TASOL!

WANTU EM LUSIM WOK NA GO LUKIM BOS... TUPELA TOKTOK...

SORI TRI REBO LONG BAGARAPIM WOK BILONG YU, TASOL MI GAT WANPELA IMPO- TENT TOKTOK LONG MEKIM... MI LAIK YU GO LONG KIUNGA.

KIUNGA? LONG WANEM, SE?

BOS I TOKIM EM LONG AS BILONG EM I GO LONG HAP...

... MI LAIKIM OISEM YU MENESIM OPIS LONG HAP.. OLPELA MENESA LONG HAP I GO BEK PINIS... WANPELA YIA TASOL NA KAM BEK.

UMN.. EM I ORAIT LONG MI.

TDK TOK IPINIS NA REBO LAIK GO AUT, TASOL BOS I SINGAUT LONG EM GEN...

EH, REBO? NOKEN WAS TINGTING LONG TOKIM MERI BILONG YU, AH? NG- BUT EM LES..

OKE, BOS! ATING EM BAI LAIKIM TRI YA!

LONG HAPIS REBO SINDAUN LUKIM TELEVISON I STAP NA EM TINGIM TOKTOK, YA...

HEY, LEWAZ... YU LAIK YUMI GO STAP LONG KIUNGA HUKUK NA KAM BEK?

GO KWE? GO LONG KIUNGA?


1YIA!!

HAMAS DE BAI YUMI STAP LONG HAP?


1YIA?

OL SAVEMAN BILONG BISNIS YUSIM OL!


Lister




LT1 5 K.V.A.
 • TOTALLY PORTABLE ENERGY SOURCE
 • IDEAL UNIT FOR VILLAGE LOCATIONS



TS2 8.5 K.V.A.
 • 3 PHASE OR SINGLE PHASE POWER
 • COMPACT AND EFFICIENT



HR3 26.25 K.V.A.
 • IDEAL COMMERCIAL BACKUP SYSTEM



CS6 58 K.V.A.
 • INDUSTRIAL CAPACITY
 • WILL HANDLE MAXIMUM DEMAND FOR POWER ANYTIME

Brian Bell Stores

• BOROKO — 25 5411
 • LAE — 42 433
 • GOROKA — 72 1098

• MT. HAGEN — 52 1999
 • RABAU — 92 1966

Phantom

EM!??

Yu lukim em tu?! Em! Mi lukim tasol wara i kalap. Ating wanpela pis ya...

Mi lukim .wanpela man kalap long balus go daun long wara ... Bilong wanem bai wanpela man mekim olsem! Ating wel tenk ya.

Mi lukim wanpela man .. i no tenk! Ating wanpela man ... mi save... Yes! Ya ... wanpela man ... yu save ... HMM..

Masin gan long wara. Tromoi bom! Kilim em!

Ol i tok ... long paia ... hia ... Long wanem ya?

Ol i tok ..tromoi bom . wokim nau. Wokim pinis.

VOOM

CONT'D.

Flash Gordon

Ol pipel i no gat wanpela lida nau! King i dai pinis!

Dale? Dalin? ... Het bilong mi ... Flash ...

Yu kolim mi Flash! Ating wanem samting i paitim yu long haiwara i mas bringim bek tingting bilong yu!

Sapos yupela i laik makim nupela King

Borac!

Hooreeeiii!

Na Simila bai klostu i kamap Kwin! Hooreeeiii!

Borac, No!

Ol sekyuriti holim pasim dispela man na sasim em!

MICKEY MOUSE

Walt Disney

Mi no makim tingting yet long wanem hap mitupela bai kaikai ...

.. Olsem na yu mas helpim tingting bilong mi, bai mi makim wanpela ples.. Mi save helpim yu oltaim.

YU stap long mak bilong kaikai ol Sainais kaikai.

No.

Olsem wanem long Frans Cuisine?

No.

Italian kaikai? Jemani, Japanis?

No. No. No.

Olsem wanem long SteakHaus bilong Sam? Seafood Inn?

No. No.

Hei, Mi save long wanpela ples i gat top kuk!

SCREECH!

LUSHIP

P.O. BOX 789 MADANG

FOR VESSELS CARRYING PASSENGERS DECEMBER 1991

Vessel	Voy No.	Sailing from Madang for...	Day	Date	Time	Vessel	Voy No.	Sailing from Madang for...	Day	Date	Time
Rita	101S	Wasu/Finsch/Buki/Lae/Oro Bay	Sun	01/12/91	9 am	Umboi	197N	Lorengau	Tue	17/12/91	12 mn
Total	491S	Biliau/Yara/Wasu/Sio/Finsch/Lae	Mon	02/12/91	9 am	Rita	103O	Wewak	Tue	17/12/91	4 pm
Umboi	195N	Lorengau	Tue	03/12/91	12 mn	Malalo	267N	Aitape/Vanimo	Wed	18/12/91	6 pm
Malalo	266N	Aitape/Vanimo	Wed	04/12/91	6 pm	Rita	103D	Wewak	Thu	19/12/91	4 pm
Rita	102N	Wewak	Thu	05/12/91	4 pm	Rita	103E	Wewak	Sat	21/12/91	2 pm
Rita	102A	Wewak	Sat	07/12/91	2 pm	Rita	103F	Wewak	Mon	23/12/91	4 pm
Total	492S	Biliau/Yara/Wasu/Sio/Finsch/Lae	Mon	09/12/91	9 am	Total	494S	Biliau/Yara/Wasu/Sio/Finsch/Lae	Mon	23/12/91	9 am
Rita	102S	Wasu/Finsch/Buki/Lae	Mon	09/12/91	9 am	Rita	103G	Wewak	Fri	27/12/91	5 pm
Umboi	196N	Lorengau	Tue	10/12/91	12 mn	Rita	103S	Wasu/Finsch/Buki/Lae/Oro Bay	Sun	29/12/91	9 am
Rita	103N	Wewak	Wed	11/12/91	10 pm	Madang ticket office hours: Mon to Fri 0800 - 1145 1315 - 1530 Sat 0800 - 1030					
Rita	103A	Wewak	Fri	13/12/91	5 pm	For reservations or enquiries phone Sesu on 82 2577.					
Malalo	266S	Long Is/Lokep/Masele/Gizarum/Lablab Finsch/Lae	Sat	14/12/91	9 am						
Rita	105B	Wewak	Sun	15/12/91	5 pm						
Total	493S	Biliau/Yara/Wasu/Sio/Finsch/Lae	mon	16/12/91	9 am						

PASSENGER SCHEDULE FOR DECEMBER 1991

Lutheran Shipping, P.O. Box 1459, Lae. For passenger bookings/information contact Clement or Ita ph: 42 2066. * Denotes Passenger Only Vessel.

Other vessels are cargo passenger vessels which are listed below.

Vessel	Voy No.	Sailing for	Day	Date	Time	Vessel	Voy No.	Sailing for	Day	Date	Time
*Mamose Ex	235N	Kimbe/Rabaul	Mon	02/12/91	10 am	*Mamose Ex	238X	Buki/Lae	Wed	18/12/91	8 am
Umboi	195N	Madang/Lorengau	Mon	02/12/91	4 pm	Total	484A	Finsch/Gizarum/Lae	Wed	18/12/91	8 pm
*Rita	101S	Oro Bay	Mon	02/12/91	7 pm	Nagada	251S	Oro Bay	Thu	19/12/91	12 mn
Malalo	266N	Lablab (Aitape/Vanimo)	Tue	03/12/91	4 pm	*Mamose Ex	238Y	Buki/Lae	Fri	20/12/91	8 am
*Rita	102N	Buki/Finsch/Wasu/Madang/Wewak	Wed	04/12/91	9 am	Total	494N	Finsch/Sio/Wasu/Madang	Fri	20/12/91	4 pm
Total	492A	Finsch/Gizarum/Lae	Wed	04/12/91	4 pm	*Mamose Ex	238S	Morobe/Oro Bay/Morobe/Lae	Fri	20/12/91	8 pm
Nagada	251A	Finsch/Lablab/Finsch/Lae	Thu	05/12/91	4 pm	Nagada	251O	Buki/Lae	Sat	21/12/91	8 am
*Mamose Ex	236A	Buki/Lae	Fri	06/12/91	2 pm	Nagada	252P	Wasu/Lae	Sat	21/12/91	9 pm
Total	492N	Finsch/Sio/Wasu/Madang	Fri	06/12/91	4 pm	CHRISTMAS					
*Mamose Ex	236X	Buki/Lae	Sat	07/12/91	8 am						
Nagada	251B	Buki/Lae	Sat	07/12/91	8.30 am						
*Mamose Ex	236B	Lablab/Buki/Lae	Sat	07/12/91	8 pm						
Nagada	251C	Buki/Lae	Sun	08/12/91	8 am						
Nagada	251D	Buki/Lae	Mon	09/12/91	8 am						
*Mamose Ex	235N	Kimbe/Rabaul	Mon	09/12/91	10 am						
Umboi	196N	Madang/Lorengau	Mon	09/12/91	4 pm						
Nagada	251E	Buki/Lae	Tue	10/12/91	8 am						
*Rita	103N	Finsch/Wasu/Madang/Wewak	Tue	10/12/91	7 pm						
Nagada	251F	Lablab/Lae	Tue	10/12/91	9 pm	*Mamose Ex	239N	Kimbe/Rabaul	Thu	26/12/91	10 am
Total	493N	Finsch/Sio/Wasu/Yara/Biliau/Madang	Wed	11/12/91	4 pm	Total	495A	Buki/Lae	Fri	27/12/91	8 am
Nagada	251G	Buki/Lae	Thu	12/12/91	8 am	Total	495B	Buki/Lae	Sat	28/12/91	8 am
Nagada	251H	Lablab/Lae	Thu	12/12/91	9 pm	Total	495C	Buki/Lae	Sun	29/12/91	8 am
*Mamose Ex	237A	Buki/Lae	Fri	13/12/91	2 pm	Total	495D	Finsch	Sun	29/12/91	9 pm
*Mamose Ex	237K	Buki/Lae	Sat	14/12/91	8 am	*Mamose Ex	240A	Buki/Lae	Mon	30/12/91	2 pm
Nagada	251I	Buki/Lae	Sat	14/12/91	8.30 am	Umboi	198N	Finsch/Lorengau	Mon	30/12/91	4 pm
*Mamose Ex	237S	Oro Bay	Sat	14/12/91	8 pm	*Rita	103S	Oro Bay	Mon	30/12/91	7 pm
Nagada	251J	Wasu/Lae	Sat	14/12/91	9 pm	Total	495B	Buki/Lae	Tue	31/12/91	8 am
*Mamose Ex	238A	Buki/Lae	Mon	16/12/91	8 am	*Mamose Ex	240N	Kimbe/Rabaul	Tue	31/12/91	10 am
Nagada	251K	Buki/Lae	Mon	16/12/91	9 am	Please note tickets will only be sold during the following times Monday to Friday 8 am to 3.30 pm. Saturday 8 am to 9 am.					
Umboi	197N	Madang/Lorengau	Mon	16/12/91	4 pm	No after hours tickets will be sold. All persons over one year are all persons over one year of age are required to purchase a ticket.					
*Mamose Ex	238W	Wasu/Buki/Lae	Mon	16/12/91	8 pm	Children up to one year travel free, children from one to 12 years and students with students I.D. cards travel at half adult rate.					
Nagada	251L	Buki/Lae	Tue	17/12/91	8 am						
Malalo	267N	Lablab (Aitape/Vanimo)	Tue	17/12/91	4 pm						
Nagada	251M	Lablab/Lae	Tue	17/12/91	9 pm						



Agents:	Finschafen	LUSHIP	44 7004
Lae	Wewak	Sepik Coastal	86 2643
Madang	Oro Bay	Century Shipping	29 7268

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.